

---

# **KUPHUNZIRA CHICHEŴA**

---

**Malamulo a Chiyankhulo**



**Wisdom Akuzike Nkhoma**

Chancellor College Publications  
P.O. Box 280  
Zomba

Tel: 01 952 347; 01 526 202; 01 524 222

Email: *publications@cc.ac.mw*

© Wisdom Akuzike Nkhoma 2015

ISBN: 978-99960-23-55-2

Cover Design and Layout: Gervasio Manyungwa

All rights reserved. No part of this publication may be reproduced, stored in a retrieval system, or transmitted in any form or by any means, electronic, mechanical, photocopying, recording or otherwise, without prior permission from the publisher.

## ZAM’KATIMU

Kuthokoza .. .. .	iv
Chiyambi .. .. .	v
1. Chicheŵa ngati Chibantu ..	1
2. Dzina .. .. .	7
3. Mloŵam’ malo .. .. .	35
4. Mfotokozi .. .. .	45
5. Mneni .. .. .	57
6. Muonjezi .. .. .	83
7. Mlumikizi .. .. .	91
8. Tsinde .. .. .	97
9. Mperekezi .. .. .	103
10. Mfuwu .. .. .	107
11. Mvekero .... .. .	111
12. Mphatikiri .. .. .	119
13. Mgwirizanitsi .. .. .	131
14. Zizindikiro za m’kalembedwe ..	137
15. Chiganizo .. .. .	149
16. Kapandamneni .. .. .	167
17. Zoyankhula mwini ndi zoyankhula wina ..	175
18. L, R, LI, TI ndi NDI .. .. .	179
19. Zitsanzo za mafunso amayeso ..	187

## KUTHOKOZA

Ndiyamika aphunzitsi ambiri a phunziro la Chicheŵa mu sukulu zasekondale komanso ophunzira ena a phunziro lazaziyanikhulo mu koleji zamaphunziro chifukwa chondilimbikitsa kuti ndikonze zina ndi zina mu buku la *Kuphunzira Chinyanja*. Chilimbikitso chawo ndi chomwe chinandichititsa kuti ndilembe bukuli lomwe likugwirizana kwathunthu ndi zomwe silabasi zamakono zophunzitsira Chicheŵa mu sukulu zasekondale zikufuna pa luso la kugwiritsa ntchito malamulo a chiyankhulo.

Nditi zikomo kwa onse ogwira ntchito ku nyumba yosindikiza mabuku ya Chancellor College Publications chifukwa chogwira ntchito mwaluso komanso mwachangu kuti bukuli lisindikizidwe pa nthawi yake. Mwapadera nditi zikomo kwa mkulu wa Chancellor College Publications, Kingsley Jika, chifukwa chondimvetsetsa kuti buku la *Kuphunzira Chinyanja* lidzatulukabe m'tsogolo muno poti ndinali wotangwanika kwambiri kulemba lina logwirizana kwathunthu ndi mitu ya malamulo a chiyankhulo yomwe ili mu silabasi zamakono.

Ndiyamika mphunzitsi wanga wazaziyanikhulo, Professor Pascal Kishindo, chifukwa cha chilimbikitso komanso malangizo awo. Nthawi iliyonse yomwe ndingaŵafotokozere kuti ndikulemba buku, amandilimbikitsa komanso kundipatsa malangizo anzeru.

## CHIYAMBI

Ndalemba buku lino kuchokera pa buku la *Kuphunzira Chinyanja* lomwe linasindikizidwa koyamba mu chaka cha 1999 ndi Chancellor College Publications. Ndiliba maganizo ofuna kupha buku la *Kuphunzira Chinyanja* koma n'chifukwa choti ndikulikonzanso.

Gwero la buku la *Kuphunzira Chinyanja* lidali kabuku ka *Chicheŵa Grammatical Tems* komwe kadalembedwa ndi bungwe la Chicheŵa Board mu chaka cha 1991. Kabukuko kali ndi zimasuliro za mawu a malamulo a chiyankhulo kuchoka mu Chingerezi kupita mu Chicheŵa. Komatu kabukuko sikadapereke zitsanzo. Nditaona kufunikira kwa zitsanzo zomwe sizidaperekedwezo, ndidayamba kuŵerenga mabuku a malamulo a chiyankhulo cha Chinyanja/Chicheŵa kuti ndipeze mfundo zoyenera koma ndidamva chisoni nditapeza kuti panalibe mabuku ambiri otero. Izi ndi zomwe zidandichititsa kukhala ndi ganizo loti ndilembe buku la malamulo a chiyankhulo, *Kuphunzira Chinyanja*.

Aphunzitsi ndi ophunzira ambiri a phunziro la Chicheŵa adalikonda kwambiri buku la *Kuphunzira Chinyanja*. Sindinadabwe nditaona alembi otchuka a mabuku a malamulo a chiyankhulo cha Chicheŵa atayamba kulemba mabuku awo pongokopera mfundo ndi zitsanzo zambiri zomwe ndidalemba mu bukulo.

Kuchokera mu chaka cha 1999 pomwe buku la *Kuphunzira Chinyanja* lidasindikizidwa kufikira lero, papita zaka zambiri ndipo zinthu zambiri zasintha mu chiyankhulo cha Chicheŵa. Chiyankhulo chili ngati chinthu chamoyo kotero chimasintha nthawi ndi nthawi. Zosinthazo ndizo zidandichititsa kuganiza zoti ndilikonzenso bukulo. Komabe poti kukonzanso buku kumatenga nthawi yaitali, ndalemba buku lino kuti lithandize aphunzitsi komanso ophunzira omwe akhala akufunafuna buku la *Kuphunzira Chinyanja*.

Ganizo lokonzanso bukulo lidalimbikitsidwa kaamba ka kusintha kwa ndondomeko yophunzitsira maphunziro mu sukulu zasekondale. Mu silabasi za chiyankhulo cha Chicheŵa muli zosintha zambiri zokhudza malamulo a chiyankhulo. Polemba bukuli ndaganizira kwambiri za kusinthako kuti ligwirizane kwathunthu ndi zomwe Unduna wa zamaphunziro ukufuna kuti ziphunzitsidwe pa malamulo a chiyankhulo cha Chicheŵa. Mfundo zazikulu zomwe zasintha mu malamulo a chiyankhulo cha Chicheŵa (molingana ndi silabasi zatsopano zachiyankhulo) ndi monga izi:

### 1. Mayina 'achibale' tsopano akutchedwa mayina 'amphukira'

Dzina lamphukira (lomwe tinkati dzina 'lachibale') ndi limodzi mwa mayina opangidwa kuchokera ku muzu kapena tsinde limodzi la mawu. Mayinaŵa amaimira zinthu zosiyana ngakhale kuti kholo (tsinde kapena muzu) lawo ndi limodzi. Zitsanzo za mayina amphukira ndi mawu monga aŵa: 'mtumwi', 'nthumwi', 'mtumiki' ndi 'utumiki' (kuchokera ku mneni 'tuma'), 'mliri', 'maliro', 'chiliro' ndi 'maliralira' (kuchokera ku mneni 'lira') ndi 'likulu', 'chikulu', 'mkulu' ndi 'ukulu' (kuchokera ku tsinde la mfotokozi '-kulu').

### 2. Njira yopangira mayina ya 'mtembenuzo'

Mayina amapangidwa potsata njira zosiyanasiyana. Pali njira ina yopangira mayina yomwe m'mbuyomu akatswiri azaziyanankhulo sadaiganizire mozama kuti ndi yotheka kugwiritsidwa ntchito popanga mayina mu chiyankhulo cha Chicheŵa. Njirayo imatchedwa 'mtembenuzo'. Njirayi imagwiritsidwa ntchito kwambiri popanga mawu, maka mayina ndi aneni, mu Chingerezi. Komatu njirayi ndi yothekanso kwambiri kupangira mayina mu Chicheŵa. Pali zitsanzo zingapo mu Chicheŵa zotsimikizira maganizoŵa.

Mtembenuzo ndi njira yopangira mawu yomwe mawu opangidwawo amangosinthidwa mtundu wake komanso ntchito yake posasintha mwa njira ina iliyonse kalembedwe ka mawuwo. Nthawi zambiri katchulidwe ka mawu opangidwawo n'komwe kamatha kusintha. Mawu opangidwawo ndi amphukira.

Zitsanzo za mayina opangidwa potsata njira ya mtembenuzo ndi monga izi:

a. gogoda	(mneni)	gogoda	(dzina)
b. tchinga	(mneni)	tchinga	(dzina)
c. wakuba	(mfotokozi)	wakuba	(dzina)
d. chakudya	(mfotokozi)	chakudya	(dzina)
e. chinunu	(muonjezi)	chinunu	(dzina)
f. dzana	(muonjezi)	dzana	(dzina)
g. patapata	(mvekero)	patapata	(dzina)
h. tambalale	(mvekero)	tambalale	(dzina)

3. Mwininkhani tsopano ndi 'mchitantchito' ndipo pamtherankhani tsopano ndi 'mchitidwantchito'.

Mawu ochita kanthu mu chiganizo ankatchedwa 'mwininkhani' ndipo mawu ochitidwa kanthu ankatchedwa 'pamtherankhani'. Komatu tsopano, molingana ndi silabasi yamakono, zoterezi zasintha. Mwininkhani ndi 'mchitantchito' ndipo pamtherankhani ndi 'mchitidwa ntchito'.

4. 'Lembo laliwu' tsopano likutchedwa 'lembo lamtsekulanjira' ndipo 'lembo lopandaliwu' tsopano likutchedwa 'lembo lamtsekanjira'

Malembo 'a', 'e', 'i', 'o' ndi 'u' ankatchedwa 'malembo aliwu' ndipo ena onse otsala (monga 'b', 'd', 'f', 'g' mpaka 'z') ankatchedwa 'malembo opanda liwu'. Molingana ndi silabasi yamakono, 'lembo laliwu' likutchedwa 'lembo lamtsekulanjira' ndipo 'lembo lopandaliwu' tsopano likutchedwa 'lembo lamtsekanjira' potengera momwe malembowo amapangidwira.

5. Kuchotsedwa kwa 'mphatikiram'kati' ngati mtundu wa mphatikiri  
Mphatikiri wotchedwa 'mphatikiram'kati' wachotsedwa mu malamulo a chiyankhulo cha Chicheŵa. Izi zili chonchi chifukwa mu ziyankhulo za Chibantu mulibe mphatikiram'kati weniweni. Ena atha kudabwa ndi ganizoli komatu izi ndi zoonza ndithu.

Ponena zoona, mphatikiram’kati ndi mphatikiri wopezeka m’kati (osati kunja) mwa tsinde. Ndi zosatheka mpang’ono pomwe kuloŵetsa mphatikiri m’kati mwa tsinde la mawu a Chicheŵa, monga momwe zimakhallira mu ziyankhulo zina.

Aphatikiri onse omwe tinkati ndi ‘aphatikiram’kati’ tsopano ndi aphatikiram’mbuyo chifukwa amaphatikizidwa kumbuyo kwa tsinde la mawu.

6. Mthandizanthawi

Nthawi za aneni zilipo zamitundu itatu yokha iyi: nthawi yakale, nthawi yatsopano ndi nthawi yam’tsogolo. Nthawizi zimagawidwa mu nthawi zina (zomwe kale tinkati mitundu ya nthawi yakale, mitundu ya nthawi yatsopano ndi mitundu ya nthawi yam’tsogolo.)

Mitundu ya nthawi za aneni tsopano ikutchedwa ‘athandizanthawi’. Potsata mfundoyi ndiye kuti pali athandizanthawi a nthawi yakale, athandizanthawi a nthawi yatsopano ndi athandizanthawi a nthawi yam’tsogolo.

7. Kalembedwe ka mawu

Alembi ena ankaloŵetsa ‘w’ ndi ‘y’ mu mawu ena pofuna kuti mawuwo azitchulika bwino komanso pofuna kuphwanya kundondoza kwa maliwu amtsekulanjira. Mawuwo ndi monga aŵa: ‘ndiyimba’, ‘muyiona’, ‘chowopsa’, ‘zowona’ ndi ‘akuwumba’.

Kalembedwe kotero kadali kolakwitsa chifukwa kamasokoneza makhalidwe a tsinde la mawu choncho mawu monga ameneŵa ayenera kulembedwa motere: ‘ndiimba’ osati ‘ndiyimba’, ‘muiona’ osati ‘muyiona’, ‘choopsa’ osati ‘chowopsa’, ‘zoona’ osati ‘zowona’ ndi ‘akuumba’ osati ‘akuwumba’.

Kusinthaku si kuti kwachitidwa ndi mlembi wa buku lino payekha ayi komatu ndi zomwe akatswiri azaziyankhulo anagwirizana pa nthawi yomwe ankalemba silabasi zamakono zophunzitsira phunziro la Chicheŵa mu zasekondale. Unduna wa zamaphunziro udavomereza kusinthaku. Zonsezi, komanso zina, mutha kuzipeza mu gawo la ‘Zoonjezera’ kumapeto kwa silabasi za Chicheŵa zamakono.

Polemba buku lino, ndaganizira mozama za kusinthaku kuti ndilembe zokhazo zomwe Unduna wa zamaphunziro ukufuna, n’cholinga choti ophunzira onse aziphunzira zinthu zofanana. Ndili ndi chikhulupiriro choti mumvetsetsa bwino za kusinthaku mukaŵerenga silabsi komanso zomwe ndalembe mu buku lino.

Zikomo kwambiri.





# | MUTU 1 |

## CHICHEŴA NGATI CHIBANTU



munthu  
muntu  
mtu

mundu  
mutu  
munhu

### Kuganiza mozama

1. Tchulani kufanana kwa mawu omwe ali pamwambapa.
2. Fotokozani kusiyana kwa mawu omwe ali pamwambapa.
3. Mongoganizira chabe, kodi mawu woti 'bantu' akutanthauzanji?

Chibantu ndi gulu (banja) la ziyankhulo zamphukira (zachibale) zomwe zimayankhulidwa mu maiko ambiri a mu Africa kuchokera kumwera kwa Cameroon ndi kumwera chakummaŵa kwa Nigeria n’kutsika ku chigawo chapakati mpaka kukafika kumwera kwa South Africa.

Akatswiri azaziyankhulo amakhulupirira kuti ziyankhulo za Chibantu zidali chiyankhulo chimodzi kalelo chifukwa zimafanana mu zambiri. Kufananako ndi umboni waukulu wotsimikizira kuti ziyankhulozi zidachokeradi ku kholo limodzi.

Ziyankhulo za Chibantu zimafanana motere:

1. Mawu ambiri amachita kupangidwa pophatikiza aphetikiram’mbuyo ku masinde osiyanasiyana. Mwachitsanzo, popanga mayina oimira anthu, mphatikiram’mbuyo ‘m-’ kapena ‘mu-’ (mu chimodzi) ndiye amagwiritsidwa ntchito kwambiri mu ziyankhulozi.

**Chitsanzo** ‘munthu’

- a. munthu (Chicheŵa, Chitumbuka)
- b. mundu (Ciyawo)
- c. muntu (Chindebele)
- d. munhu (Chishona)
- e. mtu (Chiswahili)

2. Ziyankhulo zambiri za mu banjali zimagwiritsa ntchito njira yoŵerengera mwakasani ndipo masinde ambiri amaŵerengo ndi ofananiranako.

**Zitsanzo**

- a. -modzi -ŵiri -tatu -nayi -sanu (Chicheŵa)
- b. -moja -wili -tatu -nne -tano (Chiswahili)
- c. -nye -bili -hathu -ne -hlanu (Chizulu)
- d. -posi -piri -tatu -nayi -shanu (Chisena)
- e. -mu -biri -satu -nya -taano (Luganda)

3. Masinde komanso mawu ena oimira chinthu chimodzi amakhala ofanana kapena ofananirako.

**Zitsanzo**

- a. -kazi (Chicheŵa, Chitonga, Chixhosa, Chingoni)

- b. -nthu (Chicheŵa, Chitumbuka, Chibemba)
- c. -ntu (Kinyarwanda, Chizulu, Chindebele, Luganda)
- d. ing'ombe (Chibemba, Chilambia)
- e. mbuzi (Chicheŵa, Chiswahili, Luganda)
- f. mwana (Chicheŵa, Chitumbuka, Luganda)
- g. moto (Chitumbuka, Chicheŵa, Chitonga)
- h. nyumba (Ciyawo, Chiswahili, Chicheŵa)

4. Mphatikiri wa mthandizanthawi amasintha nthawi ya mnene

**Zitsanzo**

***Nthawi yam'tsogolo***

***Nthawi yatsopano yopitirira***

- |                            |                        |              |
|----------------------------|------------------------|--------------|
| a. Mwana <u>adz</u> afika  | Mwana <u>ak</u> ufika  | (Chicheŵa)   |
| b. Mtoto <u>ata</u> fika   | Mtoto <u>ana</u> fika  | (Chiswahili) |
| c. Mwana <u>acha</u> svika | Mwana <u>aku</u> svika | (Chishona)   |

5. M'ziganizo mawu amakhala pamgwirizano ndi mwininkhani (mchitantchito) kapena pamtherankhani (mchitidwantchito).

**Zitsanzo**

- |   |            |
|---|------------|
| a. Chimunthu <u>ch</u> onenepa <u>ch</u> agwa.  | (Chicheŵa) |
| b. Cimuntu <u>ca</u> ina <u>ca</u> pona.        | (Chibemba) |
| c. Chimuntu <u>cha</u> kakora <u>cha</u> donha. | (Chishona) |
| d. Njinga <u>ya</u> nga <u>ya</u> soŵa.         | (Chicheŵa) |
| e. Njinga <u>ya</u> ndi <u>ya</u> luba.         | (Chibemba) |
| f. Bhizautare <u>ra</u> ngu <u>ra</u> shaya.    | (Chishona) |

6. Pofuna kuchulukitsa mawu monga mayina, mphatikiram'mbuyo wazambiri amalowa m'malomwa mphatikiram'mbuyo wa chimodzi.

**Zitsanzo**

***Chimodzi***

***Zambiri***

a. mtu	watu	(Chiswahili)
b. muntu	bantu	(Chinguni, Luganda)
c. munhu	vanhu	(Chishona)
d. munthu	anthu	(Chicheŵa)
e. fupa	mafupa	(Chicheŵa)
f. liupa	maupa	(Ciyawo)

7. Ziyankhulo zambiri za Chibantu zimagwiritsa ntchito mphatikiram'mbuyo 'ku-' popanga mneni wosasintha nthawi.

***Zitsanzo***

a. kuona	(Chicheŵa)
b. kubona	(Chingoni)
c. kuona	(Chiswahili)
d. kubeka	(Chitumbuka)
e. kulola	(Ciyawo)

8. Mayina onse a mu ziyankhulozi amaikidwa mu magulu otchedwa 'Magulu a mayina'.

***Zitsanzo***

Munthu

***Dzina***

***Gulu***

***Chiyankhulo***

a. munthu	Mu-, A- (Ŵa-)	(Chicheŵa)
b. mundu	Ju-, (Ŵa-)	(Ciyawo)
c. muntu	Mu-, Ba-	(Chibemba, Luganda)
d. mtu	M-, Wa-	(Chiswahili)

9. Pali lamulo wamba lopangira mneni wokhala ndi agwirizanitsi komanso aphantikiri ena. Mu lamulolo, agwirizanitsi komanso aphantikiri amaphatikizidwa mwandondomeko ku tsinde la mneni (Mjaya, 2002).

Agwirizanitsi komanso aphantikiriwo amatsatana mwadongosolo motere:

Mphantikiri wamtsutso + mgwirizanitsi wa mwininkhani + mphantikiri wa nthawi + mgwirizanitsi wa pamtherankhani + muzu + chionjezeramneni + lembo lotsiriza lamtsekulanjira.

### ***Zitsanzo***

Sitidzawaimbitsa (Chicheŵa)

Hatutawaimbisha (Chiswahili)

<b>Mgwirizanitsi/mphatikiri/muzu</b>	<b>Chicheŵa</b>	<b>Chiswahili</b>
1. Mphatikiri wamtsutso	si-	ha-
2. Mgwirizanitsi wa mwininkhani	ti-	tu-
3. Mphatikiri wa nthawi	-dza-	-ta-
4. Mgwirizanitsi wa pamtherankhani	-wa-	-wa-
5. Muzu	imb-	imb-
6. Chionjezeramneni	-its-	-ish-
7. Lembo lotsiriza lamtsekulanjira	-a	-a

Ziyankhulo za Chibantu zimafanana mu njira zambiri. Mfundo zili pamwambapazi ndi zitsanzo zochepa chabe.



### **Ntchito**

1. Kodi Chibantu ndi chiyani ?
2. Tsimikizani kuti Chicheŵa ndi chiyankhulo cha Chibantu popereka mfundo zisanu ndipo pa mfundo iliyonse mulembe chitsanzo chanuchanu chimodzi.

3. Ndi chifukwa chiyani pali kusiyana pakati pa mawu a ziyankhulo za Chibantu (monga m'katchulidwe ndi matanthauzo) ngakhale kuti kholo lawo lidali limodzi kalekalelo?

## | MUTU 2 |

### DZINA



### Kuganiza mozama

1. Tchulani mawu oitanira zinthu zomwe mukuziona pa zithunzi zili pamwambapa.
2. Kodi mawu otchulira zinthu ndi ofunika bwanji pa moyo watsiku ndi tsiku?
3. Kodi mawu mwatchulawo ndi a chiyankhulo chanji? Tsimikizirani yankho lanu.

Mawu wotchulira chinthu amatchedwa dzina. Dzina ndi mawu omwe timagwiritsa ntchito poitanira kapena potchulira chinthu kapena ganizo lililonse.

### *Zitsanzo*

Naphiri  
Lachitatu  
Namalenga  
Zomba  
Chitumbuka

ulesi  
khamu  
njinga  
amayi  
phunziro

dambo  
manyazi  
nsima  
malungo  
chilungamo

kuvina  
tiana  
ufulu  
chilengedwe  
mitolo

## Mitundu ya mayina

Mu chiyankhulo cha Chicheŵa mayina amaikidwa mu mitundu yaikulu iŵiri molingana ndi chikhalidwe chawo. Mitunduyo ndi iyi: dzina lamwinimwini ndi dzina lopanda mwinimwini.

### 1. Dzina lamwinimwini

Ili ndi dzina la chinthu chapachokha (chosawanda).

Zitsanzo za mayina amwinimwini ndi monga mayina a anthu, mitundu kapena mafuko a anthu, misewu, nyanja, mitsinje, maiko, maboma, midzi, malo, mizinda, masiku, miyezi, Mulungu, mapiri, zigwa, milatho, ufumu, kampani, zinthu zina zopangidwa m'fakitale, zipembedzo, ziyankhulo, nyuzipepala, magulu, zipani, mabungwe komanso mayina a mitu ya nyimbo, ndakatulo, nthano ndi nkhani.

Polembe mayinaŵa, timayamba ndi lembo lalikulu.

#### ***Zitsanzo***

Kanyenda	Malaŵi	Mahewu	Namalenga
Mngoni	Kazuni	Zomba	Manyasa
Shire	Sapitwa	Chitonga	Likuni Phala
Januwale	Kazinga	Lachitatu	Chikhirisitu
Domasi	Mpamba	Nthondo	Fuko

### 2. Dzina lopanda mwinimwini

Ili ndi dzina lotchulira zinthu zowanda (zopezekaponse).

Polembe mayinaŵa, timayamba ndi lembo laling'ono, pokhapokha ngati mayinawo akuyamba chiganizo kapena pamene ndi mitu monga mitu ya nyimbo, ndakatulo ndi nkhani ndiye timaŵayamba ndi lembo lalikulu.

#### ***Zitsanzo***

galu	mchenga	udzudzu	chambo
unyinji	denga	fisi	ludzu



khasu	chulu	ufulu	mfumu
magazi	uchembere	mwezi	matenda
nyengo	msonkho	tsiku	chipembedzo

Dzina lopanda mwinimwini limaikidwa m’mitundu yakeyake. Mitunduyo ndi yotsatirayi.

a. Dzina la chinthu chokhudzika

Ili ndi dzina la chinthu chowanda chomwe timatha kuchiona, kuchimva ndi makutu kapena ndi thupi kapenanso m’mphuno kapena kuchikhudza kapenanso kuchiyeza.

### ***Zitsanzo***

mpweya	nyesi	mfuwu	mphepo
nyenyezi	chivomezi	mphenzi	bingu
utsi	chinyezi	litsiro	chigumula
nthuzi	mdima	liwu	utawaleza
mtambo	chifundizi	thambo	fungo

b. Dzina la chinthu chosakhudzika

Ili ndi dzina la chinthu chowanda chomwe sitingathe kuchiona kapena kuchikhudza. Dzinali ndi la zinthu za’maganizo chabe ndipo kawirikawiri timangoona zotsatira zake.

### ***Zitsanzo***

ulemerero	mwano	ufulu	nsanje
changu	khama	nkhanza	chikondi
dumbo	nsanje	mtendere	maloto
mpumulo	chilungamo	maganizo	chibaza
mantha	nthumanzi	kudekha	ubwenzi

c. Dzina la unyinji

Ili ndi dzina la zinthu zowanda zomwe zili pagulu lawo la zinthu zofanana.

### ***Zitsanzo***

1. M'nyumbamu muli mzukutu wa makoswe.
2. Banja lawo ndi laulemu.
3. Ndagula mtolo wa nkhu.
4. Kumsika kuli unyanji wa anthu.
5. Bongololo sadzolera mafuta pa mzinda.
6. Limana lawo ndi logwirizana.
7. Iye wasenza mkoko wa nthochi.
8. Maliya akubusa msambi wa nkhusa.
9. Mwana watenga phava la nthochi.
10. Apo pali mulu wa miyala.
11. Tidaona mzingo wa njati ku Liwonde.
12. Ubise chikwanje pa phata la nzimbe.
13. Uja ndi mpingo wa opembedza.
14. Andipatsa bere la nthochi.
15. Paja pali khwimbi la anthu.
16. Ili ndi gulu la Edzi Toto.
17. Atenga mpukutu wa mapepala.
18. Ndaona mdipiti wa galimoto za mfumu.
19. Chipani chawo chapambana chisankho.
20. Ili ndi bungwe la amayi.

d. Dzina dzina lamphukira (lachibale)

Dzina lamphukira (dzina lachibale) ndi limodzi mwa mayina ambiri opangidwa kuchokera ku muzu kapena tsinde limodzi la mawu. Mayinaŵa amaimira maganizo osiyana kapena zinthu zosiyana ngakhale kuti kholo lawo (muzu kapena tsinde) ndi limodzi.

### ***Zitsanzo***

***Tsinde***

***Mayina amphukira***

***Tsinde***

***Mayina amphukira***

<b>-gwa</b>	chigwa gwero mgwetsa	<b>-kulu</b>	mkulu likulu ukulu
<b>-dya</b>	chakudya madyerero madyo	<b>-tatu</b>	Utatu Lachitatu mtatu
<b>lima</b>	ndime dima mlimi ulimi	<b>yenda</b>	ulendo mlendo mwendo
<b>tuma</b>	mtumwi nthumwi mtumiki utumiki	<b>lira</b>	mliri maliro chiliro maliralira
<b>taya</b>	nthayo mtaya mataya chitayo	<b>kodza</b>	mkodzo likodzo nkhodzo chikhodzodzo

### ***Chenjezo***

Mayina otchulira abale (monga bambo, mayi ndi mlongo) si mayina amphukira (achibale) monga mnene ena alembi ena amalemba mu mabuku awo a malamulo a chiyankhulo.

Mudzaphunzira zambiri zokhudza mayina achibale (mayina amphukira) mu gawo la kapangidwe ka mayina.

### **Ntchito za mayina**

Mayina akakhala m'ziganizo amagwira ntchito zosiyanasiyana monga izi:

1. Kukhala mchitantchito (mwininkhani)

Pamene dzina lichita kanthu limatchedwa ‘mchitantchito’ (mwininkhani).

***Zitsanzo***

- a. Malunga wagwira mbala.
- b. Nankhoma akuyendetsa galimoto.
- c. Bambo ndi mayi anga akucheza.

2. Kukhala mchitidwantchito (pamtherankhani)

Pamene dzina lichitidwa kanthu limatchedwa ‘mchitidwantchito’ (pamtherankhani).

***Zitsanzo***

- a. Mwana walumidwa ndi udzudzu.
- b. Chikondi wamugulira mwana wake nzimbe.
- c. Mnyamata wasenza mtsuko.

Pali mtundu iwiri ya mchitidwantchito:

***a. Mchitidwantchito wachindunji***

Ili ndi dzina lomwe lachitidwa kanthu mwatchutchutchu ndipo ntchito imathera mwachindunji pa dzinali.

***Zitsanzo***

- i. Kondwani wandilemba kalata.
- ii. Msipu wobiriwira udapha mbuzi.
- iii. Galu wapha bakha.

***b. Mchitidwantchito wopanda chindunji***

Ili ndi dzina lomwe lachitiridwa kapena lalandira kanthu.

***Zitsanzo***

- i. Anyamata awatungira agogo madzi.

- ii. Ife tamuimbira mtsogoleri wathu nyimbo.
- iii. Amayi aikhwirizira mbava agalu.

3. Kukhala dzina lolandirira kanthu

Ili ndi dzina lomwe lachitiridwa kanthu ndi mchitantchito. Dzina lolandira kanthu ndi mchitidwantchito wopanda chindunji.

***Zitsanzo***

- a. Adzukululu aŵaputira agogo nkondo.
- b. Malani wamulembera Joni kalata.
- c. Amayi aŵaphera alendo nkuku.

4. Kukhala dzina lapadera

Ili ndi dzina lomwe limatha kufotokoza za khalidwe, ntchito kapena mtundu wa dzina linzake.

***Zitsanzo***

- a. Zunguze, chigaŵenga, wathaŵa.
- b. Ndamuona Lusungu, namwino.
- c. Amboga, mlonda, ndi wamphamvu.

5. Kukhala dzina loitanira

Ili ndi dzina lomwe timagwiritsa ntchito poitana wina.

***Zitsanzo***

- a. Masasa, thaŵa galu angakulume.
- b. Wachake! Wachake! Gwira insayo.
- c. Bwera kaye kuno, Tsala.

6. Kukhala mtsirizitsi

Ili ndi dzina lomwe limatsiriza ganizo la mneni, maka aneni odalira komanso aneni othandizira. Mudzaphunzira zambiri za aneniŵa pa mutu wa mneni.

***Zitsanzo***

- a. Zwide ndi Mngoni.
- b. Najere si mphunzitsi.
- c. Kamuzu anali mkango.

7. Kukhala msonyamalo

Ili ndi dzina lomwe limasonyeza komwe ntchito yachitikira.

***Zitsanzo***

- a. Kumunda kwaŵirira.
- b. Patsala paja pagona chinziri.
- c. M'mudzi mwathu muli ufulu.

***Chenjezo***

Msonyamalo kuti akhale dzina ayenera kugwira ntchito ngati dzina osati ngati muonjezi wa malo. Mudzaphunzira za muonjezi wa malo pa mutu wa muonjezi.

8. Kukhala mchitidwantchito wa mperekezi

Dzina limatchedwa mchitidwantchito wa mperekezi ngati litsatidwa ndi mperekezi.

***Zitsanzo***

- a. Ndinapita kuchipatala ndi mwana.
- b. Kakhwesi amachokera ku Nkhotakota.
- c. Kumudzi kwa Chinangwa kwagwa chilala.

Dzina likakhala mchitidwantchito wa mperekezi limagwira ntchito zosiyanasiyana mu ziganizo monga zotsatirazi.

*a. Kukhala dzina la umwini*

Ili ndi dzina lomwe ndi mwini chinthu.

***Zitsanzo***

- i. Izi ndi ng'ombe za mfumu.
- ii. Apawo ndi mizu ya kachere.
- iii. Phazi la Joni latupa.

*b. Kukhala dzina lochitira kanthu*

Ili ndi dzina la chida, chiŵiya kapena chipangizo chogwiritsa ntchito pochita kanthu.

**Zitsanzo**

- i. Usanditengere ku mtoso ngati njoka.
- ii. Wapalira moto pa khasu.
- iii. Kaombe wamenya mwana ndi mkwapulo.

*c. Kukhala dzina la malo*

Ili ndi dzina la malo omwe ntchito yachitikira.

**Zitsanzo**

- i. Pa Domwe padachitika zoopsa.
- ii. Ine ndimakhala ku Domasi.
- iii. Sindingasokere mu Lilongwe.

## **Kapangidwe ka mayina**

Pali njira zosiyanasiyana zopangira mayina mu Chicheŵa. Mayina ambiri amachita kupangidwa potsata njira zotsatira.

1. Kuchokera ku masinde opangira mayina  
Potsata njirayi, aphantikiram'mbuyo osiyanasiyana amaphatikizidwa ku masinde othandiza kupanga mayina.

**Zitsanzo**

a. chi-	ku	-nthu	(chinthu)
b. zi-	ku	-nthu	(zinthu)
c. mu-	ku	-nthu	(munthu)
d. a-	ku	-nthu	(anthu)
e. m-	ku	-tengo	(mtengo)
f. mi-	ku	-tengo	(mitengo)

g. mu-	ku	-dzi	(mudzi)
h. mi-	ku	-dzi	(midzi)
i. mwa-	ku	-na	(mwana)
j. a-	ku	-na	(ana)
k. dzi-	ku	-no	(dzino)
l. ma-	ku	-no	(mano)

2. Kuchokera ku masinde enieni a mfotokozi

Potsata njirayi, aphantikiram'mbuyo osiyanasiyana amaphatikizidwa ku masinde enieni a mfotokozi aŵa: -kazi, -muna, -ng'ono, -kulu, -fupi, -tali, -ŵisi ndi kali.

***Zitsanzo***

a. m-	ku	-kazi	(mkazi)
b. a-	ku	-kazi	(akazi)
c. mwa-	ku	-muna	(mwamuna)
d. cha-	ku	-muna	(chamuna)
e. m-	ku	-kulu	(mkulu)
f. li-	ku	-kulu	(likulu)
g. m-	ku	-ng'ono	(mng'ono)
h. u-	ku	-ng'ono	(ung'ono)
i. u-	ku	-fupi	(ufupi)
j. li-	ku	-fupi	(lifupi)
k. u-	ku	-tali	(utali)
l. li-	ku	-tali	(litali)
m. chi-	ku	-ŵisi	(chiŵisi)
n. u-	ku	-ŵisi	(uŵisi)
o. u-	ku	-kali	(ukali)

3. Kuchokera ku mayina ena

Potsata njirayi, aphantikiram'mbuyo osiyanasiyana amaphatikizidwa ku mayina ena opangidwa kale.

***Zitsanzo***



a. u-	ku	munthu	(umunthu)
b. chi-	ku	mwana	(chimwana)
c. cha-	ku	mlomo	(chamlomo)
d. ma-	ku	ndevu	(mandevu)
e. m-	ku	Malaŵi	(Mmalaŵi)
f. a-	ku	Malaŵi	(Amalaŵi)
g. ka-	ku	litsiro	(kalitsiro)
h. ka-	ku	liŵende	(kaliŵende)
i. ku-	ku	mitu	(kumitu)
j. tsa-	ku	bwalo	(tsabwalo)

#### 4. Kugwiritsa ntchito njira ya mtembenuzo

Potsata njira ya mtembenuzo, mawu amtundu wina amangosinthidwa mtundu ndi ntchito yake n’kukhala dzina, koma kalembedwe kake sikasintha. Nthawi zina katchulidwe ka mawu opangidwawo kamatha kusintha. Mawuwo ndi mawu achibale (mawu amphukira) chifukwa tsinde lawo ndi limodzi.

#### ***Zitsanzo***

a. gogoda	(mneni)	gogoda	(dzina)
b. thangata	(mneni)	thangata	(dzina)
c. sefa	(mneni)	sefa	(dzina)
d. wakuba	(mfotokozi)	wakuba	(dzina)
e. zokoma	(mfotokozi)	zokoma	(dzina)
f. lachitatu	(mfotokozi)	Lachitatu	(dzina)
g. chinunu	(muonjezi)	chinunu	(dzina)
h. dzulo	(muonjezi)	dzulo	(dzina)
i. patapata	(mvekero)	patapata	(dzina)
j. lende	(mvekero)	lende	(dzina)
k. psololo	(mvekero)	psololo	(dzina)
l. laŵi	(mvekero)	laŵi	(dzina)

Mawu amatanthauzo angapo monga ‘mtengo’, ‘changa’, ‘chitete’, ‘nyenje’ ndi ‘chikuku’ asasokonezedwe ndi njirayi chifukwa sadapangidwe motere. Mawuŵa ndi ongofanana m’kalembedwe chabe koma sanachokere pa tsinde limodzi.

5. Kuphatiza aphantikiram’mbuyo osiyanasiyana ku masinde a aneni

***Zitsanzo***

a.	im-	ku	-fa	(imfa)
b.	chi-	ku	-gwa	(chigwa)
c.	u-	ku	londa	(ulonda)
d.	m-	ku	mera	(mmera)
e.	ma-	ku	mina	(mamina)

6. Kusintha lembo ‘a’ lotsiriza la mneni kuti likhale ‘e’, kapena ‘i’ kapenanso ‘o’

***Zitsanzo***

a.	gwiriza	gwiriz-	(gwirize)
b.	gogomola	gogomol-	(gogomole)
c.	biba	bib-	(bibi)
d.	shisha	shish-	(shishi)
e.	funsa	funs-	(funso)
f.	lamula	lamul-	(lamulo)

7. Kuphatikiza aphantikiram’mbuyo osiyanasiyana ku aneni ndi kusintha lembo ‘a’ lotsiriza la mneni kuti likhale ‘e’, ‘i’ kapena ‘o’

***Zitsanzo***

a.	ka-	zonda	zond-	(kazonde)
b.	u-	phunzitsa	phunzits-	(uphunzitsi)
c.	m-	lima	lim-	(mlimi)
d.	chi-	tseka	tsek-	(chitseko)

e. m- bereka berek- (mbereko)

8. Kuphatikiza aphantikiram'mbuyo osiyanasiyana ku aonjezi

***Zitsanzo***

a.	u-	bwino	ubwino
b.	u-	kale	ukale
c.	chi-	kale	chikale
d.	cha-	lero	chalero
e.	bwa-	lero	bwalero

9. Kuphatikiza aphantikiram'mbuyo osiyanasiyana ku mvekero

***Zitsanzo***

a.	m-	gugu	mgugu
b.	m-	didi	mdidi
c.	m-	tswatswa	mtswatswa
d.	ma-	laŵi	malaŵi
e.	chi-	phwafu	chiphwafu

10. Kuphatikiza mitundu ingapo ya mawu

Mitundu ingapo ya mawu imaphatikizidwa n'kupanga dzina limodzi potsata njira monga zotsatirazi:

a. Kuphatikiza mayina aŵiri

***Zitsanzo***

i.	njoka	luzi	njokaluzi
ii.	mwana	bere	mwanabere
iii.	utaka	fumbi	utakafumbi
iv.	mwini	mphale	mwini mphale
v.	ng'ona	ntondo	ng'onamtongo

b. Kuphatikiza mneni ndi mloŵam'malo

***Zitsanzo***

i.	konda (mneni)	ine (mloŵam'malo)	kondaine (dzina)
ii.	funda (mneni)	wekha (mloŵam'malo)	fundawekha (dzina)
iii.	samba (mneni)	zako (mloŵam'malo)	simbazako (dzina)

c. Kuphatikiza aphantikiram'mbuyo osiyanasiyana ku aneni omwe amaphatikizidwa ndi mayina

***Zitsanzo***

i.	chi-	-pha	dzuŵa	(chiphadzuŵa)
ii.	m-	komba	phala	(mkombaphala)
iii.	ka-	lavula	gaga	(kalavulagaga)
iv.	m-	taya	khasu	(mtayakhasa)
v.	ka-	siya	goli	(kasiyagoli)

**11. Kubwerekera ku ziyankhulo zina**

Chicheŵa chili ndi mayina ambiri obwerekera kuchokera ku ziyankhulo zina chifukwa chokhala limodzi ndi anthu amitundu ina.

Pamene tibwerekera mawu, tizionetsetsa kuti mawuwo akutenga chikhalidwe cha mawu a Chicheŵa kuti agwirizane ndi malamulo a kapangidwe, kalembedwe ndi katchulidwe ka mawu a Chicheŵa.

Mayina otsatira adabwerekedwa kuchokera ku Chipwitikizi.

kachasu	zenera	kapitawo	zenera
malinyero	fodya	bulu	kavalo

Mayina otsatira adabwerekedwa kuchokera ku Chiswahili.

mkanda	ndege	bwana
mswachi	mzungu	futali

Mayina otsatira adabwerekedwa kuchokera ku Chishona.

gomo	chingwa	malasha
bota	dondo	muti

Mayina otsatira adabwerekedwa kuchokera ku Chiafirikanzi.

chikepe	gombeza	bacha
buluku	komichi	duku

Mu Chicheŵa muli mayina ambiri omwe tidabwereka kuchokera ku Chingerezi ndipo zitsanzo zili m'munsimu ndi zochepe chabe:

chidole	langwani	mandasi	chioda	kabati
nderema	hule	kanema	beni	kompyuta
sawatcha	dansi	thaulo	uvuni	mbigwani
chitofu	kapu	makina	mpopi	ferempani
makina	chilesi	mtchini	kabati	wezulo
sangweji	lapukeni	pulanga	bauti	poto
galasi	nangula	washala	chisikiro	joko

## Magulu a mayina

Mayina amaikidwa mu magulu osiyanasiyana molingana ndi chikhalidwe chawo.

Tingazindikire gulu lomwe dzina lilimo pogwiritsa ntchito mphatikiram'mbuyo wosonyeza chimodzi ndi mphatikiram'mbuyo wosonyeza zambiri. Titha kugwiritsanso ntchito agwirizanitsi osonyeza chimodzi ndi zambiri.

### *Zitsanzo*

#### 1. Aphatikiram'mbuyo

<i>Chimodzi</i>	<i>Zambiri</i>	<i>Gulu</i>
munthu	anthu	Mu-, A-
chinthu	zinthu	Chi-, Zi-

#### 2. Agwirizanitsi

***Ziganizo***Mbuzi ikudya msipu. (chimodzi)Mbuzi zikudya msipu. (zambiri)***Gulu***

I-, Zi-

I-, Zi-

Magulu a mayina mu Chicheŵa ali motere:

**1. MU-, A-**

Ili ndi gulu la mayina ambiri a anthu, nyama, mbalame, udindo ndi zinthu zina. Kaŵirikaŵiri mayinaŵa amayamba ndi mphatikiram'mbuyo 'mu-' kapena 'm-' kapenanso 'mw-' mu chimodzi ndipo amayamba ndi mphatikiram'mbuyo 'a-' mu zambiri.

***Zitsanzo******Chimodzi***

munthu

mbusa

mdzukulu

mpongozi

mtsikana

mmisiri

mwana

mwamuna

mwiyo

mwiri

***Zambiri***

anthu

abusa

adzukulu

apongozi

atsikana

amisiri

ana

amuna

amwiyo

amwiri

***Chimodzi***

muphwa

msimbi

mnansi

mphaka

mkamwini

mndolozi

mwanabere

msutu

mzamba

mzungu

***Zambiri***

aphwa

asimbi

anansi

amphaka

akamwini

andolozi

anabere

asutu

azamba

azungu

Pali mayina ena am'gululi omwe sayamba ndi mphatikiram'mbuyo 'mu-' kapena 'm-', kapenanso 'mw-' mu chimodzi koma amayamba ndi mphatikiram'mbuyo 'a-' mu zambiri.

Mwachidule tinene kuti mayina onse omwe amayamba mphatikiram'mbuyo 'a-' mu zambiri ali mu gululi.

***Zitsanzo***

Chimodzi

Zambiri

Chimodzi

Zambiri

buluzi	abuluzi	phungu	aphungu
gang'a	agang' a	chule	achule
psololo	apsololo	dzoole	adzoole
dundu	adundu	galu	agalu
jerera	ajerera	lumbe	alumbe
bongololo	abongololo	fulu	afulu
kabaŵi	akabaŵi	kazitape	akazitape
kalungusese	akalungusese	katumba	akatumba
namwino	anamwino	phungu	aphungu
sakwi	asakwi	these	athese

## 2. MU-, MI-

Ili ndi gulu la mayina omwe kaŵirikaŵiri amayamba ndi mphatikiram'mbuyo 'mu-' kapena 'm-' mu chimodzi ndipo amayamba ndi mphatikiram'mbuyo 'mi-' mu zambiri.

### *Zitsanzo*

<i>Chimodzi</i>	<i>Zambiri</i>	<i>Chimodzi</i>	<i>Zambiri</i>
mkate	mikate	mpando	mipando
mzinga	mizinga	mdzedze	midzedze
mleme	mileme	mkono	mikono
mkeka	mikeka	munga	minga
mulungu	milungu	musi	misi
muzu	mizu	mutu	mitu
mpala	mipala	mkwamba	mikwamba
mwezi	miyezi	mwambi	miyambi
mudzi	midzi	mwendo	miyendo
mlamba	milamba	mzere	mizere

Pali mayina ena a mu gulu lomweli omwe saonetsa kuti ali mu chimodzi kapena mu zambiri (ngakhale kuti anthu ena amachulukitsa mayina molakwitsa pogwiritsa ntchito mphatikiram'mbuyo 'mi-').

### ***Zitsanzo***

mkonono	mchenga	mkodzo	mkalo
moto	mpweya	mtedza	mpovu
mwavi	mseru	mpola	mtchetcha
mpunga	mchere	mwayi	mtapasha
mkalo	mkaka	mtudzu	mwazi

### **3. U-, MA-**

Mayina ambiri a muguli ndi makhalidwe, audindo ndi ntchito zomwe anthu amagwira. Ndi mayina ochepa kwambiri a mu gululi omwe amayamba ndi mphatikiram'mbuyo 'u-' mu chimodzi komabe amayamba ndi mphatikiram'mbuyo 'ma-' mu zambiri.

### ***Zitsanzo***

<b><i>Chimodzi</i></b>	<b><i>Zambiri</i></b>	<b><i>Chimodzi</i></b>	<b><i>Zambiri</i></b>
uta	mauta	utso	mautso
una	mauna	ulalo	maulalo
ula	maula	ulendo	maulendo
ukonde	maukonde	uthenga	mauthenga

### ***Kumbutso***

Mayina onse omwe amayamba ndi lembo lamtsekulanjira 'u-' ali m'gulu lomweli. Mayina ambiri a m'gululi saonetsa kuti ali mu chimodzi kapena mu zambiri chifukwa sachulutsidwa pogwiritsa ntchito mphatikiram'mbuyo wooneka.

### ***Zitsanzo***



udzu	ufulu	ukhondo	utomoni
ufa	ude	utoto	usemwe
ulere	ulesi	utaka	ubwino
udzudzu	ukali	ulimbo	utsi
ubweya	uchi	utyopi	upandu

#### **4. I-, ZI-**

Mayina onse a m'gululi saonetsa kuti ali mu chimodzi kapena mu zambiri. Mayinawa akakhala mu chimodzi timaŵaloza pogwiritsa ntchito mlozi 'iyi' pamene akakhala mu zambiri timaŵaloza pogwiritsa ntchito mlozi 'izi'.

Mayina ambiri a mu gululi amayamba ndi maphatikizo amtsekanjira monga aŵa: mb-, mf-, mph-, n-, ns-, ny-, nth-, ntch-, ng-, ng'-, nkh-, nd-, nkhw- ndi nz- (Nankwenya, 1992).

##### ***Zitsanzo***

mphiri	sefa	zeŵe	swanda
mimba	nolo	nthomba	nsalu
mfumu	nemba	nkhadze	nkhwidzi
mfuti	mvula	mvutuko	ndolo
nsapato	ng'amba	sansi	mbimbi
ng'ombe	nyimbo	mphutsi	nyengo
nzimbe	nkhasi	mphere	ndale

##### ***Kumbutso***

Ndi mayina ochepa kwambiri a mu gululi omwe amayamba ndi lembo lamtsekula njira 'i'. Zitsanzo za mayinawo ndi izi: 'imbwa', 'imvi', 'imphe', 'ise', 'insa', 'inswa' ndi 'impso'.

#### **5. CHI-, ZI-**

Mayina a m’gululi amayamba ndi phatikizo lamtsekanjira ‘ch-’ ponena za chimodzi ndipo amayamba ndi lembo lamtsekanjira ‘z-’ mu zambiri.

***Zitsanzo***

<b><i>Chimodzi</i></b>	<b><i>Zambiri</i></b>	<b><i>Chimodzi</i></b>	<b><i>Zambiri</i></b>
chambo	zambo	chala	zala
chatso	zatso	chawe	zawe
chavu	zavu	chaka	zaka
cheke	zeke	chengo	zengo
chenya	zenya	chete	zete
chezi	zezi	cheyo	zeyo
chilimba	zilimba	chibo	zibo
chibanzi	zibanzi	chibakera	zibakera
chiboda	ziboda	chiwaya	ziwaya
chola	zola	chombo	zombo
chopi	zopi	chumba	zumba
chumbu	zumbu	chulu	zulu

Pali mayina ena a mu gululi omwe saonetsa kuti ali mu chimodzi kapena mu zambiri. Ambiri mwa mayinaŵa ndi monga mayina achikhalidwe, aziyankhulo ndi azipembedzo.

***Zitsanzo***

chiyero	chinyamata	chajira	Chicheŵa
chambu	chabuka	chilungamo	Chingoni
changu	chimanga	chikale	Chikhirisitu

Mayina omwe amapangidwa pogwiritsa ntchito mphatikiram’mbuyo ‘chi-’ pofuna kunyoza kapena kukulitsa zinthu alinso mu gulu lomweli.

***Zitsanzo***

chimbale	chimudzi	chimwana	chinyumba
----------	----------	----------	-----------

chinthu	chidiso	chigalu	chimbanu
chimunthu	chidziko	chimsewu	chimphuno

## 6. LI-, MA-

Ndi mayina ochepa a mu gululi omwe amayamba ndi lembo lamtsekanjira ‘l’ mu chimodzi ndipo amayamba ndi mphatikiram’mbuyo ‘ma-’ mu zambiri.

### *Zitsanzo*

<i>Chimodzi</i>	<i>Zambiri</i>	<i>Chimodzi</i>	<i>Zambiri</i>
lamba	malamba	lamulo	malamulo
lalanje	malalanje	laŵi	malaŵi
lata	malata	lembo	malembo
lirime	malirime	libanda	malibanda
litchowa	malitchowa	liunde	maliunde
liswazi	maliswazi	lipopo	malipopo
liwu	maliwu	lifalo	malifalo
loto	maloto	lodi	malodi
lichero	malichero	lunje	malunje
lumo	malumo	luso	maluso

Mayina ambiri a mu gululi amayamba ndi maphatikizo amtsekanjira monga otsatira: b-, d, dz-, f-, g-, gw-, h-, j-, kh-, p-, -ph-, ts- tch-, th- ndi v- komabe mu zambiri amayamba ndi mphatikiram’mbuyo ‘ma-’ (Nankwenya, 1992).

### *Zitsanzo*

<i>Chimodzi</i>	<i>Zambiri</i>	<i>Chimodzi</i>	<i>Zambiri</i>
badza	mabadza	bere	maŵere
boma	maboma	bungwe	mabungwe
dambo	madambo	dambwe	madambwe
diŵa	maliŵa	dzira	mazira
fano	mafano	falansa	mafalansa
fulufute	mafulufute	fuwa	mafuwa
gawo	magawo	goŵero	magowero

gwati	magwati	gwero	magwero
hema	mahema	hule	mahule
jalo	majalo	jeke	majeke
joko	majoko	juzi	majuzi
khala	makala	kholo	makolo
pombo	mapombo	phasa	mapasa
phesi	mapesi	phinde	maphinde
khosi	makosi	khutu	makutu
tchika	machika	tchimo	machimo
tchingo	machingo	tchotchololo	matchotchololo
thabwa	matabwa	thenga	mathenga
thole	matole	thuza	matuza
tsamba	masamba	tsekera	masekera
tsinde	masinde	tsoka	masoka
vimbo	mavimbo	vuto	mavuto
vuwo	mavuwo	vwende	mavwende

Akatswiri azaziyanikhulo amakhulupirira kuti kalelo mayina a Chicheŵa ambiri a gululi ankayamba ndi lembo lamtsekanjira ‘l’ chifukwa mayina anzawo a m’ziyanikhulo zina za Chibantu, monga Ciyawo, akuyambabe ndi lembo ‘l’ mpaka lero.

### ***Zitsanzo***

<b><i>Chicheŵa</i></b>	<b><i>Ciyawo</i></b>
fungo	liungo
dimba	litimbe
dazi	lulasi
khosi	lukosi

Pali mayina ambiri a m’gululi omwe amayamba ndi ‘ma’ koma sasonyeza kuti ali mu chimodzi kapena mu zambiri.

### ***Zitsanzo***

manyazi	malodza	malungo	mafinya	madzi	mapira
mapeto	malonda	mafuta	makata	mawu	masanje
mala	mamba	mame	maale	maseŵe	masano
madyo	majiga	malire	manda	malovu	mang’a
mantha	manthova	mayere	mavuvu	mazizi	matsire

## 7. KA-, TI-

Mayina a m’gululi amayamba ndi mphatikiram’mbuyo ‘ka-’ mu chimodzi ndipo amayamba ndi mphatikiram’mbuyo ‘ti-’ mu zambiri. Aphantikiram’mbuyo ‘ka-’ ndi ‘ti-’ a mayina a m’gululi amasonyeza kuchepetsa zinthu (‘ka-’ mu chimodzi ndipo ‘ti-’ mu zambiri).

### *Zitsanzo*

<i>Chimodzi</i>	<i>Zambiri</i>	<i>Chimodzi</i>	<i>Zambiri</i>
kamunthu	tianthu	kamphaka	tiamphaka
kamuzu	timizu	kamwana	tiana
kanthu	tinthu	kaphiri	timapiri
kakafula	tiakafula	kamudzi	timidzi
kambuzi	timbuzi	kachingwe	tizingwe
kadiso	timaso	kalamulo	timalamulo

Pamene tifuna kuika mu zambiri dzina la mu gululi, mpofunika kuchulukitsa kaye dzinalo (ngati limachulukitsidwa pogwiritsa ntchito mphatikiram’mbuyo) osati kungogwiritsa ntchito mphatikiram’mbuyo ‘ti-’ yekha basi.

### *Zitsanzo*

<i>Chimodzi</i>	<i>Zambiri</i>	
kagalu	tiagalu	(osati ‘tigalu’)
kamudzi	timidzi	(osati ‘timudzi’)
kachulu	tizulu	(osati ‘tichulu’)

kadzino	timano	(osati ‘tidzino’)
kachingwe	tizingwe	(osati ‘tichingwe’)

Mayina ena a mu gulu la LI-, MA- omwe saonetsa kuti ali mu chimodzi kapena mu zambiri amatheka kukhala a gululi mu zambiri zokha pamene mphatikiram’mbuyo ‘ti-’ waphatikizidwa ku mayinawo.

### ***Zitsanzo***

timalodza	timafinya	timadzi	timapira	timalonda
timafuta	timawu	timasanje	timamba	timame
timaseŵe	timalire	timalovu	timanthova	timaye

### ***Chenjezo***

Pali mayina ena omwe amayamba ndi phatikizo ‘ka’ kapena ‘ti’ mu chimodzi koma si a m’gululi chifukwa ‘ka’ kapena ‘ti’ yemwe amayamba naye si mphatikiram’mbuyo wohepetsa. Choncho si bwino kungoganiza mwachizolowezi kuti mayina oyamba ndi ‘ka’ kapena ‘ti’ ali m’gululi.

### ***Zitsanzo***

kalonga	kapulosi	kandunde	kapolo	kasoze
kazembe	kalata	kanyimbi	kasupe	kabudula
tiyi	timba	tirigu	timba	tikwi

## **8. ‘KU-’ KU MNENI**

Ili ndi gulu la mayina omwe adapangidwa pophatikiza mphatikiram’mbuyo ‘ku-’ ku tsinde la mnene.

### ***Zitsanzo***

kufa	kuvina	kuvina	kuthamanga	kulima
kudza	kuphika	kusuta	kuseka	kutsekula
kumva	kupherera	kuyenda	kuyendayenda	kuthandiza
kugwa	kuvala	kulera	kupemphera	kupalira
kupha	kulota	kufuntha	kutsanzika	kuphunzira

## 9. Msonyamalo

Ili ndi gulu la mayina osonyeza malo omwe amapangidwa pophatikiza aphantikiram'mbuyo osonyeza malo 'ku-', 'pa-' ndi 'mu-' ku mayina ena.

Gululi limagaŵidwa mu mitundu yakeyake itatu molingana ndi aphantikiram'mbuyo opanga mayina. Mitunduyo ili motere :

### a. Msonyamalo Ku-

Ili ndi gulu la mayina osonyeza malo omwe amapangidwa pophatikiza mphantikiram'mbuyo wosonyeza malo 'ku-' ku mayina ena.

#### *Zitsanzo*

kumunda	kumadzi	kubwalo
kumudzi	kutchire	kunyanja
kumutu	kudimba	kumadzi

### b. Msonyamalo Pa-

Ili ndi gulu la mayina osonyeza malo omwe amapangidwa pophatikiza mphantikiram'mbuyo wosonyeza malo 'pa-' ku mayina ena.

#### *Zitsanzo*

pakhomo	pamwendo	pachulu
pambali	patsoḡolo	pambuyo
padenga	pamtsetse	pamoto

### c. Msonyamalo Mu-

Ili ndi gulu la mayina osonyeza malo omwe amapangidwa pophatikiza mphantikiram'mbuyo wosonyeza malo 'mu-' (lembo lamtsekulanjira 'u' limachotsedwa) ku mayina ena.

#### *Zitsanzo*

m'kamwa	m'magazi	m'nyumba
m'mtengo	m'tchire	m'thupi
m'phanga	m'dzenje	m'chipanda

## Ntchito

1. Tchulani mitundu yaikulu iŵiri ya mayina ndipo pa mtundu uliwonse mupereke zitsanzo zitatu.
2. Tchulani mitundu ina iliyonse itatu ya mayina opanda mwinimwini ndipo pa mtundu uliwonse mupereke zitsanzo zitatu.
3. Kodi mayina omwe ali ndi mzere kungsi kwawo mu ziganizo zotsatirazi akugwira ntchito zanzi?
  - a. Gwaba, bweru kuno.
  - b. Mwana uja safuna kutsutsika.
  - c. Thumba la tambe amasula ndi tambe amene.
4. Perekani chitsanzo chimodzi (m'chiganizo chimodzi) cha:
  - a. Mchitidwantchito wa chindunji.
  - b. Mchitidwantchito wopanda chindunji.
5. Perekani zitsanzo zitatu za mayina amphukira (achibale) ndipo mufotokoze momveka bwino  
momwe mayinawo adapangidwira.
6. Tchulani njira ziŵiri zodziŵira gulu la dzina mu Chicheŵa. Pa njira iliyonse, perekani zitsanzo  
ziŵiri zotsimikizira yankho lanu.
7. Perekani zifukwa ziŵiri zotsimikizira kuti mayina 'khate' ndi 'lirime' ali mu gulu la Li-, Ma-.
8. Kodi agwirizanitsi omwe ali ndi mzere kungsi kwawo mu ziganizo zotsatirazi akugwirizana ndi  
mayina a mu magulu ati?
  - a. Chati deru chaopsa mlenje.
  - b. Aumwa asanadye chilichonse.
  - c. Ziliko n'kulinga utatosa kudzenjeko.
9. Perekani zitsanzo za mayina omwe ali mu magulu otsatira (mayina atatu pa gulu lililonse).
  - a. Mu-, A-



b. Ka-, Ti-

c. Chi-, Zi-

10. Kodi mayina otsatira ali mu magulu ati a mayina?

kundende	nyambo	khoka
mkaka	cheyo	patsanja
kusangalala	mneni	umasiye

11. Kodi mayina otsatira akanakhala a Chicheŵa, mukanaŵaika mu magulu ati a mayina?

Perekani

zifukwa zomwe muknachitira tero.

utandi	lizwe	mboga
chimiti	mphangwa	nkosi
jalawe	lesa	mtoto

12. Fotokozani momveka bwino momwe mayina ali m'munsimu adapangidwira

mkazi	ukapolo	chizimalupsa
mudzi	mkumbaleza	Malaŵi
loŵe	kamwana	chibale
chipere	mwanamphepo	msemamitondo

14. Lembani njira zinayi zoonetsa mmene mayina opanda mwinimwini amapangidwira kuchokera

ku mitundu ina ya mawu ndipo pa njira iliyonse mupereke zitsanzo zitatu.

15. Pangani mayina kuchokera ku aneni otsatiraŵa: londa, fupa, piringidza, dula ndi zika.

16. Pangani mayina asanu pogwiritsa ntchito njira ya mtembenuzo.

17. Perekani zitsanzo za mayina omwe chiyankhulo cha Chicheŵa chidabwereka kuchokera ku

ziyankhulo zotsatirazi (zitsanzo zitatu pa chiyankhulo chilichonse): Chingerezi,

Chipwitikizi

ndi Chiswahili.



## MLOWAM'MALO



### Kuganiza mozama

1. Fotokozani zomwe zikuchitika pa chithunzi chili pamwambapa.

2. Kodi zochitika zomwe mwafotokozazo zimachitika chifukwa chiyani?

Mloŵam'malo ndi mawu omwe amaima kapena amalowa m'malo mwa dzina.

### ***Chitsanzo***

1. Dalitso ndi mtsikana ndipo Dalitso amakonda kuvina.

M'chitsanzochi dzina loti 'Dalitso' labwerezedwa ndipo tittha kusiya lobwerezedwalo polemba mawu woti 'iye' kuti aloŵe m'malo mwake motere:

2. Dalitso ndi mtsikana ndipo iye amakonda kuvina.

Mawu woti 'iye' m'chiganizo (2) ndi mloŵam'malo chifukwa aima m'malo mwa dzina, 'Dalitso'.

### **Mitundu ya aloŵam'malo**

Pali mitundu yosiyanasiyana ya aloŵam'malo ndipo ili motere:

1. Mloŵam'malo wa dzina lakelake

Uyu ndi mloŵam'malo yemwe amaimira woyankhula kapena womvetsera kapenanso wonenedwa (wokambidwa). Mloŵam'malo wa dzina lakelake ali ndi mitundu yakeyake itatu yotsatirayi:

a. *Mloŵam'malo wa kalozamwini*

Uyu ndi mloŵam'malo woimira woyankhula kapena oyankhula. Munthu akamayankhula, amadziloza yekha ndi chala chamkombaphala. Kuteroko n'kuloza mwini.

### ***Zitsanzo***

i. Kodi mukunena ine?

ii. Ife tipita ku Sani.

Aloŵam'malo a kalozamwini alipo aŵiri: 'ine' ndi 'ife'.

b. *Mloŵam'malo wa kalozamnzako*

Uyu ndi mloŵam'malo woimira amene akumvetsera zomwe wina akunena. Mloŵam'maloyu amalozedwa ndi yemwe akuyankhula naye.

***Zitsanzo***

- i. Iwe sumva kamodzi.
- ii. Ndikuyankhula ndi inu.

Aloŵam'malo a kalozamnzako alipo aŵiri: 'iwe' ndi 'inu'.

c. *Mloŵam'malo wa kalozawina*

Uyu ndi mloŵam'malo woimira amene akunenedwa (okambidwa).

***Zitsanzo***

- i. Iye amadzikonda kwambiri.
- ii. Taŵaona iwo akudya nzimbe.

Aloŵam'malo a kalozawina alipo aŵiri: iye ndi iwo.

2. *Mloŵam'malo wa umwini*

Mloŵam'malo wa umwini ndi mawu wokamba zaumwini ndipo amapangidwa kuchokera ku masinde aumwini.

***Zitsanzo***

- a. Wanga wabwera dzulo.
- b. Ndationa tanu tikudya msipu.
- c. Lathu lapezeka.
- d. Icho ndi chako.
- e. Zanga zili paphiri.

3. *Mloŵam'malo wamgwirizano*

Uyu ndi mloŵam'malo yemwe amapangidwa kuchokera ku masinde omwe amasonyeza mgwirizano: '-mene' kapena '-mwe' ndi '-tere'.

***Zitsanzo***

- a. Amene akufuna, abwere.
- b. Atenga chomwe anakuuza.
- c. Sindifuna kuona zotere.

4. Mloŵam'malo woloza

Mloŵam'malo uyu ndi mawu omwe amagwiritsidwa ntchito poloza ndipo amapangidwa kuchokera ku masinde oloza.

Aloŵam'malo ena oloza amachokera ku mawu ena molingana ndi gulu la dzina lomwe mloŵam'maloyo akuimira.

***Zitsanzo***

- a. Paja pali msipu wabwino.
- b. Ndipatse ichi osati icho.
- c. Ndikufuna ako kabisala apo.

5. Mloŵam'malo wodzichitira

Uyu ndi mloŵam'malo woimira yemwe wagwira ntchito, ndipo ntchitoyo imamubwerera woichitayo. Mloŵam'malo wodzichitira amapangidwa kuchokera kutsinde '-kha'.

Tingamuzindikire mloŵam'maloyu chifukwa mnene wake amakhala ndi mphatikiri '-dzi-'.

***Zitsanzo***

- a. Wadzimenya yekha.
- b. Musandifunse ine, mudzifunse nokha.
- c. Udzimvere wekha.

6. Mloŵam'malo wotsimikiza (wotsindika)

Uyu ndi mloŵam'malo yemwe amatsimikiza (amatsindika) zomwe mloŵam'malo wina wachita kapena wachitiridwa. Mloŵam'malo wotsimikiza amatsatidwa ndi mloŵam'malo yemwe wachita kapena wachitidwa kanthu.

Mloŵam'malo wotsimikiza amatheka kupangidwa kuchokera ku masinde monga '-mene' kapena '-mwe' ndi '-ni'.

***Zitsanzo***

- a. Iwe amene sungandimenye.
- b. Ndi iye yemwe waba ndalamazo.
- c. Ine ndemwe ndaonana ndi bwana.
- d. Iye mwini wandifunsa funsolo.

7. Mloŵam'malo wofunsa

Uyu ndi mloŵam'malo yemwe amagwiritsidwa ntchito pofunsa ndipo amapangidwa kuchokera ku masinde ofunsa otsatira: '-ti', '-tani', '-ngati' ndi 'yani'.

***Zitsanzo***

- a. Mwatenga ziti?
- b. Ukufuna zotani?
- c. Ndi wotani waba nkhuu zanu?
- d. Abwera angati?
- e. Ndi wayani akubwera apo?

8. Mloŵam'malo wochuluka

Uyu ndi mloŵam'malo wosonyeza kuchuluka kwa zinthu.

Mloŵam'maloyu ali ndi mitundu yakeyake itatu:

a. Mloŵam'malo woŵerenga

Mloŵam'maloyu amapangidwa kuchokera ku masinde a maŵerengo '-modzi', '-ŵiri', 'tatu', '-nayi' ndi '-sanu'.

***Zitsanzo***

- i. Ndadya ziŵiri zokha.
- ii. Mundigulireko zitatatu.
- iii. Asanu apulumuka pangosi.

b. Mloŵam'malo wogaŵa

Uyu ndi mloŵam'malo yemwe ndi mawu opangidwa kuchokera ku 'masinde' aŵiri '-li' ndi '-nse'. Mloŵam'malo wopangidwayo amalembedwa mophatikiza ngati mawu amodzi.

### ***Zitsanzo***

- i. Aliyense ndi mnzanga m'nyumbamo.
- ii. Kalikonse kali ndi nthawi.
- iii. Mutha kundipatsa chilichonse.

#### **c. Mloŵam'malo wopatula**

Mloŵam'maloyu ndi mawu omwe amapangidwa kuchokera ku masinde '-chepa', '-ngapo', '-mbiri', '-na' ndi '-nse' ndipo amakamba za zinthu zomwe zili pagulu.

### ***Zitsanzo***

- i. Ndigaŵireniko zochepa zokha.
- ii. Angapo abwera kale.
- iii. Ambiri tikondwera mwa Yesu.
- iv. Wina wafika kale.
- v. Udye zonse.

## **Ntchito za aloŵam'malo**

Aloŵam'malo amaima m'malo mwa dzina choncho amagwira ntchito zosiyanasiyana zomwe mayina amagwira m'ziganizo. Aloŵam'malo amagwira ntchito zotsatirazi:

#### **1. Kukhala mchitantchito (mwininkhani)**

Pamene mloŵam'malo wachita ntchito amatchedwa mchitantchito.

### ***Zitsanzo***

- a. Iwe wakomba mafuta anga.
- b. Ine ndimakonda mtendere.
- c. Atatu alephera mayeso.
- d. Wanga wabwera.
- e. Uja wapambana mpikisano.

#### **2. Kukhala mchitidwantchito (pamtherankhani)**

Pamene mloŵam'malo wachitidwa ntchito, amatchedwa mchitidwantchito.



***Zitsanzo***

- a. Ife tamuona iye lero.
- b. Iye amakonda icho.
- c. Ine ndamugulira iye malaya.

Aloŵam'malo amchitidwantchito alipo a mitundu itatu iyi: mchitidwantchito wachindunji, mchitidwantchito wopanda chindunji komanso mchitidwantchito wa mperekezi.

- a. Kukhala mchitidwantchito (pamtherankhani) wachindunji

Mloŵam'malo amakhala mchitidwantchito wachindunji ngati ntchito ya mneni yathera kapena yachitikira pa iye.

***Zitsanzo***

- i. Malita wagula izi.
- ii. Chilipaine adatenga zanga.

- b. Kukhala mchitidwantchito (pamtherankhani) wopanda chindunji

Mloŵam'malo amakhala mchitidwantchito wopanda chindunji ngati ntchito ya mneni siidachitikire pa iye molunjika koma mloŵam'maloyo amangokhudzidwa chabe ndi ntchito.

***Zitsanzo***

- i. Mnzanga adamugulira iye zovala.
- ii. Takuphikirani inu nyamayi.

Mloŵam'malo 'iye' sakukhudzidwa mwachindunji poti ntchito yogula idathera mwachindunji pa 'zovala'. Chimodzimodzi mloŵam'malo 'inu' sakukhudzidwa mwachindunji poti ntchito yophika idathera mwachindunji pa 'nyama'.

- c. Kukhala mchitidwantchito (pamtherankhani) wa mperekezi

Mloŵam'malo amakhala mchitidwantchito wa mperekezi ngati atsatidwa ndi mperekezi.

***Zitsanzo***

- i. Bwerani kwa ine, ananu.
  - ii. Ndakumana ndi iye kuchitsime.
3. Kukhala mtsirizitsi wa mneni  
Mloŵam'malo amakhala mtsirizitsi wa mneni pamene akutsiriza ganizo la mneni wodalira amene akakhala payekha satha, kupereka ganizo lomveka.

***Zitsanzo***

- a. Ndi uja wakhala pansi.
- b. Si ine mlendo kuno.

Mu chiganizo choyamba mloŵam'malo 'uja' akutsirizitsa ganizo la mneni 'ndi' yemwe sangaima payekha kuti apereke ganizo lomveka. Chimodzimodzi mloŵam'malo 'ine' mu chiganizo chachiwiri akutsiriza ganizo la mneni 'si' yemwe payekha sangapereke ganizo lomveka.

4. Kuitanira  
Mloŵam'malo amagwira ntchito yoitanira pamene akuitana wina.

***Zitsanzo***

- a. Inu, bwerani pano.
- b. Katunge madzi m'mtsuko, iwe.

5. Kukhala mawu ochitira kanthu  
Uyu ndi mloŵam'malo amene waima m'malo mwa chida, chiwiya kapena chipangizo chogwiritsidwa ntchito pochita kanthu.

***Zitsanzo***

- a. Mwale wamenya mwana ndi ichi.
- b. Iye adzabwera pa yanga.

## Ntchito


1. Kodi ‘mloŵam’ malo’ ndi chiyani?
2. Tchulani mitundu itatu ya mloŵam’ malo wa dzina lakelake.
3. Tchulani mitundu isanu iliyonse ya aloŵam’ malo ndipo pa mtundu uliwonse mupereke chitsanzo chimodzi m’chiganizo.
4. Longosolani ntchito zisanu za aloŵam’ malo ndipo pa ntchito iliyonse mupereke chitsanzo chimodzi m’chiganizo.
5. Lembani aloŵam’ malo a chimodzi ndi zambiri kuchokera ku masinde ali m’munsimu potsata magulu a mayina.

<i>Gulu la dzina</i>	<i>Tsinde</i>	<i>Mloŵam’ malo</i> (Chimodzi)	<i>Mloŵam’ malo</i> (Zambiri)
Mu-, A-	-nga	wanga	anga
Chi-, Zi-	-mwe	_____	_____
I-, Zi-	-tere	_____	_____
Ka-, Ti-	-nse	_____	_____
U-, Ma-	-tatu	_____	_____
Li-, Ma-	-thu	_____	_____

6. Tchulani ntchito za mloŵam’ malo aliyense yemwe ali ndi mzere kungsi kwake mu ziganizo zotsatira.
  - a. Ine ndadya nsomba lero.
  - b. Mukufuna zingati?
  - c. Icho ndi cha amayi anga.
  - d. Mubweretse kuno zinayi zokha.
  - e. Amene sabwera pano sindimuona.



## MFOTOKOZI



### Kuganiza mozama

1. Tchulani mayina a zinthu zomwe mukuziona pamwambapa.
2. Longosolani momveka bwino kaonekedwe kapena kakhalidwe ka zinthu zomwe mwazitchula mayina mu (1) pofuna kuzisiyanitsa (potengera zomwe mukuziona).
3. Kuchokera pa njira zopangira mayina zosiyanasiyana zomwe munaphunzira, pangani mayina anuanu kuchokera ku mneni 'fotokoza'.

Mfotokozi ndi mawu omwe amatidziwitsa (amafotokoza) zambiri za dzina kapena mloŵam'malo.

### *Chitsanzo*

Mnyamata wamtali wavala malaya wofiira.

M'chitsanzochi, mayina ndi 'mnyamata' ndi 'malaya' ndipo mawu omwe akutifotokozera zambiri za mayinaŵa ndi 'wamtali' ndi 'wofiira.' Choncho 'wamtali' ndi 'wofiira' ndi afotokozi. Mawuŵa akufotokoza zambiri za maonekedwe a 'mnyamata' ndi 'malaya'.

## **Mitundu ya afotokozi**

Afotokozi amaikidwa m'mitundu yosiyanasiyana yotsatirayi:

1. Mfotokozi wa maonekedwe

Mfotokoziyu amanena za maonekedwe a chinthu (mtundu kapena msinkhu). Mfotokoziyu amapangidwa kuchokera ku masinde enieni a mfotokozi, mayina komanso aneni ena.

***Zitsanzo***

- a. Munda wake ndi waukulu.
- b. Ndili ndi mwana wamtali.
- c. Msipu wobiriŵira unapha mbuzi.
- d. Watenga zake zoyera ndi zachikasu.

2. Mfotokozi wa mkhalidwe

Mfotokoziyu amanena za khalidwe la dzina kapena mloŵam'malo. Mfotokoziyu amapangidwa kuchokera ku mayina, aneni, aonjezi ndi mvekero.

***Zitsanzo***

- a. Iwo akumana ndi anthu achifwamba.
- b. Atatu achiwewe aluma mbuzi.
- c. Munthu wakuba sakondedwa.
- d. Ena abwino sakhalitsa padziko.
- e. Kamphepo kayaziyazi kakuwomba.

3. Mfotokozi wa umwini

Uyu ndi mfotokozi yemwe amasonyeza umwini ndipo amapangidwa pophatikiza aphetikiram'mbuyo ku masinde a umwini.

***Zitsanzo***

- a. Uja ndi mwana wanga.

- b. Kuimba kwake kwandisangalatsa.
- c. Galu wako ndi waukali.
- d. Dziko lathu ndi lamtendere.

4. Mfotokozi woloza

Uyu ndi mfotokozi yemwe timagwiritsa ntchito poloza dzina. Afotokozi ena oloza amapangidwa pophatikiza aphantikiram'mbuyo ku masinde oloza n'kupanga alozi.

**Zitsanzo**

- a. Khasu ili ndi la amayi.
- b. Chala ichi chatupa.
- c. Pamudzi pano pali.
- d. Ndamuona mwana uja.

5. Mfotokozi wochuluka

Mfotokozi uyu amasonyeza kuchuluka kwa zinthu. Mfotokozi uyu ali ndi mitundu yakeyake itatu iyi:

- a. Mfotokozi woŵerenga

Mfotokoziyu amaŵerenga mayina kapena aloŵam'malo ndipo amachokera ku masinde a maŵerengo '-modzi', '-ŵiri', '-tatu', '-nayi' ndi '-sanu'.

**Zitsanzo**

- i. Ndadya mbamu ziŵiri.
- ii. Iye watsala madzi amodzi.
- iii. Ana asanu abwera kale.
- iv. Ndikufuna zinthu zitatatu.

- b. Mfotokozi wogaŵa

Mfotokoziyu amakamba za mayina kapena aloŵam'malo omwe ali pagulu pawokhapawokha. Mfotokoziyu amapangidwa kuchokera kutsinde '-li-nse' ndipo amalembedwa ngati mawu amodzi.

**Zitsanzo**

- i. Abwere wina aliyense.
- ii. Nkhuni iliyonse pamtolopo ndi yaiŵisi.
- iii. Mundigawire chimanga chilichonse.

c. Mfotokozi wochuluka wopatula

Mfotokoziyu amakamba za kuchuluka kwa zinthu posafotokoza mwatchutchutchu chiŵerengero chake. Mfotokoziyu amapangidwa kuchokera ku masinde ‘-chepa’, ‘-mbiri’, ‘-ngapo’, ‘-nse’ ndi ‘-na’.

***Zitsanzo***

- i. Ndadya ntchochi zochepa.
- ii. Ana ambiri abwera kale.
- iii. Zinthu zingapo zasoŵa.
- iv. Nkhuku zonse zafa.
- v. Ana ena samva kamodzi.

6. Mfotokozi wa mgwirizano

Mfotokoziyu amapangidwa kuchokera ku masinde a mgwirizano ‘-mene’ ndi ‘-mwe’.

***Zitsanzo***

- a. Munthu amene waba sindinamuone.
- b. Ili ndi buku lomwe ndimafuna.
- c. Ophunzira omwe akhoza mayeso akusangalala.
- d. Undiuze chinthu chimene chikukuvuta.

7. Mfotokozi wofunsa

Mfotokoziyu ndi mawu wofunsira omwe amafuna kudziŵa zambiri za dzina kapena mloŵam’malo. Mfotokoziyu amapangidwa kuchokera ku masinde ofunsira aŵa: ‘-tani’, ‘-ti’, ‘-nji’, ‘-yani’ ndi ‘-ngati’.

***Zitsanzo***

- a. Mwagula nkhuku zingati ku Songani?
- b. Ndi galu wayani waluma mwana?



- c. Aŵa ndi makhalidwe anji?
- d. Kodi iye wagwetsa mtengo uti?
- e. Ukufuna zinthu zotani?

## Kapangidwe ka afotokozi

Mu gawo lino muphunzira njira zopangira afotokozi mu Chicheŵa. Afotokozi amapangidwa pophatikiza aphantikiram'mbuyo ku masinde kapena mawu osiyanasiyana. Njirazo zili motere:

### 1. Pophatikiza aphantikiram'mbuyo ku masinde osiyanasiyana

Potsata njirayi, aphantikiram'mbuyo osiyanasiyana amaphatikizidwa ku masinde osiyanasiyana.

Mawu opangidwawo amayenera kugwiritsidwa ntchito mu ziganizo pokamba zambiri za dzina kuti akhale afotokozi chifukwa akakhala paokha amakhala aloŵam'malo.

#### *Zitsanzo*

- |         |                                     |  |
|---------|-------------------------------------|--|
| a. zi-  | ku tsinde lamaŵerengo monga '-tatu' | (Zinthu <u>zitanu</u> zasoŵa.)         |
| b. a-   | ku tsinde lamaŵerengo monga '-sanu' | (Ana <u>asanu</u> akuseka.)            |
| c. cha- | ku tsinde laumwini monga '-thu'     | (Chinthu <u>chathu</u> chilipo.)       |
| d. wa-  | ku tsinde laumwini monga '-ke'      | (Ndamuona mwana <u>wake</u> .)         |
| e. ka-  | ku tsinde lolozera monga '-ja'      | (Ndifuna kanthu <u>kaja</u> .)         |
| f. i-   | ku tsinde lolozera monga '-no'      | (Akumanga nyumba <u>ino</u> .)         |
| g. li-  | ku tsinde lofunsira monga '-ti'     | (Ukufuna buku <u>liti</u> ?)           |
| h. ko-  | ku tsinde lofunsira monga '-tani'   | (Mwagula kanthu <u>kotani</u> ?)       |
| i. ye-  | ku tsinde laubale monga '-mwe'      | (Agula kapu <u>yomwe</u> umafuna.)     |
| j. li-  | ku tsinde laubale monga '-mene'     | (Ndione khasu <u>limene</u> wagula.)   |
| k. a-   | ku tsinde lopatula monga '-ngapo'   | (Anthu <u>angapo</u> avulala pangozi.) |
| l. e-   | ku tsinde lopatula monga '-na'      | (Amalawi <u>ena</u> alibe mwambo.)     |

### 2. Pophatikiza aphantikiram'mbuyo ku masinde enieni a mfotokozi

Potsata njirayi, aphantikiram’mbuyo amaphatikizo aŵiri osiyanasiyana amaphatikizidwa ku masinde enieni a mfotokozi aŵa: ‘-kazi’, ‘-muna’, ‘-fupi’, ‘-tali’, ‘-ng’ono’, ‘-kulu’, ‘-kali’ ndi ‘-ŵisi’.

***Zitsanzo***

a. wam-	ku	-kazi	(munthu <u>wamkazi</u> )
b. kaka-	ku	-muna	(kamwana <u>kakamuna</u> )
c. zazi-	ku	-fupi	(zovala <u>zazifupi</u> )
d. lali-	ku	-tali	(phiri <u>lalitali</u> )
e. tati-	ku	-ng’ono	(tinthu <u>tating’ono</u> )
f. aa-	ku	-kulu	(malo <u>aakulu</u> )
g. wau-	ku	-kali	(galu <u>waukali</u> )
h. chachi-	ku	-ŵisi	(chipatso <u>chachiŵisi</u> )

3. Pophatikiza aphantikiram’mbuyo osiyanasiyana ku mayina  
Potsata njirayi, aphantikiram’mbuyo osiyanasiyana amaphatikizidwa ku mayina.

***Zitsanzo***

a. wa-	ku	nkhuli	(mwana <u>wankhuli</u> )
b. a-	ku	chitsulo	(mazenera <u>achitsulo</u> )
c. cha-	ku	litsiro	(chinthu <u>chalitsiro</u> )
d. za-	ku	ukhondo	(zovala <u>zaukhondo</u> )
e. ya-	ku	ulesi	(ng’ombe <u>yaulesi</u> )
f. ka-	ka	mwano	(kamwana <u>kamwano</u> )
g. ta-	ku	ulere	(tinthu <u>taulere</u> )
h. la-	ku	mphamvu	(dzanja <u>lamphamvu</u> )

4. Kuchokera ku aneni  
Pofuna kupanga afotokozi kuchokera ku aneni, timaphatikiza aphantikiram’mbuyo osiyanasiyana (molingana ndi agwirizanitsi a mayina) ku aneni osasintha nthawi (omwe amapangidwa pophatikiza mphantikiram’mbuyo ‘ku-’ ku aneni) kenako

aphatikiram'mbuyo 'aku-' amalowererana n'kupanga lembo lamtsekulanjira 'o' (Mtenje, 1986).

***Zitsanzo***

akuyera	<del>aku</del> yera	oyera	(malaya <u>oyera</u> )
chakuipa	ch <del>aku</del> ipa	choipa	(chinthu <u>choipa</u> )
wakumvera	w <del>aku</del> mvera	womvera	(mwana <u>womvera</u> )

Komabe pofuna kuti zinthu zimveke mosavuta, alembi ena amati potsata njirayi timaphatikiza aphantikiram'mbuyo osiyanasiyana ku aneni n'kupanga afotokozi. Iwo amapereka zitsanzo monga izi:

a. wo-	ku	phweka	(wophweka)
b. o-	ku	kongola	(okongola)
c. cho-	ku	vuta	(chovuta)
d. zo-	ku	phika	(zophika)
e. yo-	ku	phweka	(yophweka)
f. ko-	ku	limba	(kolimba)
g. to-	ku	fewa	(tofewa)
h. lo-	ku	pyapyala	(lopyapyala)

5. Pophatikiza aphantikiram'mbuyo osiyanasiyana ku aonjezi

Potsata njirayi, aphantikiram'mbuyo osiyanasiyana amaphatikizidwa ku aonjezi.

***Zitsanzo***

a. wa-	ku	kuno	(munthu <u>wakuno</u> )
b. a-	ku	m'kati	(malaya <u>am'kati</u> )
c. ya-	ku	dzulo	(nkhani <u>yadzulo</u> )
d. la-	ku	panja	(tsache <u>lapanja</u> )
e. ka-	ku	bwino	(kanthu <u>kabwino</u> )
f. ta-	ku	msanga	(tinthu <u>tamsanga</u> )
g. cha-	ku	kale	(chikho <u>chakale</u> )
h. za-	ku	lero	(nyimbo <u>zale</u> ro)

6. Kuphatikiza aphantikiram'mbuyo osiyanasiyana ku mimvekero

Potsata njirayi, aphantikiram'mbuyo osiyanasiyana amaphatikizidwa ku mimvekero.

**Zitsanzo**

a. la-	ku	mbuu	(dothi <u>lambuu</u> )
b. ka-	ku	see	(kathupi <u>kasee</u> )
c. za-	ku	zii	(nkhani <u>zazii</u> )
d. cha-	ku	gwede	(chitsa <u>chagwede</u> )
e. ka-	ku	yeziyezi	(kamphepo <u>kayeziyezi</u> )
f. a-	ku	psuu	(maso <u>apsuu</u> )
g. ya-	ku	noninoni	(nyama <u>yanoninoni</u> )
h. wa-	ku	wofuwofu	(mpando <u>wawofuwofu</u> )

**Kusiyana ndi kufanana kwa mloŵam'malo ndi mfotokozi**

Pali mfundo zingapo zomwe zimasonyeza kusiyana ndi kufananiranako kwa mloŵam'malo ndi mfotokozi. Kusiyana kwa mloŵam'malo ndi mfotokozi ndi koti mloŵam'malo ndi mawu omwe amaima m'malo mwa dzina pamene mfotokozi ndi mawu omwe amakamba zambiri za dzina kapena mloŵam'malo. Pamalo pamene pachotsedwa dzina mpamene mloŵam'malo amakhalapo. Dzina lomwe mloŵam'malo amaimira limachotsedwa ndipo silimaonekanso. Komatu tikamakamba za mfotokozi, dzina limafunika kuti lioneke kuti mfotokoziyo agwire ntchito yake pa dzinalo. Mfotokozi amatha kukambanso zambiri za mloŵam'malo.

**Zitsanzo**

- 1 a. Wanu wabwera dzulo. (mloŵam'malo)  
b. Mwana wanu wabwera dzulo. (mfotokozi)
- 2 a. Ndagula zitat. (mloŵam'malo)  
b. Ndagula mbuzi zitat. (mfotokozi)
- 3 a. Ichi ndi chabwino (mloŵam'malo)  
b. Chingwe ichi ndi chabwino (mfotokozi)

Kufananiranako kwa mloŵam'malo ndi mfotokozi ndi koti mitundu yambiri ya mloŵam'malo ndi yomweyonso ya mfotokozi. Mitunduyo ndi monga yaumwini, yochuluka, yofunsa, yoloza ndi yamgwirizano.

### ***Zitsanzo***

- |  |                            |
|--|----------------------------|
| 1 a. <u>Lathu</u> ndi lokongola.             | (mloŵam'malo waumwini)     |
| b. Dziko <u>lathu</u> ndi lokongola.         | (mfotokozi waumwini)       |
| 2 a. Ndaona <u>asanu</u> .                   | (mloŵam'malo woŵerenga)    |
| b. Ndaona anthu <u>asanu</u> .               | (mfotokozi woŵerenga)      |
| 3 a. Kodi iye wagula <u>zotani</u> ?         | (mloŵam'malo wofunsa)      |
| b. Kodi iye wagula zinthu <u>zotani</u> ?    | (mfotokozi wofunsa)        |
| 4 a. <u>Uyu</u> samva kamodzi.               | (mloŵam'malo woloza)       |
| b. Mnyamata <u>uyu</u> samva kamodzi.        | (mfotokozi woloza)         |
| 5 a. Munthu <u>yemwe</u> wabwera si mnzanga. | (mloŵam'malo wamgwirizano) |
| b. <u>Yemwe</u> wabwera si mnzanga.          | (mfotokozi wamgwirizano)   |

### ***Chenjezo***

Aloŵam'malo a dzina lakelake akatsatana ndi mayina amaoneka ngati afotokozi chifukwa amakhala pamalo pomwe afotokozi amakhala. Aloŵam'malo amenewa amakhalabe aloŵam'malo osati afotokozi.

### ***Kumbutso***

Ena amaganiza kuti dzina likangochotsedwa ndiye kuti nthawi yomweyo mfotokozi (mawu wokamba zambiri za dzinalo) amasanduka dzina kapena mloŵam'malo monga zimakhallira mu Chingerezi. Izi sizili choncho; mfotokoziyo amakhalabe mfotokozi chifukwa Chicheŵa chili ndi khalidwe lotaya mchitantchito kapena mchitidwantchito.

Zitsanzo zabwino za afotokozi otere ndi omwe amapangidwa kuchokera ku mayina, aneni, aonjezi ndi masinde enieni a mfotokozi.

### ***Chitsanzo***

Munthu wakufa sadziŵika.

M’chiganizochi mfotokozi ndi mawu woti ‘wakufa’ chifukwa akukamba zambiri za dzina ‘munthu’. Tikachotsa dzina loti ‘munthu’, titsala ndi mfotokozi ‘wakufa’. Mawu woti ‘wakufa’ akhalabe mfotokozi chifukwa akukamba zambiri za dzina lomwe latayidwa. Mphatikiram’mbuyo ‘wa-’ mu ‘wakufa’ akutsimikiza kuti mawuŵa akukamba za mawu ena omwe ali nawo pamgwirizano ngakhale taŵachotsa.

### ***Zitsanzo zina***

- a. Amoyo salekana.
- b. Wabwino ali kuti?
- c. Wokongola sanyada.
- d. Wachitatu n’kapsule.
- e. Chamuluma ndi chakuda.

### ***Kumbutso***

Munaphunzirapo njira yopangira mayina ya mtembenuzo. Afotokozi ena akagwiritsidwa ntchito nthawi yaitali kwambiri popanda mayina awo, amatha kusanduka mayina kupyolera mu njira ya mtembenuzo.

Afotokozi ena omwe anasanduka mayina kupyolera mu njira ya mtembenuzo ndi monga awa:

chakudya	zovala	oipa	cholinga	cham’mimba
chapakhosi	zovuta	zabwino	zoona	ophunzira
cholembera	chakudza	choyala	chakumwezi	lolembe

### ***Kumbutso***

Afotokozi angapo okamba za dzina limodzi amatha kutsatana mwadongosolo m’chiganizo chimodzi.

### ***Zitsanzo***

1. Mbuzi zakuda zonse zisanu zafa.
2. Mwana wanu wamtali wofatsa uja ndi wamwano.
3. Sindinaonepo galu wamkazi wachizungu wokalamba chonchi.

## **Ntchito**

1. Tchulani mitundu isanu ina iliyonse ya afotokozi ndipo pa mtundu uliwonse mupereke chitsanzo chanuchanu chimodzi m'chiganizo.
2. Fotokozani mwachidule njira zitatu zopangira afotokozi ndipo pa njira iliyonse mupereke chitsanzo chimodzi.
3. Longosolani momwe afotokozi otsatira adapangidwira.
  - a. Mwana wachipongwe walangidwa.
  - b. Galu wakuda wagwidwa ndi fisi.
  - c. Anthu anayi apita kale kumudzi.
  - d. Atsikana amakono ali ndi mwayi wophunzira.
  - e. Nsomba zanga zabedwa.
  - f. Anenazawo wagula nsalu yolimba.
  - g. Aphunzitsi athu amakonda nyimbo zakale.
  - h. Nyerere n'kachilombo kakang'ono.
4. Tchulani mitundu ya afotokozi omwe ali ndi mzere kungsi kwawo mu ziganizo zotsatira.
  - a. Kuthandiza munthu wolumala ndi chinthu chabwino kwambiri.
  - b. Nsalu yanu yasoŵa.
  - c. Galu yemwe amaba nkuku zanga ndi uyu.
  - d. Kumsonkhano kunabwera anthu ambiri.
  - e. Kodi fisi wagwira mbuzi zingati?
7. Fotokozani ngati mawu omwe ali ndi mzere kungsi kwawo mu ziganizo zotsatirazi ndi afotokozi kapena aloŵam'malo. Tsimikizirani mayankho anu popereka zifukwa.
  - a. Khasu lomwe ndimafuna ndi ilo.
  - b. Kodi ana awo alipo angati?
  - c. Amene waba nkuku zanga wagwidwa.
  - d. Ana atatu ndi amene abwera kale.
  - e. Ndi zoonza kuti zake zija zapezeka.
8. Pangani aloŵam'malo ndi afotokozi kuchokera ku masinde ndi mawu otsatira pofuna kuonetsa kusiyana kwa aloŵam'malo ndi afotokozi m'ziganizo.
 

-mene	wanga	ambiri
-ke	chija	atatu
-nji?	wotani	chilichonse





## MNENI



### Kuganiza mozama

1. Fotokozani zinthu zosiyanasiyana zomwe zikuchitika pa chithunzi chili pamwambapa.
2. Kuchokera pa njira zopangira mayina zosiyanasiyana zomwe munaphunzira, pangani mayina anuanu kuchokera ku mneni 'nena'.

Mneni ndi mawu omwe amatidziwitsa zochitika.

### *Chitsanzo*

Galu wanu wakuda uja waluma mbuzi ya eni pamwendo lero masana.

Ngakhale kuti m’chiganizochi muli mawu ambiri, ndi mawu amodzi wokha womwe akunena za zomwe zachitika (ntchito yomwe yagwirika). Mawuwo ndi ‘waluma’ choncho ndi mneni.

## Mitundu ya aneni

Aneni amaikidwa mu mitundu yosiyanasiyana molingana ndi kapangidwe kawo, ntchito zawo kapena chikhalidwe chawo. Mitundu ya aneni ili motere:

### 1. Mneni molingana ndi chiwerengero cha maphatikizo

Potengera chiwerengero cha maphatikizo mu tsinde, aneni amaikidwa mu mitundu yotsatira:

#### a. Mneni wa tsinde la phatikizo limodzi

Mneni wam’mtunduwa amakhala ndi tsinde la phatikizo limodzi.

#### *Zitsanzo*

-ba	-da	-fa
-swa	-tcha	-dza
-tha	-cha	-gwa
-psa	-nya	-kha
-mwa	-phwa	-thwa
-pha	-dya	-mva

Polembe aneni a mtunduwa timayamba ndi chizindikiro cha mdulamawu kumbuyo kwawo pofuna kuonetsa kuti amakhala ndi mphatikiram’mbuyo m’chiganizo.

#### *Zitsanzo m’ziganizo*

- i. Iye waswa mphika. (-swa)
- ii. Kunja kwacha bwino. (-cha)
- iii. Ndatcha msampha. (-tcha)
- iv. Mpira waphwa. (-phwa)
- v. Iye samva kamodzi. (-mva)

#### b. Mneni wa tsinde la maphatikizo awiri

Mneni wa m’mtunduwa amakhala ndi tsinde la maphatikizo awiri.

**Zitsanzo**

lemba (le-mba)	dula (du-la)	vina (vi-na)
funtha (fu-ntha)	soka (so-ka)	chita (chi-ta)
sema (se-ma)	pita (pi-ta)	imba (i-mba)
gwira (gwi-ra)	ona (o-na)	mina (mi-na)

c. Mneni wa tsinde la maphatikizo atatu

Mneni wa m'tunduwu amakhala ndi tsinde la maphatikizo atatu.

**Zitsanzo**

palasa (pa-la-sa)	thandiza (tha-ndi-za)
fukula (fu-ku-la)	tuluka (tu-lu-ka)
lamula (la-mu-la)	thwanima (thwa-ni-ma)
fufuza (fu-fu-za)	yang'ana (ya-ng'a-na)

d. Mneni wa tsinde la maphatikizo anayi

Mneni wa m'tunduwu amakhala ndi tsinde la maphatikizo anayi.

**Zitsanzo**

vuvumala (vu-vu-ma-la)	fotokoza (fo-to-ko-za)
longosola (lo-ngo-so-la)	ganyavula (ga-nya-vu-la)
zindikira (zi-ndi-ki-ra)	palamula (pa-la-mu-la)
tsulukuta (tsu-lu-ku-ta)	yerekeza (ye-re-ke-za)
suzumira (su-zu-mi-ra)	kolopola (ko-lo-po-la)
fafaniza (fa-fa-ni-za)	yembekeza (ye-mbe-ke-za)

2. Mneni woyambukira

Mneni woyambukira amafotokoza za ntchito imene dzina kapena mloŵam'malo wachita m'chiganizo ndipo ntchito ya mneniyu imathera pa chinthu china (dzina kepena mloŵam'malo).

**Zitsanzo**

a. Mwana wamwa mkaka

- b. Iye adagula maungu.
- c. Mphaka wagwira khoswe.
- d. Ine ndalemba kalata.

### 3. Mneni wosayambukira

Mneni wosayambukira amafotokoza za ntchito imene dzina kapena mloŵam'malo wachita m'chiganizo koma ntchitoyo sithera pa wina. Mneni wosayambukira sakhala ndi mchitidwantchito.

#### ***Zitsanzo***

- a. Mbuzi yake yafa dzulo usiku.
- b. Tayamika akupita kusukulu.
- c. Mtsikana akuyenda pang'onopang'ono.
- d. Iye wasangalala kwambiri.

Mchitidwantchito yekhayo yemwe mneni wosayambukira angathe kukhala naye ndi yemwe amatchedwa 'mchitidwantchito wachibale'. Mchitidwantchito wachibale ndi dzina lomwe limapangidwa kuchokera ku mneni wosayambukirayo m'chiganizo. Komabe ntchito ya mneni wosayambukirayo simakathera pa mchitidwantchito wachibaleyo.

Zitsanzo za achitidwantchito achibale ndi monga izi:

- 1. Yesu anafa imfa yomvetsa chisoni.
- 2. Paulendowo tinagona chigono chimodzi.
- 3. Inu mwaseka nseko yogwa nayo.

#### ***Kumbutso***

Mu Chicheŵa muli aneni ena omwe amatheka kukhala oyambukira komanso osayambukira malinga ndi momwe agwiritsidwira ntchito m'ziganizo. Ngati ntchito ikuthera pa wina ndiye kuti mneniyo ndi woyambukira koma ngati sikuthera pa wina ndiye kuti mneniyo ndi wosayambukira.

#### ***Zitsanzo***

*-tha*

- a. Nkhani ija yatha bwino. (wosayambukira)

b. Iye watha ndalama zanga. (woyambukira)

kwera

a. Dzuŵa lakwera. (wosayambukira)

b. Mwana wakwera njinga. (woyambukira)

*tentha*

a. Madzi atentha kwambiri. (wosayambukira)

b. Alenje atentha tchire. (woyambukira)

*yenda*

a. Galimoto ija yayamba kuyenda. (wosayambukira)

b. Anyamata akuyenda bawo. (woyambukira)

pweteka

a. Mutu wanga ukupweteka. (wosayambukira)

b. Inu mwandipweteka mkono. (woyambukira)

#### 4. Mneni wothandizira

Mneni wothandizira ndi mneni yemwe amathangata mneni wina kuti apereke tanthauzo lomveka bwino m'chiganizo. Mneni wothandizira ndi '-li'.

##### ***Zitsanzo***

a. Iye anali kuyendetsa galimoto.

b. Ife tili kuphunzira Chicheŵa.

Komabe mneni '-li' amathanso kuima payekha ndipo amapereka ganizo. Mneni wotere si wothandizira.

##### ***Zitsanzo***

a. Ine ndili bwino.

b. Mwanayo sali kuno.

#### 5. Mneni wodalira

Mneni wodalira ndi mneni yemwe saima payekha ndipo amadalira mawu amitundu ina kuti apereke ganizo. Mneniyu ndi waphatikizo limodzi. Kalelo mneni wodalira ankatchedwa kuti ‘mneni wophatikizika’. Pali zitsanzo ziŵiri za mneni wodalira: ‘ndi’ ndi ‘si’.

### ***Zitsanzo***

- a. Edzi ndi matenda osachiritsika.
- b. Ngozi zachilengedwe ndi zoopsa.
- c. Kuderera mkazi si kupambana.
- d. Si bwino kulemba ntchito ana.

## **Nthawi za mneni**

Nthawi ya mneni ndi kakhalidwe ka mneni komwe kamasonyeza nthawi yomwe ntchito inachitika, ichitike kapena idzachitike.

## **Mitundu ya nthawi za aneni**

Mu Chicheŵa muli nthawi za aneni zitatu izi: nthawi yakale, nthawi yatsopano ndi nthawi yam’tsogolo.

### **1. Nthawi yakale**

Nthawiyi imakamba zomwe zinachitika kale. Aphantikiri omwe amasonyeza nthawiyi alipo angapo monga aŵa: ‘-da-’, ‘-nka-’ komanso ‘-na-’.

### ***Zitsanzo***

- a. Tikondwe adamaliza mayeso.
  - b. Ankamukonda chifukwa cha ndalama zake.
  - c. Kalulu adakana kukumba chitsime.
2. Nthawi yatsopano
- Nthawiyi imakamba zochitika tsopano. Aneni ena am’nthawiyi amakhala ndi aphantikiri osonyeza nthawiyi. Aphantikiriwo ndi monga ‘-ku-’ ndi ‘-ma-’.

### ***Zitsanzo***

- a. Tikudya mawungu ochokera kumudzi.

- b. Bwanji agaluwa amauwa kwambiri masana?
- c. Mulungu amatikonda.

Aneni ena am’nthawiyei sakhala ndi aphantikiri osonyeza nthawi.

***Zitsanzo***

- a. Mvula igwa ndithu.
  - b. Chipani chawo chipambana chisankho.
  - c. Abwera usiku uno.
3. Nthawi yam’tsogolo  
Nthawiyei imakamba zodzachitika m’tsogolo. Mphantikiri ‘-dza-’ amasonyeza mnenei yemwe ali m’nthawiyei.

***Zitsanzo***

- a. Sitidzagulitsa nyumbayi.
- b. Ndizidzakuimbirani lamya tsiku lililonse.
- c. Mukafuna, mudzabwera kwathu.

Mitundu itatuyi ya nthawi za anenei ili ndi mitundu yakeyake yomwe imatchedwa kuti ‘athandizanthawi’. Mitunduyo ili motere :

- 3. Nthawi yakale

Nthawi yakale ili ndi athandizanthawi aŵa:

- a. Nthawi yakale yathayi

Nthawiyei imasonyeza kuti pamene ntchito inali kuchitika, ina idali itatha.

***Zitsanzo***

- i. Pamene ankafika, tidali titanyamuka kale.
- ii. Tambala woyamba asanalire, tinali titadzuka.

- b. Nthawi yakale yopitirira

Nthawiyei imasonyeza kuti ntchito yochitika kalelo idali yopitirira.

***Zitsanzo***

- i. Kale mvula idali kugwa mokhulupirika.
- ii. Musanabwere kuno, ndinali kukhala ndekha.

c. Nthawi yakale yathayi yopitirira

Nthawiyi imasonyeza kuti nthawi yakale yathayi idali yopitirira.

***Zitsanzo***

- i. Tidakhala tikuyembekeza alendo tsiku lonse.
- ii. Iye anakhala akundinamiza mpaka ndidazindikira.

d. Nthawi yakale yakaŵirikaŵiri

Nthawiyi imasonyeza kuti ntchito yomwe inkachitika kalelo idali yakaŵirikaŵiri.

***Zitsanzo***

- i. Makolo athu amavala nyanda kalelo.
- ii. Tinkakhala movutika tisanalandire ufulu wodzilamulira.

2. Nthawi yatsopano

Nthawi yatsopano ili ndi athandizanthawi otsatira:

a. Nthawi yatsopano yathayi yopitirira

Nthawiyi imasonyeza kuti ntchito yomwe yathayi inali yopitirira.

***Zitsanzo***

- i. Nthawi yonseyi takhala tikuseŵera mpira.
- ii. Iwo akhala akulima kuchokera mmaŵa.



- b. Nthawi yatsopano yakaŵirikaŵiri

Nthawiyi imasonyeza kuti ntchito imachitika nthawi zonse chifukwa cha chikhalidwe, chilengedwe kapena chizoloŵezi.

***Zitsanzo***

- i. Dziko limazungulira dzuŵa.
- ii. Akuluakulu ndi m'dambo mozimira moto.

- c. Nthawi yatsopano yathayi

Nthawiyi imasonyeza kuti ntchito yachitika ndipo yatha.

***Zitsanzo***

- i. Galu wapha gwape.
- ii. Ife taphunzira Chingerezi.

- d. Nthawi yatsopano yopitirira

Nthawiyi imasonyeza kuti ntchito yomwe ikuchitika tsopano ndi yopitirira.

***Zitsanzo***

- i. Mphepo ikuwomba mwamphamvu.
- ii. Mwana akulira kwambiri.

3. Nthawi yam'tsogolo

Nthawi yam'tsogolo ili ndi athandizanthawi otsatira:

- a. Nthawi yam'tsogolo yathayi

Nthawiyi imasonyeza kuti mmene ntchito ina izidzachitika, ina idzakhala itatha m'tsogolomo.

***Zitsanzo***

- i. Mukamadzafika, iye adzakhala atachoka.
- ii. Chimanga chidzakhala chitauma, mmene uzidzafika.

- b. Nthawi yam'tsogolo yathayi yopitirira  
Nthawiyi imasonyeza kuti pamene ntchito ina idzakhale itachitika, ntchito inzake m'tsogolomo idzakhala yopitirira.

***Zitsanzo***

- i. Ndidzakhala ndikudikira alendo, mukamadzafika.
- ii. Ukamadzagula malata, adzakhala akumangabe nyumbayo.

- d. Nthawi yam'tsogolo yakaŵirikaŵiri  
Nthawiyi imasonyeza kuti ntchito yodzachitika m'tsogolomo idzakhala yopitirira.

***Zitsanzo***

- i. Ndizidzaphunzitsa, ndikadzatsiriza maphunziro anga.
- ii. Akadzabwera, tizidzadyera nyama.

**Kachitidwe ka mnene**

Kachitidwe ka mnene ndi mgwirizano womwe umakhalapo pakati pa mwininkhani (mchitantchito) ndi mnene kapena pamtherankhani (mchitidwantchito) ndi mnene m'chiganizo.

***Zitsanzo***

1. Mwana wadya phala.
2. Phala ladyedwa ndi mwana.

Mu chiganizo (1) muli mgwirizano pakati pa mwininkhani (mchitantchito) 'mwana' ndi mnene 'wadya'. Mwana wagwira ntchito yakudya.

Mu chiganizo (2) muli mgwirizano pakati pa pamtherankhani (mchitidwantchito) 'phala' ndi mnene 'ladyedwa'. Phala lachitidwa kanthu – ladyedwa.

**Mitundu ya kachitidwe ka mnene**

Pali mitundu yaikulu iwiri ya kachitidwe ka mnene.

1. Kachitidwe ka wochita

Pamene dzina kapena mloŵam'malo achita kanthu, mnene wake amakhala m'kachitidwe ka wochita.

**Zitsanzo**

- a. Galu wapha bakha.
- b. Iye akudya chikondamoyo.

2. Kachitidwe ka wochitidwa

Pamene dzina kapena mloŵam'malo achitidwa kanthu, mnene wake amakhala m'kachitidwe ka wochitidwa. Mu chiganizo chomwe chili m'kachitidweka, pamtherankhani (mchitidwantchito) amakhala pomwe panali mwininkhani (mchitantchito).

**Zitsanzo**

- a. Bakha waphedwa ndi galu.
- b. Chikondamoyo chikudyedwa ndi iye.

Kachitidwe ka wochitidwa kali ndi mitundu yakeyake itatu ndipo ili motere: kachitiwe ka wochitidwa poyera, kachitidwe ka wochitidwa m'chibisira ndi kachitidwe ka wochitidwa konyazitsa.

*i. Kachitiwe ka wochitidwa poyera*

Aneni a m'kachitidwe aka amathera ndi mphatikiram'tsogolo wamsintho '-edwa' kapena '-idwa'.

**Zitsanzo**

- 1. Wophunzira wamenyedwa ndi mnzake.
- 2. Tikuphunzitsidwa ndi katswiri.

*ii. Kachitidwe ka wochitidwa m'chibisira*

Aneni a m'kachitidwe aka amathera ndi mphatikiram'tsogolo wamsintho '-eka' kapena '-ika'.

**Zitsanzo**

- 1. Lero nsima yadyeka.
- 2. Nkhwangwa yatayika.

### *iii. Kachitidwe ka wochitidwa konyazitsa*

Aneni a m'kachitidwe aka amathera ndi mphatikiram'tsogolo wamsintho '-ewa' kapena '-iwa'.

#### ***Zitsanzo***

1. Iwo amenyewa.
2. Mbava yapandiwa.
3. Kalulu wazingiwa.

Nthawi zina 'e' kapena 'i' wa mu '-ewa' kapena '-iwa' amachotsedwa n'kukhala ndi '-wa' yekha basi.

#### ***Zitsanzo***

- |              |           |           |
|--------------|-----------|-----------|
| 1. amenyewa  | amenyewa  | amenywa   |
| 2. yapandiwa | yapandiwa | yapandwa  |
| 3. wazingiwa | wazingiwa | wazingiwa |

#### ***Kumbutso***

Muphunzira zambiri za momwe mneni amasinthira kuti akhale wochitidwa pa mutu wa 'Msintho wa aneni'.

### **Kanenedwe ka mneni**

Kanenedwe ka mneni ndi ntchito yomwe mneni amagwira. M'ziganizo aneni amagwira ntchito zosiyanasiyana. Onani zitsanzo zotsatirazi:

1. Ine ndadya nsima.
2. Kodi wapita?
3. Bwera kuno msanga.

Mu chiganizo (1) mneni 'ndadya' akugwira ntchito yofotokoza kapena yodziwitsa.

Mu chiganizo (2) mneni 'wapita' akugwira ntchito yofunsa.

Mu chiganizo (3) mneni 'bwera' akugwira ntchito yolamula.

## Mitundu ya kanenedwe ka mneni

Kanenedwe ka mneni kamagawidwa mu mitundu yaikulu yotsatirayi.

1. Kanenedwe kofotokoza  
Kanenedwe kofotokoza kamatidziwitsa zinthu.

### *Zitsanzo*

- a. Maliya ndi wamphamvu.
- b. Anyamata ndi atsikana akusewera mpira.
- c. Iwo adya nsima yanga.

2. Kanenedwe kolamula  
Aneni a m'kanenedwe aka amagwira ntchito yolamula.

### *Zitsanzo*

- a. Khala chete.
- b. Usacheuke ndingakumenye.
- c. Bwera kuno msanga.

Kanenedwe kolamula kali ndi mitundu yakeyake yotsatirayi.

- a. Kanenedwe kolamula mokakamiza

### *Zitsanzo*

- i. Uzipita kwanu tsopano.
- ii. Muzimwa mankhwalaŵa katatu patsiku.
- iii. Osaloŵa muno popanda chilolezo.

- b. Kanenedwe kolamula mopempha kapena molangiza

### *Zitsanzo*

- i. Akabwera, uwaphikire nsima.
  - ii. Mupemphere musananyamuke.
  - iii. Bagona kunja sikunache.
- c. Kanenedwe kolamula wamba (mwachindunji)

***Zitsanzo***

- i. Bwera kuno.
- ii. Gonani poti kwada.
- iii. Khala pansi.

3. Kanenedwe kachifuniro

Aneni a m'kanenedwe aka amanena za mafuno a mtima, kupempha ndi kupemphera.

***Zitsanzo***

- a. Muuse m'mtendere.
- b. Muyende bwino.
- c. Mulungu akuchitire chifundo.

4. Kanenedwe kapokhapokha.

Aneni a m'kanenedweka amapezeka mu ziganizo zapokhapokha. Aneniwa amasonyeza kuti china chake chinachitika kapena chichitika kapena chidzachitika potsatira ntchito ina.

***Zitsanzo***

- a. Ndikuthandiza ndikapeza ndalama.
- b. Mukaodira, akuyankhani.
- c. Ndidzakuthandiza, ukadzandipempha.

5. Kanenedwe kofunsa

Aneni am'kanenedweka amakhala ofunsa.

***Zitsanzo***

- a. Kodi Mebulo wadya?
- b. Kodi mwabzala mitengo ingati?
- c. Ukufuna chiyani?

6. Kanenedwe ka chifukwa kapena cholinga

Aneni am'kanenedweka amafotokoza chifukwa kapena cholinga chochitira kanthu.

***Zitsanzo***

- a. Ndaphika kuti mudye.
- b. Tiziteteza nthaka kuti isamakokoloke.

c. Ndikuvutika chifukwa sindinaphunzire.

## **Msintho wa aneni**

Msintho wa mneni ndi mneni yemwe amapangidwa pophatikiza mphatikiram'tsogolo wa msintha ku muzu wa mneni.

Kupatula msintha wobwerezwereza, msintha wa mneni umapangidwa pochotsa lembo lamtsekulanjira (lembo laliwu) 'a' lotsiriza la mneni ndipo pamalo pomwe pachotsedwa lembo limenelo pamaikidwa mphatikiram'tsogolo wa msintha.

### ***Chitsanzo***

Bwera

Lembo lamtsekulanjira lotsiriza 'a' likachotsedwa ku tsinde la mneni 'bwera', chomwe chitsale ndi muzu 'bwer-'.

Mphatikiram'tsogolo wina aliyense wa msintha atha kuikidwa pa mpata womwe uli pamuzu.

Mwachitsanzo, titenge mphatikiram'tsogolo wa msintha '-era' ndipo timuike pampatapo.

bwera              bwera              bwer-              bwerera              bwerera

Mneni yemwe wapangidwa, 'bwerera' ali m'msintha.

## **Mitundu ya misintha ya aneni**

Pali mitundu ya misintha ya aneni yotsatirayi.

1. Msintha wochitidwa

Msinthowu umapangidwa pophatikiza aphatikiram'tsogolo '-edwa', '-idwa', '-eka', '-ika', '-ewa', ndi '-iwa' ku mizu ya aneni.

### ***Zitsanzo***

<b><i>Mneni</i></b>	<b><i>Muzu</i></b>	<b><i>Msintha</i></b>	<b><i>Mneni</i></b>	<b><i>Muzu</i></b>
	<b><i>Msintha</i></b>			
menya	meny-	menyed <u>wa</u>	panga	pang-

menya	pangid <u>wa</u> meny-	meny <u>eka</u>	panga	pang-
menya	pang <u>ika</u> meny-	meny <u>ewa</u>	panga	pang-
menya	pangi <u>wa</u> meny-	meny <u>wa</u>	panga	pang-
	pang <u>wa</u>			

Msintho wochitidwa uli ndi mitundu yakeyake itatu:

a. Msintho wochitidwa poyera

Msinthowu umapangidwa pogwiritsa ntchito aphantikiram'tsogolo '-edwa' ndi '-idwa'.

**Zitsanzo**

<b>Mneni</b>	<b>Msintho</b>	<b>Mneni</b>	<b>Msintho</b>
-pha	phedwa	kumba	kumbidwa
-dya	dyedwa	phika	phikidwa
pereka	perekedwa	masula	masulidwa
sokoneza	sokonezedwa	namiza	namizidwa

b. Msintho wam'chibisira

Msinthowu umapangidwa pogwiritsa ntchito aphantikiram'tsogolo '-eka' ndi '-ika'.

**Zitsanzo**

<b>Mneni</b>	<b>Msintho</b>	<b>Mneni</b>	<b>Msintho</b>
-ba	beka	phika	phikika
-pha	pheka	gula	gulika
soka	sokeka	sunga	sungika
zoloŵera	zoloŵereka	ulula	ululika

**Kumbutso**



Aneni ena a masinde amaphatikizo angapo omwe amathera ndi ‘ola’ kapena ‘ula’ amatheka kufupikitsidwa akaikidwa m’msinthe wam’chibisira. Phatikizo ‘le’ kapena ‘li’ la m’mneni wamsinthe limachotsedwa.

***Chitsanzo***

bonthola	bonthol-	bonthole <u>ka</u>	bonthole <u>ka</u>	bonthoka
tukula	tukul-	tukul <u>ika</u>	tukul <u>ika</u>	tukuka

***Zitsanzo zina***

<b><i>Mneni</i></b>	<b><i>Msinthe</i></b>	<b><i>Chifupikitso</i></b>
thyola	thyoleka	thyoka
potola	potoleka	potoka
donyola	donyoleka	donyoka
godola	godoleka	godoka
sosola	sosoleka	sosoka
dula	dulika	duka
fukula	fukulika	fukuka
gulula	gululika	guluka
sasula	sasulika	sasuka
phwafula	phwafulika	phwafuka

c. Msinthe wonyazitsa

Msinthowu umapangidwa pogwirisa ntchito aphantikiram’tsogolo ‘-ewa’ ndi ‘-iwa’.

***Zitsanzo***

<b><i>Mneni</i></b>	<b><i>Msinthe</i></b>	<b><i>Mneni Msinthe</i></b>	
-ba	bewa	panda	pandiwa
-dya	dyewa	mata	matiwa
menya	menyewa	unda	undiwa
ponda	pondewa	zinga	zingiwa

Aneni ena a m'msinhowu omwe ndi amasinde amaphatikizo angapo amatheka kufupikitsidwa. Lembo lamtsekulanjira 'e' kapena 'i' la mu mphatikiram'tsogolo wamsintha '-ewa' kapena '-iwa' limatheka kuchotsedwa.

**Zitsanzo**

<b>Mneni</b>	<b>Msintho</b>		<b>Chifupikitso</b>
peza	pezewa	pez( <b>e</b> )wa	pezwa
menya	menyewa	meny( <b>e</b> )wa	menywa
panga	pangiwa	pang( <b>i</b> )wa	pangwa
manga	mangiwa	mang( <b>i</b> )wa	mangwa
zinga	zingiwa	zing( <b>i</b> )wa	zingwa

2. Msintho womuchitira

Msinthowu umasonyeza kuti wina wagwira ntchito m'malo mwa mnzake. Msinhowu umapangidwa pophatikiza mphatikiram'tsogolo '-era' kapena '-ira' ku muzu wa mneni.

**Zitsanzo**

<b>Mneni</b>	<b>Msintho</b>	<b>Mneni</b>	<b>Msintho</b>
konda	kondera	gula	gulira
lemba	lembera	panga	pangira
tsogola	tsogolera	kazinga	kazingira
lengeza	lengezera	thamanga	thamangira

3. Msintho womuchititsa

Msinthowu umasonyeza kuti wina wamuchititsa mnzake kuti achite kapena kuti achitidwe kanthu. Msinhowu umapangidwa pophatikiza mphatikiram'tsogolo '-etsa' kapena '-itsa' ku muzu wa mneni.

**Zitsanzo**

<b><i>Mneni</i></b>	<b><i>Msintho</i></b>	<b><i>Mneni</i></b>	<b><i>Msintho</i></b>
-dya	dyetsa	manga	mangitsa
-gwa	gwetsa	pungula	pungulitsa
seka	seketsa	funda	funditsa
chenjera	chenjeretsa	thamanga	thamangitsa

#### 4. Msintho wochititsitsa (wotsindika)

Msinthowu umasonyeza kuti wina akugwira ntchito motsindika kapena motsimikiza. Msinthowu umapangidwa pophatikiza mphatikiram'tsogolo '-etsetsa' kapena '-itsitsa' ku muzu wa mneni.

#### ***Zitsanzo***

<b><i>Mneni</i></b>	<b><i>Msintho</i></b>	<b><i>Mneni</i></b>	<b><i>Msintho</i></b>
-mva	mvetsetsa	vuta	vutitsitsa
penya	penyetsetsa	gwira	gwiritsitsa
konda	kondetsetsa	kana	kanitsitsa
tenga	tengetsetsa	sunga	sungitsitsa

#### 5. Msintho wotsutsa

Uwu ndi msintho wamtsutso. Msinthowu umatsutsa ganizo la tsinde la mneni. Msinthowu umapangidwa pogwiritsa ntchito mphatikiram'tsogolo '-ula' ku muzu wa mneni.

#### ***Zitsanzo***

<b><i>Mneni</i></b>	<b><i>Msintho</i></b>	<b><i>Mneni</i></b>	<b><i>Msintho</i></b>
funga	fungula	tseka	tsekula
mata	matula	yala	yalula
funda	fundula	tsirika	tsirikula
chesa	chesula	funya	funyula

#### ***Kumbutso***

Pali aneni ena omwe amagwira ntchito ngati ali m'msinthowu (popeza amathera ndi 'ula' ndipo ntchito yawo imakhala ngati ikutsutsa ganizo la tsinde lake). Akatswiri azaziyanikhulo amakhulupirira kuti kalelo aneni otere anali m'msinthowu koma pano sizioneke motero

chifukwa mphatikiram'tsogolo wamsintho wotsutsa '-ula' anamatirira kutsinde (Mchombo, 2004).

***Zitsanzo***

bandakula	bwevula	budula	bzikula
fisula	fendula	futukula	gabadula
gumula	kakatula	kanula	thulula
tukula	sasula	sandula	ŵalula

***Chenjezo***

Aneni otsutsana matanthauzo, omwe tsinde lawo si limodzi, sali m'msinthowu.

6. Msintho wochitirana

Uwu ndi msintho womwe umasonyeza kuti ochita ntchito akuchita mobwezerana. Mphatikiram'tsogolo '-ana' ndi amene amapanga msinthewu. Mphatikiram'tsogoloyu amaphatikizidwa ku muzu wa mneni.

***Zitsanzo***

<b><i>Mneni</i></b>	<b><i>Msintho</i></b>	<b><i>Mneni</i></b>	<b><i>Msintho</i></b>
-da	dana	konda	kondana
-tha	thana	funa	funana
lemekeza	lemekezana	thandiza	thandizana
sempha	semphana	thaŵa	thaŵana

***Kumbutso***

Pali aneni ena omwe amagwira ntchito ngati ali m'msinthowu (popeza amathera ndi phatikizo 'na' ndipo amasonyeza kuti ntchito ikuchitika mobwezerana). Akatswiri azaziyanikhulo amakhulupiriranso kuti kalelo aneniwo anali m'msinthowu koma pano sizioneka tero chifukwa mphatikiram'tsogolo wamsintho wochitirana '-ana' anakakamira kutsinde (Mchombo, 2004).

### ***Zitsanzo***

kumana	kangana	limbana
pikisana	fana	lingana

### 7. Msintho wobwereza

Msinthowu umasonyeza kuti ntchito ikuchitidwa mobwereza. Ndi msintho wokhawu womwe umapangidwa pongobwereza chabe tsinde lonse la mneni.

### ***Zitsanzo***

<b><i>Mneni</i></b>	<b><i>Msintho</i></b>	<b><i>Mneni</i></b>	<b><i>Msintho</i></b>
sankha	sankhasankha	vina	vinavina
yenda	yendayenda	sinkha	sinkhasinkha
tenga	tengatenga	ponda	pondaponda
tumpha	tumphatumpha	thaŵa	thaŵathaŵa

## **Mgwirizano wa malembo amtsekulanjira m'misintho ya aneni**

Kupatula misintho ya wochitirana, wotsutsa ndi wobwereza, mwaona kuti pa mtundu uliwonse wa msintho pali aphantikiram'tsogolo a msintho aŵiriaŵiri monga aŵa: '-edwa' ndi '-idwa', '-ewa' ndi '-iwa', '-eka' ndi '-ika', '-era' ndi '-ira', '-etsa' ndi '-itsa', komanso '-etsetsa' ndi '-itsitsa'.

Aneni amasinde amaphatikizo angapo amasankha mphantikiram'tsogolo wa msintho woti ayende naye mwadongosolo.

### ***Chitsanzo***

Aneni 'sosola' ndi 'yankhula'.

M'misintho, mneni 'sosola' amakhala 'sosoledwa', 'sosolera' ndi 'sosoletsa' osati 'sosolidwa', 'sosolira' kapena 'sosolitsa'.

M'misintho, mneni 'yankhula' amakhala 'yankhulidwa', 'yankhulira' ndi 'yankhulitsa' osati 'yankhuledwa', 'yankhulera' ndi 'yankhuletsa'.

Zoterezi sizimangochitika mwangozi. Izi zili chonchi chifukwa malembo amtsekulanjira 'a', 'e', 'i', 'o', ndi 'u' amakhala pamgwirizano mu masinde a aneni.

Pali magulu aŵiri a malembo amtsekulanjira. Pali gulu la 'a', 'i' ndi 'u'. Palinso gulu la 'e' ndi 'u'. Kaŵiriŵiri malembo amtsekulanjira m'magulu aŵiriŵa saloŵererana kuti ayenderane. Malembo amtsekulanjira am'gulu limodzi amayenera kuyenda okhaokha (Mtenje mu Mjaya, 2002).

Aphatikiram'tsogolo a misintho ya aneni amatsatira mgwirizanowu. Onani zomwe zikuchitika mu misintho yomwe ili mu tebulo lotsatira. Mukaona bwino, mupeza kuti malembo amtsekulanjira omwe atsekedwa mzere kungsi kwawo akugwirizana ndi a m'gulu lawo.

Gulu la 'a', 'i' ndi 'u'			Gulu la 'e' ndi 'o'		
-idwa	sanduliza	s <u>anduliz</u> idwa	-edwa	pomboneza	p <u>ombonez</u> edwa
-ika	panikiza	p <u>anikiz</u> ika	-eka	sokoneza	s <u>okonez</u> eka
-iwa	tsuka	ts <u>uki</u> iwa	-ewa	soka	s <u>ok</u> ewa
-ira	palamula	p <u>alamul</u> ira	-era	loŵeza	l <u>oŵez</u> era
-itsa	kumbatira	k <u>umbatir</u> itsa	-etsa	koloŵeka	k <u>oloŵek</u> etsa
-itsitsa	sunga	s <u>ungit</u> sitsa	-etsetsa	konda	k <u>ondet</u> setsa

### Chenjezo

Pali aneni ena omwe amaphwanya mgwirizano wa malembo amtsekulanjira mu aneni. Malembo amtsekulanjira a magulu aŵiri aja amatheka kuloŵererana mu aneni enawo. Ena mwa aneniwo ndi monga aŵa:

yepula	lengula	lefula	pepula
phethira	sefukira	sanjika	yetsemula

sereula  
weruza  
bedula

tetekula  
wêrama  
bwevula

fendula  
khetsula  
gwedula

tembenuza  
khethemula  
chenula

## Ntchito

1. Kodi n'chifukwa chiyani 'mneni' amatchedwa 'mneni'?
2. Tchulani mitundu itatu ina iliyonse ya aneni molingana ndi chiwêrengero cha maphatikizo pa tsinde ndipo pa mtundu uliwonse mupereke zitsanzo zitatu.
3. Lembani ziganizo zomveka bwino ndi aneni aŵa: -kha, -li, -gwa, si, ndi
4. Kodi 'mneni woyambukira' amasiyana bwanji ndi 'mneni wosayambukira'? Perekani zitsanzo  
zitatatu m'ziganizo pofuna kuonetsa kusiyanako.
4. Kodi 'mneni wothandizira' amasiyana bwanji ndi 'mneni wodalira'? Perekani zitsanzo  
zitatatu  
mu ziganizo pofuna kuonetsa kusiyanako.
6. Kodi nthawi ya mneni n'chiyani?
7. Kodi 'mthandizanthawi' ndi chiyani?
8. Tchulani mitundu itatu ya nthawi za aneni ndipo pa mtundu uliwonse mupereke chitsanzo chanuchanu chimodzi.
9. Tchulani mitundu ya athandizanthawi omwe ali ndi mzere kungsi kwawo m'zigananizo izi.
  - a. Mvula ibweranso.
  - b. Ndidzapita ku Chilema.
  - c. Ankabwera kuno asanapeze ntchito.
  - d. Mukadadziŵa, simukadabwereza.
  - e. Ife tikuphunzira Chicheŵa.
10. Lembani ziganizo zomwe zili m'nthawi za aneni ndi athandizanthawi otsatira. (Mulembe chiganizo chimodzi pa mtundu uliwonse.)
  - a. Nthawi yakale
  - b. Nthawi yam'tsogolo yathayi

- c. Nthawi yatsopano
  - d. Nthawi yakale yopitiriza
11. Fotokozani momveka bwino mmene mungapangire athandizanthawi otsatira.
- a. Nthawi yopitirira
  - b. Nthawi yakale yathayi
  - c. Nthawi yam'tsogolo yopitirira
  - d. Nthawi yakaŵirikaŵiri
12. Tchulani mitundu iwiri ya kachitidwe ka mnene ndipo pa mtundu uliwonse mupereke zitsanzo
- zitatatu.
13. Tchulani mitundu ya kachitidwe ka anene omwe ali ndi mzere kusi kwawo mu ziganizo izi.
- a. Chingalume akulima.
  - b. Choka! Pita kwanu tsopano.
  - c. Gogoda kachitatu.
  - d. Amayi achekedwa.
  - e. Nyumbayi yamangika mwaluso.
  - f. Avumbwa pochokera kusukulu.
14. Gwiritsani ntchito anene 'peza' ndi 'panga' kuti muonetse mitundu itatu kachitidwe ka wochitidwa.
15. Kodi 'kanenedwe ka mnene' ndi chiyani?
16. Tchulani mitundu itatu ina iliyonse ya kanenedwe ka mnene ndipo pa mtundu uliwonse mupereke chitsanzo chanuchanu chimodzi m'chiganizo.
17. Tchulani mitundu itatu ya kanenedwe kolamula ndipo pa mtundu uliwonse mupereke chitsanzo
- chanuchanu chimodzi m'chiganizo.
18. Tchulani mitundu ya kanenedwe ka anene omwe ali ndi mizere kusi kwawo mu ziganizo izi.
- a. Joni akulira ndi njala.
  - b. Fulumirani kunja kwacha.



- c. Ngozo sangathe kumanga nyumba.
  - d. Asaka usiku wonse kuti apeze nyama.
19. Lembani ziganizo zomwe zili m'mitundu yotsatirayi ya kanenedwe ka aneni.
- a. Kanenedwe kolamula
  - b. Kanenedwe ka chifuniro kopempha
  - c. Kanenedwe kofunsa
20. Kodi 'msintha wa mnani' ndi chiyani?
21. Kodi msintha wa mnani umapangidwa bwanji? Perekani chitsanzo pogwiritsa ntchito mnani
- 'mata' kuti mufotokoze momwe msintha wa mnani umapangidwira.
22. Lembani msintha wotsutsa wa aneni aŵa: tsirika, chesa, funda, tseka ndi mata.
23. Sinthani mnani 'yala' kuti akhale m'misintha yotsatira: msintha wochitirana, msintha wotsutsa,
- msintha wochitidwa m'chibisira, msintha womuchititsa ndi msintha womuchitira.
24. Fotokozani mmene anani amsintha otsatirawa adapangidwira kuchokera ku masinde awo: chitira, pandana, yalula, lembetsa ndi matika.
25. Kodi anani otsutsana matanthauzo ali mu msintha wotsutsa? Tsimikizirani yankho lanu.
26. Kodi mgwirizano wa malembo amtsekulanjira n'chiyani? Perekani chitsanzo chanuchanu chimodzi.



## MUONJEZI



### Kuganiza mozama

1. Fotokozani zomwe zikuchitika pa chithunzi chili pamwambapa.
2. Kodi mu zomwe mwafotokoza mu (1), muli mawu omwe akukamba zambiri za mfotokozi, mneni kapena mawu ena? Tsimikizirani yankho lanu.

3. Kuchokera pa njira zopangira mayina zosiyanasiyana zomwe munaphunzira, pangani mayina anuanu kuchokera ku mnenei ‘onjeza’.

Muonjezi ndi mawu womwe amanena zambiri za mfotokozi, mnenei kapena muonjezi mnzake.

### ***Zitsanzo***

1. Maliya ndi wochenjera moipa.
2. Aphunzitsi athu akwiya kwambiri.
3. Ndabwera lero usiku.

M’chiganizo (1) mfotokozi ndi ‘wochenjera’ ndipo mawu womwe akutiiza zambiri za mfotokoziyu ndi ‘moipa’ choncho ‘moipa’ ndi muonjezi.

M’chiganizo (2) mnenei ndi ‘akwiya’ ndipo mawu womwe akutiiza zambiri za mneneiyu ndi ‘kwambiri’ choncho ‘kwambiri’ ndi muonjezi.

M’chiganizo (3) muonjezi ndi ‘lero’. Mawu womwe akutiiza zambiri zamuonjezi ‘lero’ ndi mawu woti ‘usiku’ choncho ‘usiku’ ndi muonjezi.

### **Mitundu ya aonjezi**

Aonjezi amaikidwa mu mitundu yotsatira:

1. Muonjezi wa mchitidwe

Muonjeziyu amafotokoza za momwe ntchito yachitikira.

Tikafuna kudziwa mmene ntchito yachitikira timafunsa mafunso aŵa: ‘bwanji’ ndi ‘motani’? Mayankho omwe timapeza kuchokera pa mafunsoŵa ndi aonjezi.

*Chitsanzo* : Iye amayenda mothimbwidzika.

*Funso* : Kodi iye amayenda bwanji (motani)?

*Yankho* : mothimbwidzika

Choncho mawu woti ‘mothimbwidzika’ ndi muonjezi

### ***Zitsanzo zina***

- a. Iye tafika bwino.
- b. Anatilandira mwansangala dzulo.

- c. Yohane amaganiza mwachibwana.
- d. Nyembezi amayankhula monyada.
- e. Nkhono imayenda pang'onopang'ono.

2. Muonjezi wa nthawi

Muonjeziyu amafotokoza nthawi yomwe ntchito yachitikira.

### ***Zitsanzo***

- a. Anandigogodera m'bandakucha.
- b. Mubwere kwathu masana.
- c. Makedzana kunali ana opanda mwano.
- d. Sindinamuone chichere.
- e. Makono kwachuluka achifwamba.

Tikafuna kudziwa muonjeziyu, timafunsa funso loti 'nthawi yanji' kapena 'liti'?

3. Muonjezi wa malo

Muonjeziyu amasonyeza komwe ntchito inachitikira.

### ***Zitsanzo***

- a. Ndamuona, ali kuno.
- b. Buluzi ali gone pamwala
- c. Galimoto yagwera m'mtsinje.
- d. Musalowe muno.
- e. Bwera pano, mnzanga.

Tikafuna kudziwa muonjeziyu timafunsa funso lokhala ndi tsinde '-ti'. Funsolo litha kukhala monga 'kuti', 'pati/poti' kapena 'muti'?

4. Muonjezi wa muyeso

Muonjeziyu amapima kuchepa kapena kukula kwa momwe ntchito yachitikira.

### ***Chitsanzo***

Iye wavulala kwambiri pangoziyo.

Ntchito yomwe yachitika m'chiganizochi ndi 'kuvulala'. Mawu womwe akusonyeza muyeso wa kukula kwa kuvulalako ndi 'kwambiri', choncho 'kwambiri' ndi muonjezi wa muyeso.

Muonjezi wa muyeso ali ndi mitundu yakeyake yotsatira:

- a. Wa muyeso wosonyeza kuwerenga  
Muonjeziyu amawerenga kuti ntchito yachitika kangati.

***Zitsanzo***

- i. Wabweranso kachitatu.
- ii. Ndagogoda kaŵiri koma sanandiyankhe.
- iii. Iye amapita kwawo kamodzikamodzi.
- iv. Anagwa kasanu ndi njinga.

- b. Wa muyeso wokulitsa kapena wochepetsa

Muonjeziyu amakulitsa kapena kuchepetsa ntchito yochitika poyamikira kapena kutsimikiza mmene chinthu chilili.

***Zitsanzo***

- i. Iye amandikonda ine zedi.
- ii. Dziko lathu ndi lamtendere kwambiri.
- iii. Wophunzirayo ndi wolimbikira koposa.
- iv. Mutu ukundipweteka pang'ono.

- 5. Muonjezi wofunsa ndi woyankha

Muonjeziyu amagwira ntchito yofunsa kapena yoyankha movomereza, mokana kapena mokayika.

***Zitsanzo***

- a. Ayi, sindimudziŵa.
- b. Mwabwera kodi?
- c. Upita liti kwanu?
- d. Toto, ndakana.
- e. Mwafika bwanji kuno?

**Kapangidwe ka aonjezi**

Aonjezi ena ndi achikhalire pomwe ambiri amachita kupangidwa. Pofuna kupanga aonjezi m' Chicheŵa, timatsata njira monga izi:

1. Kuphatikiza aphantikiram’mbuyo osiyanasiyana ku masinde enieni a mfotokozi

***Zitsanzo***

***Mphatikiri***

pa-  
ku-  
ku-  
mwau-  
mwachi-

***Tsinde***

-ng’ono  
-fupi  
-tali  
-kali  
-kulu

***Muonjezi m’chiganizo***

Ndakhuta pang’ono.  
Timakhala kufupi ndi iye.  
Mvula ili kutali.  
Musayankhule mwaukali.  
Iye amaganiza mwachikulu.

2. Kuphatikiza aphantikiram’mbuyo osiyanasiyana ku mayina

***Zitsanzo***

***Mphatikiri***

mwa-  
pa-  
mu-  
kwa-  
pa-

***Dzina***

nzeru  
tsanja  
madzi  
thunthu  
nsalu

***Muonjezi m’chiganizo***

Iye amayankhula mwanzero.  
Mphika uli patsanja.  
Njoka yaloŵa m’madzi.  
Wagonja kwathunthu.  
Abisa ndalama pansalu.

3. Kuphatikiza mphatikiram’mbuyo ‘mwa-’ ku aonjezi ena achikhalire.

***Zitsanzo***

***Mphatikiri***

mwa-  
mwa-  
mwa-  
mwa-

***Muonjezi***

dala  
chabe  
msanga  
makono

***Muonjezi m’chiganizo***

Inu mwachita izi mwadala.  
Iye amamwa moŵa mwachabe.  
Mwabwera mwamsanga.  
Amavala mwamakono.

4. Kuphatikiza aphantikiram’mbuyo osiyanasiyana ku masinde osonyeza malo

***Zitsanzo***

<i>Mphatikiri</i>	<i>Tsinde</i>	<i>Muonjezi m'chiganizo</i>
pa-	-nsi	Khala <u>pansi</u> .
ku-	-mwamba	Ndayang'ana <u>kumwamba</u> .
pa-	-no	Bwera <u>pano</u> .
ku-	-seri	Tiye <u>kuseri</u> .

5. Kuphatikiza aphantikiram'mbuyo osiyanasiyana ku masinde a maŵerengo

#### *Zitsanzo*

<i>Mphatikiri</i>	<i>Tsinde</i>	<i>Muonjezi m'chiganizo</i>
li-	-modzi	Tiyendera <u>limodzi</u> .
ka-	-tatu	Agogoda <u>katatu</u> .
ka-	-ŵiri	Ndamufunsa <u>kaŵiri</u> .
pa-	-nayi	Nzimbe yathyoka <u>panayi</u> .

6. Kuphatikiza aphantikiram'mbuyo osiyanasiyana ku mvekero.

#### *Zitsanzo*

<i>Mphatikiri</i>	<i>Mvekero</i>	<i>Muonjezi m'chiganizo</i>
cha-	gada	Iwo agwa <u>chagada</u> .
mwa-	dzidzidzi	Mwabwera <u>mwadzidzidzi</u> .
mwa-	pendapenda	Galimoto ikuyenda <u>mwapendapenda</u> .

7. Kuchokera ku aneni

Pofuna kupanga aonjezi kuchokera ku aneni, timaphatikiza mphatikiram'mbuyo 'mwa-' ku mnani wosasintha nthawi (yemwe amapangidwa pophatikiza mphatikiram'mbuyo 'ku-' ku aneni) kenako aphantikiram'mbuyo 'waku-' kapena 'aku-' amalowererana n'kupanga lembo lamtsekulanjira 'o' (Mtenje, 1986).

#### *Zitsanzo*

mwakuipa	m <del>waku</del> ipa	moipa
kwakuopsa	k <del>waku</del> opsa	koopsa
pakuyera	p <del>aku</del> yera	poyera



chakugwada

chaku~~ku~~gwada

chogwada

### ***Chenjezo***

Chifukwa cha kusazindikira kapena pongofuna kuphweketa zinthu, alembi ena amati potsata njirayi timaphatikiza aphantikiram'mbuyo osiyanasiyana ku aneni n'kupanga aonjezi. Izi si zoonza. Alembiwo amapereka zitsanzo monga izi:

***Mphantikiram'mbuyo***

mo-

ko-

po-

cho-

***Mneni***

ipa

opsa

yera

gwada

***Muonjezi***

moipa

koopsa

poiera

chogwada

## **Ntchito**

1. Kodi 'muonjezi' ndi chiyani?
2. Tchulani mitundu itatu ina iliyonse ya aonjezi ndipo mupereke zitsanzo zanzanu zitatu pa mtundu uliwonse.
3. Pangani aonjezi kuchokera ku mawu ndi masinde otsatira:

gona

nyada

ulesi

foka

-kulu

-wiri

chinunu

gulu

zamba

4. Sankhani aonjezi mu ziganizo zotsatira ndipo mutchule mitundu yawo.
  - a. Mbalame ija imalira moopsa.
  - b. Mwanayo abwera madzulo.
  - c. Osadula mitengo kumanda.
  - d. Mwachita bwino kupha nkukuyo.
5. Longosolani momwe aonjezi otsatiraŵa adapangidwira:
  - a. Chikondi sayenda mofulumira akamutuma.
  - b. Msada samayankhula mwaulemu.
  - c. Pusi adagwa chagada.
  - d. Tikakuitana uzivomera mwamsanga.


6. Lembani ziganizo zomveka bwino ndi masinde komanso mawu otsatira ngati aonjezi ndipo mulembe mzere kungsi kwawo:

-modzi	-kulu	yera
-seri	-nja	nong'ona
-tali	mbuyo	mphamvu

7. Fotokozani mmene aonjezi amapangidwira kuchokera ku mitundu ya mawu yotsatira ndipo mupereke chitsanzo chimodzi pa njira iliyonse.

- a. dzina
- b. mfotokozi
- c. mnene
- d. mvekero

## MLUMIKIZI



### Kuganiza mozama

1. Onetsetsani chithunzi chili pamwambapa. Ikani mawu 'ndipo', 'tadya' ndi 'aphika' pa 'a', 'b' ndi 'c' kuti mupange chiganizo chomveka bwino.
2. Fotokozani chiganizo chomwe mwapangacho.
3. Kuchokera pa njira zopangira mayina zosiyanasiyana zomwe munaphunzira, pangani mayina anuanu kuchokera ku mnene 'lumikiza'.

Mlumikizi ndi mawu womwe amagwira ntchito yomangiriza mawu, akapandamneni kapena ziganizo.

### *Zitsanzo*

1. Amayi ndi abambo akucheza.
2. Iwo anabwera koma apita.
3. Ine ndimamukonda ngakhale sandikonda.

Mu chiganizo (1) ‘ndi’ ndi mawu womwe amangiriza mayina ‘amayi’ ndi ‘abambo’ choncho ‘ndi’ ndi mlumikizi.

Mu chiganizo (2) ‘koma’ ndi mawu womwe amangiriza ziganizo ‘Iwo anabwera’ ndi ‘(iwo) apita’ choncho ‘koma’ ndi mlumikizi.

Mu chiganizo (3) ‘ngakhale’ ndi mawu womwe amangiriza ziganizo ‘Ine ndimamukonda’ ndi ‘(iye) sandikonda’ choncho ‘ngakhale’ ndi mlumikizi.

### ***Zitsanzo zina***

1. Iwo akugwirabe ntchito chikhalirecho akudwala.
2. Sakanabwera kuno popanda iwe kumukakamiza.
3. Amayi abwera kuti adzakuone.
4. Iye wayamba kunyada poti walempera.
5. Namilanzi ndi mwana ndipo sadziwa kuyankhula.

### **Mitundu ya alumikizi**

Alumikizi amaikidwa mu mitundu yotsatira.

1. Mlumikizi woluzanitsa (wophatikiza)

Mlumikiziya amaika pamodzi mawu, akapandamneni kapena ziganizo.

### ***Zitsanzo***

- a. Andigulira malaya ndi nsapato.
- b. Jeketeli ndi lopepuka komanso lofunda.
- c. Ine ndadya ndipo ndakhuta.

2. Mlumikizi wopatula

Mlumikiziya amalekanitsa kapena kutayanitsa mawu, akapandamneni kapena ziganizo potsutsa ganizo la mawu olumikizidwawo.

### ***Zitsanzo***

- a. Ndikufuna mpunga osati nsima.
- b. Anayesetsa kulimbikira koma walephera.
- c. Mundipatse ndalama zanga osati chakudya.

3. Mlumikizi wamgwirizano

Mlumikiziyu amayanjanitsa mawu, akapandamneni kapena ziganizo pokamba za chifukwa chochitira kanthu.

***Zitsanzo***

- a. Iye wabwera chifukwa akudwala.
  - b. Poti mwatero, ndipita.
  - c. Sindifunsanso popeza mwandilangiza.
4. Mlumikizi wazotsatira

Mlumikiziyu amaonetsa zolinga kapena zotsatira za ntchito.

***Zitsanzo***

- a. Sankaŵerenga choncho walephera mayeso.
- b. Amamuseka wodwala misala kotero wamumenya.
- c. Pempha kuti akupatse.

**Ntchito za alumikizi**

Alumikizi amagwira ntchito zosiyanasiyana m'ziganizo. Ntchitozo n'zofanana ndi mitundu ya alumikiziwo. Ntchitozo zili motere:

1. Kuphatikiza

***Zitsanzo***

- a. Abambo ndi amayi amalima kwambiri.
- b. Anaphika nsima ndipo adya.
- c. Mwana wake ndi wanzeru komanso waulemu.

2. Kutayanitsa/kulekanitsa

***Zitsanzo***

- a. Ugule nsomba osati nyama.
- b. Iye ndi wamwano koma mnzake ndi waulemu.
- c. Ndikufuna ndalama osati zovala.

3. Kugwirizanitsa

***Zitsanzo***

- a. Mupitebe poti atero.
  - b. Iye sabwera chifukwa akudwala.
  - c. Sindifunsanso popeza mwandiseka.
4. Kusonyeza zotsatira/zolinga

### ***Zitsanzo***

- a. Pempha kuti akugawireko.
- b. Anatopa kotero waweruka.
- c. Sankalimbikira choncho walephera.

### **Ntchito**

1. Kodi ‘mlumikizi’ ndi chiyani?
2. Sankhani alumikizi mu ziganizo zotsatira.
  - a. Khala apo ndipo usachokeponso.
  - b. Chingakhale wabwera, sindinamuitane.
  - c. Ndabwera kuti ndidzabzale mitengo.
  - d. Apalamula choncho anawo akuwaseka.
  - e. Popeza watopa, gona tsopano.
3. Pezani alumikizi oyenera kukhala mu mipata ili m’munsimu.
  - a. \_\_\_\_\_ akundisekerera, sindimudziwa.
  - b. Ndimamukonda \_\_\_\_\_ iye sandikonda.
  - c. Tamva \_\_\_\_\_ mumatifuna.
4. Tchulani mitundu inayi ya alumikizi ndipo pa mtundu uliwonse mupereke chitsanzo chimodzi  
mu chiganizo chomveka bwino.
5. Kodi alumikizi omwe ali ndi mzere kungsi kwawo mu ziganizo zotsatira akugwira ntchito zANJI?
  - a. Mnyamatayo ndi wanzeru koma ndi wamwano.
  - b. Timudikire kapena abweranso.
  - e. Anapita kuchipatala ndipo wabwerako.

- d. Ngakhale sakundiona, sindimuitana.
  - e. Tengani nkhwangwa osati chikwanje.
6. Pangani ziganizo zanzanu zomveka bwino ndi alumikizi otsatira (chiganizo chimodzi pa mukumikizi aliyense): choncho, koteru, ndi, koma, mpaka, ndipo, osati ndi chikhalirecho.





## TSINDE



### Kuganiza mozama

1. Tchulani mayina a magawo aakulu a mtengo omwe mukuŵaona pa chithunzi chili pamwambapa.
2. Fotokozani kufunikira kwa magawo a mtengo omwe mwatchulawo.

Tsinde ndi gawo la mawu lomwe silisintha.

### *Zitsanzo*

- 1
  - a. Idyako.
  - b. Anadyanso.
  - c. Osadyansotu.

- 2 a. Bwerani.
- b. Simudzabweranso.
- c. Ndidzangobweransotu.

Mu zitsanzo zili pamwambapa, mu 1 a, b ndi c gawo lomwe silikusintha ndi ‘-dya’ choncho gawoli ndi tsinde. Mu 2 a, b ndi c gawo lomwe silikusintha ndi ‘bwera’ choncho gawoli ndi tsinde.

Tsinde la mawu lililonse limathera ndi lembo lamtsekulanjira ndipo lembo limenelo likangochotsedwa, chomwe chimatsala ndi gawo lina lomwe limatchedwa ‘muzu’.

Mwachitsanzo, mu tsinde ‘-dya’, tikachotsa lembo lamtsekulanjira ‘a’, muzu ndi ‘-dy-’ ndipo mu tsinde ‘bwera’ tikachotsa lembo lamtsekulanjira ‘a’, muzu ndi ‘bwer-’.

## Mitundu ya masinde

Masinde amaikidwa mu mitundu yosiyanasiyana molingana ndi ntchito zawo kapena ‘mitundu’ ya mawu omwe masindewo amathandiza kupanga. Mitunduyo ili motere:

1. Masinde othandiza kupanga mayina  
Awa ndi masinde omwe amathandiza kupanga mayina.

### ***Zitsanzo***

- a. -bale
- b. -zimu
- c. -nthu

Masindewa atha kuthandiza kupanga mayina monga otsatira.

<b>-bale</b>	<b>-zimu</b>	<b>-nthu</b>
chibale	mzimu	munthu
m’bale	azimu	anthu
abale	uzimu	chinthu
ubale	chizimu	kanthu

## 2. Masinde enieni a mfotokozi

Aŵa ndi masinde omwe amathandiza kupanga afotokozi ndipo amatha kukhala ndi aphantikiram'mbuyo a maphatikizo aŵiri.

### ***Zitsanzo***

-ng'ono	-fupi	-kazi	-ŵisi
-kulu	-tali	-muna	-kali

Masindeŵa atha kuthandiza kupanga afotokozi monga aŵa.

kakang'ono	lalifupi	wamkazi	yaiŵisi
chachikulu	wamtali	zazimuna	waukali

## 3. Masinde a maŵerengo

Aŵa ndi masinde omwe amathandiza kupanga mawu oŵerengera zinthu mwatchutchuchu.

### ***Zitsanzo***

-modzi	-ŵiri	-tatu	-nayi	-sanu
--------	-------	-------	-------	-------

Masindeŵa atha kuthandiza kupanga mawu a maŵerengo monga aŵa.

mmodzi	ziŵiri	kachitatu	anayi	kasanu
--------	--------	-----------	-------	--------

## 4. Masinde osonyeza kupatula

Masindeŵa amathandiza kupanga mawu omwe saonetsa chiŵerengero chenicheni cha zinthu.

### ***Zitsanzo***

-ngapo	-chepa	-mbiri	-nkhani
--------	--------	--------	---------

Masindeŵa atha kuthandiza kupanga mawu osonyeza kupatula monga aŵa.

ingapo	zochepa	lambiri	ankhani
--------	---------	---------	---------

## 5. Masinde a umwini

Aŵa ndi masinde omwe amathandiza kupanga mawu osonyeza umwini.

### ***Zitsanzo***

-nga	-ko	-ke
-thu	-nu	-wo

Masindeŵa atha kuthandiza kupanga mawu a umwini monga aŵa.

wanga	chako	ake
zathu	lanu	mwawo

#### 6. Masinde oloza ndi osonyeza malo

Aŵa ndi masinde omwe amathandiza kupanga mawu oloza komanso a malo.

##### ***Zitsanzo***

-no	-seri	-mwamba	-nja
-ja	-kati	-munsi	-nsi

Timapanga mawu osonyeza malo (kuchokera ku masinde osonyeza malo) pogwiritsa ntchito aphantikiram'mbuyo 'ku-', 'mu-' ndi 'pa-'.

Masindeŵa atha kuthandiza kupanga mawu oloza ndi osonyeza malo monga aŵa.

kuno	paseri	m'mwamba	kunja
paja	m'kati	kumunsi	pansi

#### 7. Masinde ofunsira

Aŵa ndi masinde omwe amathandiza kupanga mawu ofunsira.

##### ***Zitsanzo***

-yani	-tani	-nji	-ti	-ngati
-------	-------	------	-----	--------

Masindeŵa atha kuthandiza kupanga mawu ofunsira monga aŵa: Ayani? Otani? Wanji? Ziti? Angati?

#### 8. Masinde a mgwirizano (aubale)

Aŵa ndi masinde omwe amathandiza kupanga mawu osonyeza mgwirizano.

##### ***Zitsanzo***

-mene (-mwe)	-kha	-na
-tere (-tero)	-nse	

Masindeŵa atha kuthandiza kupanga mawu mgwirizano monga aŵa:

zimene (zomwe)	yekha	wina
otere (otero)	tonse	

## 8. Masinde a aneni a phatikizo limodzi

Aŵa ndi masinde a aneni omwe satha kuima paokha pokhapokha aphantikiram'mbuyo ataphatikizidwa ku masindeŵa.

### ***Zitsanzo***

-ba	-cha	-dza	-mwa	-nya
-swa	-tcha	-fa	-mva	-thwa
-tha	-da	-gwa	-pha	
-kha	-phwa	-phwa	-dya	

Masindeŵa atha kuthandiza kupanga aneni monga aŵa:

aba	chacha	adza	mumwa	anya
uswa	watcha	ifa	wamva	wathwa
chatha	ida	mugwa	apha	
ikha	chaphwa	chaphwa	udya	

## **Ntchito**

1. Fotokozani kusiya kwa 'tsinde' ndi 'muzu' mu chiyankhulo cha Chicheŵa.
2. Sankhani masinde omwe adapanga mawu ali m'munsimu ndipo mutchule mitundu ya masindewo.

amene	uzimuthandiza	zija
ankamanganso	chachikulu	kano
mkango	yaiŵisi	kuti
zikhadabo	chotani	zakumwa
litinso	kutali	zingapo

3. Lembani ziganizo zomveka bwino ndi mawu ochokera ku masinde otsatira.

-modzi	-seri	-gwa
-nsi	-kazi	-fa

4. Perekani zitsanzo zitatu za masinde ofunsira.

5. Pangani afotokozi kuchokera ku masinde omwe ali m'munsimu:

-da	-tatu	-thwa
-muna	-yani?	-yera

## MPEREKEZI



### Kuganiza mozama

1. Fotokozani zomwe zikuchitika pa chithunzi chili pamwambapa.
2. Kuchokera pa njira zopangira mayina zosiyanasiyana zomwe munaphunzira, pangani mayina anuanu kuchokera ku mneni 'perekeza'.

Mperekezi ndi mawu omwe amatsata dzina kapena mloŵam'malo pofuna kuonetsa mgwirizano pakati pa dzinalo kapena mloŵam'maloyo ndi mneni m'chiganizo.

***Zitsanzo***

1. Apita kuchipatala ndi mwana.
2. Ku Liwonde kuli njovu.
3. Zondani anabadwa pa 15 Januwale.

**Mitundu ya aperekezi**

Aperekezi amaikidwa mu mitundu yosiyanasiyana. Mitunduyo ili motere:

1. Mperekezi wosonyeza malo  
Mperekeziyu amagwira ntchito yosonyeza malo kapena mbali.

***Zitsanzo***

- a. Ndipita ku Nkhotakota maŵa.
  - b. Pa Linthipe panachitika zoopsa.
  - c. Sungayende wekha mu Lilongwe.
2. Mperekezi wosonyeza umwini  
Mperekeziyu amagwira ntchito yosonyeza mwini chinthu.

***Zitsanzo***

- a. Buku la Zione lapezeka.
  - b. M'chiuno mwa mwana simufa nkhuku.
  - c. Mpeni wa Nabanda ndi wobuntha.
3. Mperekezi wosonyeza nthawi  
Mperekeziyu amagwira ntchito yosonyeza nthawi yochitikira ntchito.

***Zitsanzo***

- a. Ndidzabwera mu Januwale.
  - b. Kamuzu adabadwa pa 14 Meyi.
  - c. Sindinamuone kwa zaka zingapo tsopano.
4. Mperekezi wosonyeza chipangizo  
Mperekeziyu amagwira ntchito yosonyeza chipangizo chogwirira ntchito.

***Zitsanzo***

- a. Amumenya ndi ndodo.



- b. Usanditengere ku mtoso ngati njoka.
- c. Iye adzabwera pa ngolo.

5. Mperekezi wosonyeza mgwirizano

Mperekeziyu amakhala ngati wa umwini koma si choncho chifukwa amagwira ntchito yongosonyeza mgwirizano.

***Zitsanzo***

- a. Iye wabisala kuseri kwa nyumba.
- b. Dziko la Malawi ndi lamtendere.
- c. Iye ali ndi mankhwala amphamvu.

**Ntchito za aperekezi**

Aperekezi amagwira ntchito zosiyanasiyana m'ziganizo molingana ndi mitundu yawo. Ntchitozo zili motere:

1. Kusonyeza mbali kapena malo

***Zitsanzo***

- a. Iye amakhala ku Salima.
- b. Ukatsikire pa Malosa.
- c. Tikapezana mu Limbe.

2. Kusonyeza umwini

***Zitsanzo***

- a. Mbuzi ya Lazalo yapezeka.
- b. Wapulumukira m'kamwa mwa mbuzi.
- c. Chipewa cha Naphiri n'cholimba.

3. Kusonyeza nthawi

***Zitsanzo***

- a. Ndidzapita kwathu pa 11 Juni.
- b. Mvula imayamba kugwa mu Novembala.
- c. Sindinakumane naye kwa masiku asanu tsopano.

4. Kusonyeza chipangizo

***Zitsanzo***

- a. Amubaya ndi mkondo.
- b. Musanditengere ku mtoso.
- c. Iye adzabwera pa galimoto.

5. Kusonyeza mgwirizano

***Zitsanzo***

- a. Musamalime m'mbali mwa mtsinje.
- b. Phiri la Mulanje ndi lokongola.
- c. Mtsogoleriyu ali ndi chikoka.

## **Ntchito**

1. N'chifukwa chiyani 'mperekezi' amatchedwa 'mperekezi'?
2. Tchulani mitundu inayi ina iliyonse ya aperekezi ndipo pa mtundu uliwonse mupereke chitsanzo chanuchanu chimodzi m'chiganizo.
3. Sankhani aperekezi mu ziganizo zotsatirazi ndipo mutchule mitundu yawo komanso mufotokoze ntchito zawo.
  - a. Iye akudziwa za ngoziyo.
  - b. Agaluwo ali ndi ine.
  - c. Namwali saimirira pa akuluakulu.
  - d. Kodi munali ku Blantyre?
  - e. Adzandipeza ndili kwa iye.
4. Tchulani ntchito zitatu zina zilizonse za aperekezi ndipo pa ntchito iliyonse mupereke chitsanzo chanuchanu chimodzi m'chiganizo.
5. Lembani ziganizo zanzanu ndi mawu otsatira ngati aperekezi: 'ndi', 'kwa', 'pa', 'za' ndi 'ku'.

## MFUWU



### Kuganiza mozama

1. Tchulani dzina la chipangizo chomwe mukuchiona pamwambapa.
2. Kodi chipangizochi chimagwiritsidwa ntchito yanji?
3. Kuchokera pa njira zopangira mayina zosiyanasiyana zomwe munaphunzira, pangani mayina anuanu kuchokera ku mnene 'fuwula'.

Mfuwu ndi mawu omwe amagwiritsidwa ntchito mofuwula pofuna kusonyeza momwe zochitika zamukhudzira yemwe zamuchitikira. Mawuwo amasonyeza kudabwa, kukondwa, kunyansidwa, kuŵaŵidwa, kumva chisoni, kudandaula, kukopa chidwi ndi kulimbikitsa. Mawuŵa amathera ndi chizindikiro cha m'kalembedwe cha mfuwuliro.

### *Zitsanzo*

1. Mayo!
2. Kalanga ine!
3. Hehede!

## Mitundu ya mfuwu

Mifuwu imaikidwa mu mitundu yosiyanasiyana. Mitunduyo ndi iyi:

1. Mfuwu wosonyeza kudabwa

### ***Zitsanzo***

- a. Ha! Mwanayu ndi wamwano chotere?
  - b. Kani! Sindinadziwe kuti munakhumudwa.
  - c. Aa! Zakhala chonchi?
2. Mfuwu wosonyeza kuvomereza

### ***Zitsanzo***

- a. Ame! Mulungu ndi wabwino.
  - b. Odini! Fikani, takulandirani.
  - c. Ataibaya nyamayo, ndidamva kuti shomo!
3. Mfuwu wosonyeza kudandaula kapena chisoni

### ***Zitsanzo***

- a. Koto! Ndaponda minga.
  - b. Ogo! Ndangovutika chabe.
  - c. Kalanga ine! Malaya anga apsa.
4. Mfuwu wosonyeza kukondwa

### ***Zitsanzo***

- a. Hee! Tidyera nyama.
  - b. Hehede! Mwana wathu wapambana.
  - c. Phwando lakoma, woyee!
5. Mfuwu wosonyeza kulimbikitsa

### ***Zitsanzo***

- a. Gaba, chinya!

- b. Chilemba, menya! Gwetsa!
- c. Shumba, gwira! Tidyere nyama.

6. Mfuwu wosonyeza kukopa chidwi

***Zitsanzo***

- a. Mtendere! Mtendere! Tikhale pansi.
- b. Aleluya! Ambuye akudalitseni.
- c. Gulu lathu, motomoto!

**Ntchito za mifuwu**

Mifuwu imagwira ntchito zosiyanasiyana ikakhala payokha kapena m'ziganizo. Kaŵirikaŵiri ntchito za mifuwu zimagwirizana ndi mitundu yake. Ntchitozo zili motere:

1. Kudabwa

***Zitsanzo***

- a. Ha! Moti uyu ndi mwana wanu?
- b. Kani! Sindimadziŵa kuti mungandithandize.
- c. Aa! Sindimayembekeza kuona zotere.

2. Kuvomereza

***Zitsanzo***

- a. Ame! Mulungu akudalitseni.
- b. Odini! Fikani.
- c. Ndingomva kuti shomo!

3. Kudandaula kapena kumva ululu

***Zitsanzo***

- a. Koto! Ndavulala kwambiri.
- b. Ogo! Ndiwo zapserera pamoto.
- c. Kalanga ine! Mphale yatayika.

4. Kukondwa

***Zitsanzo***

- a. Gule wakoma; woyee!
- b. Hehede! Ndapambana mayeso.
- c. Takondwa! Mwana wathu wakwatiwa.

5. Kulimbikitsa

***Zitsanzo***

- a. Malaŵi, chinya!
- b. Ponya chibakera, gwetsa!
- c. Gwira! Tidyere nyama.

6. Kukopa chidwi

***Zitsanzo***


- a. Mtendere! Tikhale pansi.
- b. Aleluya! Mulungu ndi wabwino.
- c. Bungwe lathu, motoo!

## Ntchito

- 1. Kodi ‘mfuwu’ ndi chiyani?
- 2. Tchulani mitundu itatu ina iliyonse ya mfuwu.
- 3. Fotokozani ntchito zitatu zina zilizonse za mfuwu ndipo pa ntchito iliyonse mupereke chitsanzo chimodzi m’chiganizo.
- 4. Pangani ziganizo zomveka bwino ndi mawu otsatira ngati mifuwu.

ayo	odi	haya	khoma
hi	wee	hula	luma
yede	haya	ho	sokole
- 5. Kodi mawu aliwonse angathe kukhala mfuwu? Tsimikizirani yankho lanu popereka chitsanzo.

## MVEKERO



### Kuganiza mozama

1. Tchulani maliwu omwe angathe kumveka kuchokera pa zomwe mukuona zikuchitika pa zithunzi zili pamwambapa.
2. Kuchokera pa njira zopangira mayina zosiyanasiyana zomwe munaphunzira, pangani mayina anuanu kuchokera ku mneni ‘mvekera’ yemwe ali mu msintho.

Mvekero ndi maliwu kapena mawu omwe amapereka ganizo. Mimvekero imatha kuima payokha (mosathandizidwa ndi mawu ena) n’kupereka ganizo lomveka bwino.

### *Zitsanzo*

1. Psu  
Mawu woti ‘psu’ amasonyeza mtundu wofiira.
2. Phofo

Mawu loti ‘phofo’ amatanthauza kugwa mwamphamvu kwa chinthu kuchoka m’mwamba.

3. Guu

Mawu woti ‘guu’ amasonyeza kafungo kabwino.

## **Magulu a mimvekero**

Mimvekero imaikidwa m’magulu molingana ndi chiwerengero cha maphatikizo mu tsinde la mvekero.

1. Mimvekero ya tsinde la phatikizo limodzi

### ***Zitsanzo***

psuu	guu	ndi	nji
phaa	phi	thi	puu
phu	pya	tchi	ngo
ndwii	chi	bzee	bee
juu	tchwee	bi	ga
lya	zii	psa	mbwe
see	ndu	njo	nzwii
phwii	khu	mbee	tswii

### ***Kumbutso***

Phatikizo ndi gawo la mawu lothandiza kupanga mawuwo ndipo limatheka kutchulika palokha. Choncho mu mimvekero monga ‘psuu’, ‘guu’, ‘phaa’, ‘tswii’ ndi ‘nzwii’ phatikizo ndi limodzi chifukwa sitimati ‘psu-u’, ‘gu-u’, ‘pha-a’, ‘tswi-i’ ndi ‘nzwi-i’ poŵatchula.

2. Mimvekero ya tsinde la maphatikizo aŵiri

### ***Zitsanzo***

tsitu	ngunda	fwasu	gwedze
psiti	yazi	phava	khutcha
thapsa	vwapa	waka	tswere
pholi	khathya	nyaka	lambzi
dedza	nyomi	kong’aa	nete



thedza	dukwe	kweve	nkholi
chubwa	nyoswa	phivi	nenkha

### 3. Mimvekero ya tsinde la maphatikizo atatu

#### ***Zitsanzo***

likhwithi	dangali	dululu	gubidi
pwepwete	ngumbali	kakasi	tololo
tiriri	palantha	chiriri	hephethe
ngwinjiri	setete	dununu	nyontcholi
thoboli	laphathya	lephethe	kwakwata
ngundungu	gwembere	pwirikiti	dipiti
vwetete	kakata	weyere	ziriri

### 4. Mimvekero ya tsinde la maphatikizo anayi

#### ***Zitsanzo***

thakwalala	pholokoto	polokotso	thasalala
gulupati	yangalala	jojoboli	balamanthu
lombokoto	gugubidi	ndundululu	kholophethe
gonkhonono	denkhenene	kwakwalala	khokhophotho
piriŵiri	vwerekete	yambakata	tutuŵiri

### 5. Mimvekero ya tsinde lobwereza

Ili ndi gulu la mimvekero yomwe tsinde lawo limabwerezedwa ndipo kaŵirikaŵiri imagwiritsidwa ntchito mobwereza momwemo.

#### ***Zitsanzo***

seyaseya	wemphawempha	bwitibwiti	pichikapichika
chikachika	patipati	libwalibwa	taŵataŵa
lewulewu	chikwichikwi	dichidichi	chinyachinya
phaluphalu	tunyatunya	zopizopi	punzipunzi

## Mitundu ya mimvekero

Mimvekero imaikidwa mu mitundu yaikulu yotsatira.

1. Mimvekero ya maonekedwe  
Mimvekero ya m'mtunduwa imakamba za mtundu (kaonekedwe) wa zinthu.

### ***Zitsanzo***

- a. Maso ako ali psu.
- b. Kunja kwangoti ngwe.
- c. Zovala zayera kuti mbe.
- d. Mmera uli biriwiri m'munda.
- e. Chidakwa chili bi ngati mtsiro.

2. Mimvekero ya mamvekedwe  
Mimvekero ya m'mtunduwa imakamba za mamvekedwe a zinthu pathupi, m'makutu, m'kamwa ndi m'mphuno.

### ***Zitsanzo***

- a. Thupi lako lili juu; kodi ukudwala?
- b. Buluzi wagwa kuti phofo.
- c. Ukamva kuti nginde, ndiye kuti afika.
- d. Manyuchi ali tsekeseke.
- e. Mwagula sopo yabwino, ili guu.

3. Mimvekero ya mkhalidwe  
Mimvekero ya m'mtunduwa imakamba za kakhaliidwe ka chinthu.

### ***Zitsanzo***

- a. Mtengowu uli nji.
- b. Vumbwe ali bisale patchire.
- c. Mwangoti du; kodi mwatani?
- d. Ndisenza ndekha mtolowu; uli pepu.
- e. Ali sukwasukwa chifukwa cha mantha.

4. Mimvekero ya mchitidwe  
Mimvekero ya m'mtunduwu imakamba za kachitdwe ka ntchito.

***Zitsanzo***

- a. Nyani ali chinyachinya m'munda.
- b. Wangoti m'nyumba gubidi, atandiona.
- c. Chidakwa chili dzandidzandi.
- d. Msampha wangoti fwamphu.
- e. Ali yakaliyakali kuthamangira kumsika.

**Kapangidwe ka mimvekero**

Mimvekero ina ndi yachikhalire pomwe ina imachita kupangidwa kuchokera ku mitundu ina ya mawu maka aneni ena.

Njira zopangira mimvekero kuchokera ku aneni ena ndi monga zotsatira.

1. Kusintha lembo lamtsekulanjira 'a' lotsirizira tsinde la mnene kuti likhale 'e' kapena 'u'.

***Zitsanzo***

***Mnani***

gona  
songoka  
tambalala  
sokoloka  
koloŵeka  
galamuka

***Mvekero***

gone  
songoke  
tambalale  
sokoloku  
koloŵeku  
galamuku

2. Kuchotsa phatikizo lotsiriza la tsinde la mnene wa maphatikizo aŵiri. Phatikizo lotsalalo ndi limene limakhala mvekero.

***Zitsanzo***

***Mnani***

thyola

***Mvekero***

thyo

dinda	di
khoma	kho
gwira	gwi
phwanya	phwa
khapa	kha

3. Kuchotsa phatikizo lotsiriza la tsinde la mneni wa maphatikizo atatu. Maphatikizo aŵiri otsalawo ndi amene amakhala mvekero.

***Zitsanzo***

<b><i>Mneni</i></b>	<b><i>Mvekero</i></b>
phwafula	phwafu
ng'anima	ng'ani
pendama	penda
wayula	wayu
zyolika	zyoli
thothola	thotho

4. Kuchotsa phatikizo lotsiriza la tsinde la mneni wa maphatikizo atatu kenako n'kubwereza mvekero wopangidwayo (maphatikizo aŵiri otsalawo ndi amene amabwerezedwa) kuti akhale mvekero wina watsopano.

***Zitsanzo***

<b><i>Mneni</i></b>	<b><i>Mvekero</i></b>	<b><i>Mvekero</i></b>
dzandira	dzandi	dzandidzandi
deruka	deru	deruderu
phulika	phuli	phuliphuli
yandama	yanda	yandayanda
wayula	wayu	wayuwayu
phothyola	phothyo	phothyophothyo

## Ntchito


1. Kodi ‘mvekero’ ndi chiyani?
2. Tchulani magulu atatu aliwonse a mimvekero ndipo pa gulu lililonse mupereke zitsanzo zitatu.
3. Perekani mitundu itatu iliyonse ya mimvekero ndipo pa mtundu uliwonse mupereke zitsanzo zitatu.
4. Pangani ziganizo zomveka bwino ndi mimvekero yotsatira.

khathikha	likhwithi	njo
thotho	pyuu	ngwee
gwere	tondovwiro	ndalaa
tawii	thedza	phwi
nyontcholi	lotho	ndwii
5. Pangani mimvekero kuchokera ku aneni otsatira ndipo mutchule mitundu ya mimvekeroyo.

weresa	meza	thwanima
phothyola	fwikula	phulika
likita	duwa	nyukutula



## MPHATIKIRI



### Kuganiza mozama

1. Fotokozani momwe dzina ‘mphetikiri’ lidapangidwira kuchokera ku mawu ndi magawo osiyanasiyana omwe mukuŵaona pa chithunzi chili pamwambapa.
2. Kuchokera pa njira zopangira mayina zosiyanasiyana zomwe munaphunzira, pangani mayina anuanu kuchokera ku mneni ‘phatikira’ yemwe ali mu msintho.

Mphetikiri ndi phatikizo lopezeka kumbuyo kapena kutsogolo kwa tsinde la mawu.

### ***Zitsanzo***

1. munthu

Mawu woti ‘munthu’ adapangidwa pophatikiza phatikizo ‘mu-’ ku tsinde lothandiza kupanga dzina ‘-nthu’ choncho ‘mu-’ ndi mphetikiri.

2. Tidzachitengadi.

M’chitsanzochi muli maphatikizo angapo omwe adaphatikizidwa ku tsinde la mnenei ‘tenga’. Maphatikizowo ndi ‘ti-’, ‘-dza-’, ‘-chi-’ ndi ‘-di’. Maphatikizo onsewa ndi aphetikiri.

### **Mitundu ya aphetikiri**

Mu Chicheŵa, monganso mu ziyankhulo zina za Chibantu, muli mitundu yaikulu iwiri ya aphetikiri. Mitunduyo ndi iyi: mphetikiram’mbuyo ndi mphetikiram’tsogolo.

1. Mphetikiram’mbuyo

Mphetikiram’mbuyo ndi phatikizo lomwe limaphatikizidwa kumbuyo kwa tsinde la mawu.

### ***Zitsanzo***

<u>chin</u> thu	(chi-	ku	-nthu)
<u>mk</u> ulu	(m-	ku	-kulu)
<u>won</u> enepa	(wo-	ku	nenepa)
<u>ch</u> abwino	(cha-	ku	bwino)
<u>w</u> ansembe	(wa-	ku	nsembe)

2. Mphetikiram’tsogolo

Mphetikiram’tsogolo ndi phatikizo lomwe limaphatikizidwa kutsogolo kwa muzu kapena tsinde la mawu.

### ***Zitsanzo***

phik <u>i</u> ra	(-ira	ku	phikir-)
sek <u>e</u> dwa	(-edwa	ku	sek-)
bwer <u>a</u> ni	(-ni	ku	bwera)
gul <u>a</u> nso	(-nso	ku	gula)
on <u>a</u> tu	(-tu	ku	ona)



## Ntchito za aphantikiri

Aphantikiri (aphatikiram'mbuyo ndi aphantikiram'tsogolo) amagwira ntchito zosiyanasiyana.

### *Ntchito za aphantikiram'mbuyo*

Aphantikiram'mbuyo amagwira ntchito zotsatira:

#### 1. Kuthandiza kupanga mayina

M'ntchitoyi aphantikiram'mbuyo amaphatikizidwa ku tsinde kapena mawu ndipo mawu opangidwa amakhala dzina.

#### ***Zitsanzo***

zi	-nthu	zinthu
li-	-kulu	likulu
m-	londa	mlonda
u-	bwino	ubwino
chi-	kale	chikale

#### 2. Kukulitsa, kuchepetsa ndi kuchulukitsa mayina.

M'ntchitoyi aphantikiram'mbuyo amakulitsa (kapena kunyoza), kuchepetsa kapena kuchulukitsa mayina.

#### ***Zitsanzo***

##### a. Kukulitsa kapena kunyoza

<u>ch</u> imunda	<u>ch</u> idazi
<u>ch</u> indege	<u>ch</u> imutu
<u>ch</u> imwana	<u>ch</u> imbamu

##### b. Kuchepetsa

<u>k</u> amuzu	<u>t</u> imbalame
<u>k</u> ansima	<u>t</u> indiwo
<u>k</u> ansengwa	<u>t</u> indalama

##### c. Kuchulukitsa

<u>a</u> chule	<u>a</u> na
<u>m</u> alembo	<u>m</u> auta
<u>m</u> itengo	<u>z</u> itsulo

d. Kusonyeza malo

M'ntchitoyi aphantikiram'mbuyo 'ku-', 'mu-' ndi 'pa-' amasonyeza malo.

***Zitsanzo***

ku-	<u>k</u> umadzi
mu-	<u>m</u> 'thupi
pa-	<u>p</u> atsala

e. Kusonyeza umwini (mwini chinthu) kapena kopezeka zinthu

M'ntchitoyi aphantikiram'mbuyo amaonetsa kuti wina ali ndi chinthu kapena kuti ndi mwini chinthu.

***Zitsanzo***

t	<u>t</u> abwalo	(mwini bwalo)
t	<u>t</u> ang'oma	(mwini ng'oma)
k	<u>k</u> alitsiro	(wokhala ndi litsiro)
k	<u>k</u> ansabwe	(wokhala ndi nsabwe)
n	<u>N</u> anjoka	(kopezeka njoka)
n	<u>N</u> amikango	(kopezeka mikango)

**Kodi mu chicheŵa muli mphantikiram'kati?**

Akatswiri azaziyankhulo amatsutsana kwambiri pa mfundo ya mphantikiram'kati mu ziyankhulo za Chibantu monga Chicheŵa. Akatswiri ena amati mu ziyankhulo za Chibantu mulibe mphantikiram'kati koma ena amati muli mphantikiram'kati wapadera osati mmene amayenera kukhalira potsatira malamulo a chiyankhulo enieni.

Kodi mphantikiram'kati ndi chiyani?

Kunena motsata dongosolo la malamulo a chiyankhulo, mphantikiram'kati ndi mphantikiri yemwe amapezeka m'kati mwa tsinde la mawu.

Mwachitsanzo, mu chiyankhulo chotchedwa Tagalog, chomwe chimayankhulidwa ku Phillipines, muli zitsanzo zabwino za mphatikiram’kati.

### ***Zitsanzo***

#### ***Tagalog***

#### ***Chicheŵa chake***

- |                    |                            |                    |
|--------------------|----------------------------|--------------------|
| 1. bili            | gula                       |                    |
| 2. <u>bum</u> ili  | -nagula, monga ‘anagula’   | (mu nthawi yakale) |
| 3. lakad           | yenda                      |                    |
| 4. <u>lum</u> akad | -nayenda, monga ‘anayenda’ | (mu nthawi yakale) |

Kuchokera mu zitsanzo zili pamwambapa mutha kuona bwinobwino kuti mu chiyankhulo cha Tagalog, mphatikiram’kati (‘-um-’) yemwe amatha kusonyeza nthawi yakale akupezeka m’kati mwenimweni mwa masinde ‘*bili*’ ndi ‘*lakad*’ ndipo akusiyana kwambiri ndi mphatikiri ‘-na-’ mu Chicheŵa yemwe akupezeka kunja kwa masinde ‘gula’ ndi ‘yenda’.

Potsata mfundoyi, mutha kuona kuti mu Chicheŵa mulibe mphatikiram’kati chifukwa sitingathe kuloŵetsa mphatikiri (monga mphatikiram’kati) m’katikati mwa tsinde la mawu a Chicheŵa.

### ***Zitsanzo***

1. Achigula.
2. Chikudyedwa.
3. Amangodzivuta.

Mu (1) mphatikiri ‘-chi-’ akupezeka kumbuyo kwa tsinde ‘gula’

Mu (2) mphatikiri ‘-ku-’ akupezeka kumbuyo kwa tsinde ‘pita’

Mu (3) aphatikiri ‘-ma-’, ‘-ngo-’ ndi ‘-dzi-’ akupezeka kumbuyo kwa tsinde ‘vuta’

Apa zikuonekeratu kuti mu Chicheŵa mulibe mphatikiram’kati. Choncho aphatikiri onse omwe ankatengedwa ngati aphatikiram’kati ndi aphatikiram’mbuyo chifukwa amakhala kumbuyo kwa tsinde. Komabe poti aphatikiriŵa akupezeka pakati pa mphatikiri wamchitantchito kapena wamchitidwantchito ndi tsinde, tiyenera kuŵasonyeza pogwiritsa ntchito amdulamawu aŵiri (monga ‘-na-’).

Mitundu ndi ntchito za aphatikiram’mbuyoŵa zili motere:

1. Mphatikiram'mbuyo wa nthawi

Mphatikiriyu masonyeza nthawi za aneni (nthawi yomwe ntchito yachitikira).

***Zitsanzo***

a. Anadya nsima.

b. Mulungu adzatitsogolera.

2. Mphatikiram'mbuyo wolamula

Mphatikiriyu amagwiritsidwa ntchito popereka lamulo. Mphatikiriyu ndi '-zi-'.

***Zitsanzo***

a. Muzipita kwanu tsopano.

b. Mwanawe, uzilimbikira maphunziro.

3. Mphatikiram'mbuyo wodzichitira

Mphatikiriyu amasonyeza kuti ntchito yabwerera kwa yemwe waichita. Mphatikiriyu ndi '-dzi-'.

***Zitsanzo***

a. Mwana wadziluma.

b. Wadzicheka chonchi?

4. Mphatikiram'mbuyo wapokhapokha

Mphatikiriyu amasonyeza kuti ntchito ichitika ngati ina ichitike. Aphetikiri otere ndi monga '-ta-' ndi '-ka-'.

***Zitsanzo***

a. Atabwera, ndingapite nawo.

b. Ndisangalala akabwera.

5. Mphatikiram'mbuyo wosonyeza kuthekera

Mphatikiriyu amasonyeza kuti wina angathe kuchita kanthu. Mphatikiriyu ndi '-nga-'.

***Zitsanzo***

a. Ndingayendetse sitima.

b. Galuyu angagwire nyama.

6. Mphatikiram'mbuyo wa mchitidwantchito

Mphatikiriyu amagwirizana ndi dzina kapena mloŵam’ malo yemwe wachitidwa kanthu.

***Zitsanzo***

- a. Ndamuona iye.
- b. Angozo achigwetsa chimtengo.

***Ntchito za aphantikiram’ tsogolo***

Aphantikiram’ tsogolo amagwira ntchito zotsatira:

- 1. Kuthandiza kupanga misintho ya aneni

Aphantikiram’ tsogoloŵa amaphatikizidwa ku mizu ya aneni ndipo amathandiza kupanga misintho ya aneni.

***Zitsanzo***

- a. Galu wamenyedwa.
- b. Anditengera ndalama zanga.
- c. Mwandimenyetsa.
- d. Atambala akumenyana.
- e. Wayalula mphasa zanga ndani?

- 2. Kukhala akulitsi

Pali aphantikiram’ tsogolo ena apadera omwe amatchedwa ‘akulitsi’. Aphantikiram’ tsogoloŵa amatheka kuphatikizidwa pafupifupi kutsogolo kwa mtundu wina uliwonse wa mawu.

Aphantikiram’ tsogoloŵa ndi aŵa: ‘-be’, ‘-nso’, ‘-tu’ ndi ‘-di’.

- a. -be

Mphantikiram’ tsogoloyu amagwira ntchito zosiyanasiyana monga izi:

- i. Kusonyeza kuti ntchito ikuchitika mopitiriza

***Zitsanzo***

- Angolirabe kuchokera m’maŵa.
- Muzisesabe mpaka ndibwereko.

- ii. Kusonyeza kuti wina sali ndi kanthu

***Zitsanzo***

- Ndilibe ndalama.
- Mwanayu alibe nzeru.

- iii. Kusonyeza kuti ntchito ichitika pakapita nthawi pang'ono (makamaka ntchito inaikachitika).

***Zitsanzo***

- Mudyabe, akaphika.
- Ndigonabe ndikamaliza kuwerenga.

- iv. Kusonyeza makani pochita zomwe wina analetsedwa kuchita (kapena ngakhale pali zifukwa zina zoletsa kutero).

***Zitsanzo***

- Ndadyabe ngakhale mwandiletsa
- Agulabe nyama yovunda ija.

- b. -nso

Mphatikiram'tsogoloyu amagwira ntchito zosiyanasiyana monga izi:

- i. Kusonyeza kuti ntchito yabwerezedwa (akaphatikizidwa ku mneni).

***Zitsanzo***

- Ndabweranso.
- Wapambananso chisankho.

- ii. Kusonyeza kuphatikiza (si mmodzi yekha wochita kanthu komanso pali wina).

Pogwira ntchitoyi, mphatikiram'tsogolo '-nso' amaphatikizidwa ku mitundu ina ya

mawu

monga mayina, mloŵam'malo, muonjezi ndi mlumikizi.

***Zitsanzo***

- Inunso mubwere.
- Joni ndi mnzanga, Malitanso ndi mnzanga.
- Mwaba ndiponso mwapha.

- Leronso kugwa mvula.

c. -tu

Mphatikiram'tsogoloyu amagwira ntchito zosiyanasiyana monga izi:

- i. Kusonyeza kuti ntchito yachitika kwathunthu.

***Zitsanzo***

- Ndinaiŵaliratu zoti mubwera.
- Zikuoneka kuti mwatoperatu.

- ii. Kusonyeza kuti ntchito iyenera kuchitika pasanaoneke zovuta zina kapena ntchito ina isanachitike.

***Zitsanzo***

- Nkhanga zinapanganiratu kusanapse.
- Mudyeretu musanamwe mankhwala.

- iii. Kusonyeza kuchenjeza kuti ngati wina achita kanthu ndiye kuti kanthu kena kamutsatira.

***Zitsanzo***

- Pitatu umenyedwe.
- Muvulalatu mukadumphu.

3. Kuchulukitsa kapena kulemekeza

Mphatikiram'tsogolo '-ni' amaphatikizidwa ku mizu ya aneni ndipo amasonyeza kuchulukitsa kapena kulemekeza.

***Zitsanzo***

- a. Atsikana, limbikirani maphunziro.
- b. Khalani pansi, bambo.

***Kumbutso***

Aphatikiram'tsogolo angapo amatheka kutsatana.

***Zitsanzo***

1. Amudyeransotu.
2. Kodi mulipodi?
3. M'phirimonso muli afisi.
4. Yendanibe, musatope.

## Ntchito

1. Kodi 'mphatikiri' ndi chiyani?
2. Gwiritsani ntchito aphantikiri otsatira mu ziganizo zomveka bwino.
 

mu-	-ngo-	-ni
chi-	-zi-	-be
ti-	-ba-	-tu
3. Perekani matanthauzo ndi zitsanzo zanu za aphantikiri otsatira.
  - a. mphatikiram'mbuyo
  - b. mphatikiram'tsogolo
4. Lembani mawu okhala ndi aphantikiram'tsogolo otsatira ndipo mufotokoze ntchito zawo.
 


-be	-eka
-ula	-edwa
-nso	-ni
5. Lembani ziganizo ziwiriziwiri zomveka bwino ndi 'ku' ndi 'chi' ngati:
  - a. aphantikiram'mbuyo
  - b. aphantikiram'tsogolo
6. Tchulani mitundu ndi ntchito za aphantikiri omwe ali ndi mzere kunsu kwawo mu ziganizo izi.
  - a. Munthu ali ndi miyendo iwiri.
  - b. Mtsikanayo amavina bwino.
  - c. Mupitekonso dzuwa lisanalowe.
  - d. Lo<sup>w</sup>ani m'nyumbamu.
  - e. Galuyu ndi waukalidi.



7. Kodi mu Chicheŵa muli mphatikiram’kati? Tsimikizirani yankho lanu.



## MGWIRIZANITSI



### Kuganiza mozama

1. Kuchokera pa zomwe mukuona pamwambapa, sankhani mphatikiri woyenera kuphatikizidwa ku tsinde ‘-dya’ kuchokera pa aphetikiri aŵa: ‘a-’, ‘wa-’ ndi ‘ya-’, kuti mupange mawu omveka bwino ndi tsindelo.
2. Ndi chifukwa chiyani mukuganiza kuti mphatikiri mwasankhayo ndiye woyenera?
3. Kuchokera pa njira zopangira mayina zosiyanasiyana zomwe munaphunzira, pangani mayina anuanu kuchokera ku mnene ‘gwirizanitsa’, yemwe ali mu msinthe.

Mgwirizanitsi ndi mphatikiri yemwe amasonyeza mgwirizano womwe umakhalapo pakati pa mchitantchito kapena mchitidwantchito ndi mawu ena m’chiganizo.

### *Chitsanzo*

Nsalu langa wofiira uja lasoŵa.

Chiganizo chili pamwambapa sichikumveka bwino ndipo n'choseketsa chifukwa aphantikiri omwe agwiritsidwa ntchito sakugwirizana mpang'ono pomwe ndi mchitantchito 'nsalu'.

Aphantikiri oyenera ndi aŵa:

1. Nsalu yanga yofiira ija yasoŵa. (chimodzi)
2. Nsalu zanga zofiira zija zasoŵa. (zambiri)

Umenewu ndiwo mgwirizano womwe umakhalapo pakati pa mchitantchito kapena mchitidwantchito ndi mawu ena mu chiganizo.

### **Mitundu ya agwirizanitsi**

Agwirizanitsi amaikikidwa mu mitundu yosiyanasiyana yotsatira.

#### **1. Mgwirizanitsi wa mchitantchito**

Uyu ndi mphantikiri yemwe amagwirizana ndi mchitantchito ndipo amaphatikizidwa ku mnene.

##### ***Zitsanzo***

- a. Ife tadya nsima yosapsa.
- b. Chala sichiloza mwini.
- c. Mbuzi za mfumu zili kudambo.

Mu (a) 'ta-' akugwirizana ndi mchitantchito 'ife'; mu (b) 'chi-' akugwirizana ndi mchitantchito 'chala' ndipo mu (c) 'zi-' akugwirizana ndi mchitantchito 'mbuzi'.

#### **2. Mgwirizanitsi wa mchitidwantchito**

Uyu ndi mphantikiri yemwe amagwirizana ndi yemwe wachitidwa kanthu. Nthawi zambiri mgwirizanitsiyu amakhala pakati pa mphantikiram'mbuyo ndi tsinde la mnene.

##### ***Zitsanzo***

- a. Ndaliona khasu lija.
- b. Galu wachiwewe wawaluma iwo.
- c. Nsima yadyedwa.

Mu (a) '-li-' akugwirizana ndi mchitidwantchito 'khasu'; mu (b) '-ŵa-' akugwirizana ndi mchitidwantchito 'iwo' ndipo mu (c) 'ya-' akugwirizana ndi mchitidwantchito 'nsima'.

#### **3. Mgwirizanitsi wa mfotokozi**

Mgwirizanitsi wa mfotokozi ndi mphatikiram'mbuyo yemwe amathandiza kupanga mfotokozi wamaonekedwe kapena wamkhalidwe ndipo amagwirizana ndi dzina kapena mloŵam'malo.

***Zitsanzo***

- a. Andiphikira nsima yaiŵisi.
- b. Wanga wamtali uja wabwera.
- c. Ndagula mbale zachitsulo.

Mu (a) 'yai-' akugwirizana ndi dzina 'nsima'; mu (b) 'wam-' akugwirizana ndi mloŵam'malo 'wanga' ndipo mu (c) 'za-' akugwirizana ndi dzina 'mbale'.

4. Mgwirizanitsi wa umwini

Uyu ndi mphatikiram'mbuyo yemwe amaphatikizidwa ku tsinde laumwini pofuna kupanga mawu omwe amakamba zambiri za dzina.

***Zitsanzo***

- a. Mwana wake wabwera.
- b. Ndaliona buku langa.
- c. Nkhosa zanu zikudya msipu.

Mu (a) 'wa-' waphatikizidwa ku tsinde la umwini '-ke' ndipo akugwirizana ndi dzina 'mwana'; mu (b) 'la-' waphatikizidwa ku tsinde la umwini '-nga' ndipo akugwirizana ndi dzina 'buku' ndipo mu (c) 'za-' waphatikizidwa ku tsinde la umwini '-nu' ndipo akugwirizana ndi dzina 'nkhosa'.

5. Mgwirizanitsi woloza

Uyu ndi mphatikiram'mbuyo yemwe amaphatikizidwa ku tsinde loloza pofuna kupanga mawu olozera. Mgwirizanitsiyu amagwirizana ndi mawu olozedwa.

***Zitsanzo***

- a. Munthu uja ndi wakuba.
- b. Chaka chino ndilima thonje.
- c. Patsala paja pagona chinziri.

Mu (a) ‘u-’ waphatikizidwa ku tsinde loloza ‘-ja’ ndipo akugwirizana ndi dzina ‘munthu’; mu (b) ‘chi-’ waphatikizidwa ku tsinde loloza ‘-no’ ndipo akugwirizana ndi dzina ‘chaka’ ndipo mu (c) ‘pa-’ waphatikizidwa ku tsinde loloza ‘-ja’ ndipo akugwirizana ndi dzina ‘patsala’.

#### 6. Mgwirizanitsi wa maŵerengo

Uyu ndi mphatikiram’mbuyo yemwe amaphatikizidwa ku tsinde la maŵerengo. Mgwirizanitsiyu amagwirizana ndi dzina kapena mloŵam’ malo yemwe akuŵerengedwa.

##### ***Zitsanzo***

- a. Mapanga aŵiri avumbwitsa.
- b. Ulendo wachitatu wandikhumudwitsa.
- c. Yake imodzi yapezeka.

Mu (a) ‘a-’ waphatikizidwa ku tsinde la maŵerengo ‘-ŵiri’ ndipo akugwirizana ndi dzina ‘mapanga’; mu (b) ‘wachi-’ waphatikizidwa ku tsinde la maŵerengo ‘-tatu’ ndipo akugwirizana ndi dzina ‘ulendo’ ndipo mu (c) ‘i-’ waphatikizidwa ku tsinde la maŵerengo ‘-modzi’ ndipo akugwirizana ndi mloŵam’ malo ‘yake’.

#### 7. Mgwirizanitsi wa mgwirizano

Uyu ndi mphatikiram’mbuyo yemwe amaphatikizidwa ku masinde a mgwirizano monga ‘-mene’, ‘-tere’ ndi ‘-mwe’ ndipo amagwirizana ndi dzina kapena mloŵam’ malo wonenedwa.

##### ***Zitsanzo***

- a. Ndamuona mlendo amene wabwera kwanu.
- b. Makhalidwe otere ndimadana nazo.
- c. Izi ndi zomwe ndimayembekeza kuchitika.

Mu (a) ‘a-’ waphatikizidwa ku tsinde la mgwirizano ‘-mene’ ndipo akugwirizana ndi dzina ‘mlendo’; mu (b) ‘o-’ waphatikizidwa ku tsinde la mgwirizano ‘-tere’ ndipo akugwirizana ndi dzina ‘makhalidwe’ ndipo mu (c) ‘zo-’ waphatikizidwa ku tsinde la mgwirizano ‘-mwe’ ndipo akugwirizana ndi mloŵam’ malo ‘izi’.

#### 8. Mgwirizanitsi wofunsira

Uyu ndi mphatikiram’mbuyo yemwe amaphatikizidwa ku masinde ofunsira monga ‘-tani’, ‘-yani’ ‘-ngati’ ndi ‘-ti’ ndipo amagwirizana ndi dzina kapena mloŵam’ malo wonenedwa.

##### ***Zitsanzo***

- a. Ukufuna ndalama zingati?
- b. Mwagula botolo lotani?
- c. Ndi atatu ati abedwa?

Mu (a) ‘zi-’ waphatikizidwa ku tsinde lofunsira ‘-ngati’ ndipo akugwirizana ndi dzina ‘ndalama’; mu (b) ‘lo-’ waphatikizidwa ku tsinde lofunsira ‘-tani’ ndipo akugwirizana ndi dzina ‘botolo’ ndipo mu (c) ‘a-’ waphatikizidwa ku tsinde lofunsira ‘-ti’ ndipo akugwirizana ndi mloŵam’ malo ‘atatu’.


## Ntchito

1. Kodi ‘mgwirizantsi’ ndi chiyani?
2. Tchulani mitundu isanu iliyonse ya agwirizantsi ndipo pa mtundu uliwonse mupereke zitsanzo  
zanuzanu ziŵiri mu ziganizo. Mutseke mzere kungsi kwa agwirizantsiwo.
3. Lembani agwirizantsi a mchitidwantchito m’ziganizo pogwiritsa ntchito mayina otsatira ndipo  
mulembe mzere kungsi kwa agwirizantsiwo.  
achule      mitengo      mwezi  
mzambwe zaka      kudimba
4. Lembani agwirizantsi a mfotokozi m’ziganizo pogwiritsa ntchito mayina otsatira ndipo  
mulembe mzere kungsi kwa agwirizantsiwo.  
khola      kulima      msodzi  
gondwa      mbuzi      mango
5. Tchulani mitundu ya agwirizantsi omwe ali ndi mzere kungsi kwawo mu ziganizo izi.
  - a. Mphepo yasasula denga laudzu.
  - b. Agogo atiphera nkunzi yonenepa kwambiri.
  - c. Kumanda kuja kwaŵirira kwambiri.
  - d. Galu waukuli amupha.
  - e. Atangomva nyimbo imodzi yokha sadachoke.
6. Chiganizo kuti chimveke bwino pamafunika mgwirizano wa mawu. Lembani aphantikiri oyenera  
mu mipata yotsatira pofuna kuonetsa mgwirizano wa mawu.

- a. Njuchi \_\_luma mwana \_\_ng'ono.
  - b. Aphunzitsi \_\_luntha \_\_pambanitsa ophunzira.
  - c. Galu \_\_nu \_\_gwira kalulu.
7. N'chifukwa chiyani mphatikiri '-dzi-' wosonyeza kuti wina wadzichitira ntchito yekha si mgwirizanitsi? Perekani chifukwa chachikulu chimodzi.



## ZIZINDIKIRO ZA M'KALEMBEDWE



### Kuganiza mozama

1. Perekani zitsanzo za zizindikiro zina zilizonse zomwe mumazidziŵa ndipo mutchule matanthauzo ake.
2. Kuchokera pa zomwe mukuona pa zithunzi zili pamwambapa, mukuganiza kuti mkango ndi nyani akuganizani? Tsimikizirani yankho lanu.

Pamene tikulemba ziganizo, timagwiritsa ntchito zizindikiro za m'kalembedwe zosiyanasiyana molingana ndi zomwe tifuna kuonetsa monga izi: kupuma, kudabwa, kutamula ndi kufunsa. Zizindikirozo ndi zimene zimatchedwa zizindikiro za m'kalembedwe.

### Mitundu ndi ntchito za zizindikiro za m'kalembedwe

Mitundu ndi ntchito za zizindikiro za m'kalembedwe zili motere:

1. Mpumiro .

Ichi ndi chizindikiro chomwe chimasonyeza kupuma chifukwa choti ganizo latha. Mpumiro umaikidwa kumapeto kwa chiganizo.

***Zitsanzo***

- a. Bwerani kuno.
- b. Uzipita kwanu.
- c. Tiziteteza zachilengedwe.

Nthawi zina mpumiro umagwiritsidwa ntchito mu zidule za mayina a anthu.

***Zitsanzo***

- a. Ndaona Bambo A.P. Masasa.
- b. Bukuli linalembedwa ndi J.W. Gwengwe.
- c. Mayi Mphatso C. Chimtengo anali nduna ya boma.

***Kumbutso***

Mpumiro sumaikidwa patsogolo pa mayina a anthu omwe atchulidwa modula (makamaka mayina a maphatikizo oposa aŵiri) pokhapokha ngati mayinawo akumaliza ganizo.

***Zitsanzo***

- a. Maya (Mayamiko) akuthamanga.
- b. Ndakumana ndi Maya.
- c. Gome (Gomezani) wafika kale.

**2. Mpatuliro ,**

Mpatuliro ndi chizindikiro chomwe chimagwiritsidwa ntchito tikafuna kupuma pang'ono pamene tikutchula mawu omwe ali m'mndandanda. Kaŵirikaŵiri mawu a m'mndandandawo amakhala mayina, aloŵam'malo ndi afotokozi.

***Zitsanzo***

- a. Mundigulireko nsomba, mchere, anyezi, kale ndi mafuta ophikira.
- b. Kumsonkhanoko kunali Azungu, Amwenye ndi anthu akuda.
- c. Mwanayo ndi wamfupi, wakuda, wanzeru, waulemu komanso wosekaseka.

Mpatuliro umagwiranso ntchito yopatula nthambi yosaima payokha (ngati nthambi yosaima payokhayo ndiyo yoyamba chiganizo) ku nthambi yoima payokha.

***Zitsanzo***

- a. Popeza mwandiitana, ndabwera.
- b. Ngakhale kunali mvula, iwo anapitabe kuphwando.
- c. Chalaka bakha, nkhuu singatole.

Mpatuliro umagwiranso ntchito yopatula dzina (kapena kapandamneni) wa dzina lapadera.

***Zitsanzo***

- a. Naphiri, mphunzitsi, wabwera.
- b. Zuze, chilombo cham'mudzi, wamenyedwa.
- c. Chilema, mtengo wodabwitsa, uli ku Malosa.

Mpatuliro umaikidwanso pambuyo pa mawu omwe ali m'mtengero m'malo mwa mtamuliro.

***Zitsanzo***

- a. Iye adati, "Chakudza sichiimba ng'oma."
- b. Kodi John anati, "Tikumane poduka mphepo"?
- c. "Chabwino," mayi anayankha, "ndigula nsapatozo."

Mpatuliro umagwiritsidwanso ntchito pofuna kusonyeza dzina kapena mloŵam'malo woitanira.

***Zitsanzo***

- a. Kodi wadya kale, Yamikani?
- b. Zione, bwera kuno.
- c. Iwe, udzanditule mtsuko.

Mpatuliro umagwiritsidwanso ntchito polemba keyala yopingasa. Kumapeto kwa mzere uliwonse mu keyala yopingasa (kumatula mzere wotsiriza) kumakhala mpatuliro.

### ***Chitsanzo***

Kasamba F.P. School,  
Private Bag 8,  
Nkhotakota.

Mpatuliro umagwiritsidwanso ntchito popatula mawu oyankhira (maka aonjezi) ndi mawu otsatira.

### ***Zitsanzo***

- a. Chabwino, mubwere maŵa.
- b. Inde, ndi zoonza kuti ndimamukonda.
- c. Ayi, sindifuna zachipongwe.

3. Mtamuliro :

Mtamuliro ndi chizindikiro chomwe nthawi zambiri chimagwiritsidwa ntchito pofuna kutambasula zomwe zanenedwa kale.

Mtamuliro umatamula (umatchula) mndandanda wa zinthu ndipo umaikidwa patsogolo pa alozi kapena mawu oti ‘monga’ ndi ‘mwachitsanzo’.

### ***Zitsanzo***

- a. Mundigulireko zinthu izi: nsapato, malaya ndi mabuku.
- b. Iye anapambana maphunziro atatu aŵa: Chicheŵa, Chingerezi ndi Chilatini.
- e. Unditengereko izi: mpeni, mbale ndi mphika.

Mtamuliro umagwiranso ntchito yotsekula mawu omwe amayankhulidwa mwachindunji ndi munthu wina ndipo ali m’mtengero.

### ***Zitsanzo***

- a. Zione anati: “Ndifuna kudzakhala mtsogoleri wa dziko.”
- b. Akuluakulu adati: “Ukasowa mng’oma umadya mavu.”
- c. Kamuzu adati: “Chuma cha Malaŵi chili m’nthaka.”

### ***Kumbutso***

Mawu wotamulidwa (wokhala patsogolo pa mtamuliro amayamba ndi lembo laling'ono ngati mawuwo si dzina la mwinimwini kapena mawu oyankhulidwa ndi munthu wina.)

4. Mpumirapang'ono ;  
Mpumirapang'ono umagwiritsidwa ntchito mu chiganizo cha ziganizo zingapo kapena cha nthambi pofuna kupuma motalikirako tisanamalize ganizo. Chizindikirochi chili pakati pa mpatuliro ndi mpumiro.

Chizindikirochi chimaikidwa pamalo pomwe pakanatha kuikidwa alumikizi monga aŵa: 'chifukwa', 'poti', 'popeza' ndi 'kapena' pofuna kulumikiza nthambi za chiganizo.

#### ***Zitsanzo***

- a. M'mudzimo mulibe anthu; onse anasamukamo. (M'mudzimo mulibe anthu chifukwa onse anasamukamo)
- b. Sindikuperekezani; sindinasambe. (Sindikuperekezani poti sindinasambe.)
- c. Tsogolani; sindifuna kuti andione. (Tsogolani popeza sindifuna kuti andione.)

Tingathe kugwiritsanso ntchito mpumirapang'ono m'chiganizo cha ziganizo chomwe chili ndi ziganizo zotsutsana maganizo ngati sitifuna kugwiritsa ntchito alumikizi monga 'koma' ndi 'ngakhale'.

#### ***Zitsanzo***

- a. Ndimakonda therere; mayi anga amadana nalo.
- b. Bambo amasuta fodya; ine sindimasuta.
- c. Iye amandikonda; ine sindimukonda.

Mpumirapang'ono umagwiranso ntchito pofuna kupatula magulu akuluakulu a mawu omwe ali ndi zinthu zomwe zili m'mndandanda ndipo alekanitsidwa ndi mipatuliro.

#### ***Chitsanzo***

Tidzagula nthochi, mbatata ndi buledi kuti tidzadye mmaŵa; mapapaya, mpunga ndi nsomba kuti tidzadye masana; komanso nyama, masakono ndi zakumwa kuti tidzadye ndi kumwa tsiku laphwandolo.

5. Mfunsiro ?

Mfunsiro ndi chizindikiro chomwe chimagwira ntchito pofunsa funso lachindunji.

***Zitsanzo***

- a. Ukuti bwanji?
- b. Kodi mwadya?
- c. Wabwera?

Chizindikiro cha mfunsiro sichigwiritsidwa ntchito mu mafunso opanda chindunji.

***Zitsanzo***

- a. Wandifunsa ngati ndanyamuka kale.
- b. Ndifuna ndidziwe kuti munyamuka liti.
- c. Mundiuzuze kuti mungakonde zotani.

6. Mfuwuliro !

Ichi ndi chizindikiro chimene chimalembedwa patsogolo pa mawu omwe ayankhulidwa mofuwula kapena mokuwa pofuna kusonyeza kudzidzimuka, kudabwa, kumva ululu, kusangalala kapena kunyansidwa

***Zitsanzo***

- a. Hi! Pali njoka.
- b. Kalanga ine! Ndavulala.
- c. Moto kuno! Motoo!

7. Nkhodolero ,

Chizindikirochi chimalembedwa pomwe patsala mpata tikachotsa lembo lina pa mawu, maka lembo lamtsekulanjira (lembo laliwu).

***Zitsanzo***

- a. m'nyanja (mu nyanja)
- b. n'kale (ndi kale)
- c. Cham'gwera (Chamugwera)

Pali maphatikizo ena mu Chichewa omwe amakhala ndi nkhodolero yomwe sisonyeza kuti pachotsedwa lembo koma kuti maphatikizowo ndi madzeram'mphuno.

***Zitsanzo***

- a. ng'amba

- b. kang'wing'wi
- c. ching'wenyeng'wenye

Nthawi zina nkhololero imaikidwa pa mawu pofuna kusiyanyitsa mawuwo ndi mawu ena ofanana nawo m'kalembedwe koma osiyana katchulidwe ndi matanthauzo.

**Chitsanzo:** mbale ndi m'bale  
 mbale : chipangizo chodyeramo  
 m'bale: munthu wobadwa naye bere kapena banja limodzi

7. Mdulamawu -  
 Chizindikirochi chimagwira ntchito zosiyanasiyana monga zotsatira.

a. Kusonyeza maphatikizo opanga mawu

**Zitsanzo**

- i. Lilongwe (Li-lo-ngwe)
- ii. kang'wing'wi (ka-ng'wi-ng'wi)
- iii. mphunzitsi (m-phu-nzi-tsi)

b. Kusonyeza aphatikiri

**Zitsanzo**

- i. mphatikiram'mbuyo : ka- (kanthu), a- (apusi), -na- (anadya), -ku- (tikubwera)
- ii. mphatikiram'tsogolo : -era (tengera), -ana (kondana), -etsetsa (onetsetsa)
- iii. akulitsi : -nso (bweranso), -be (sungabe), -tu (tengatu), -di (munthudi)

c. Polemba magulu a mayina monga aŵa: Mu-, Mi- ; Li-, Ma- ; Ka-, Ti- ; Chi-, Zi-

d. Polemba aneni a phatikizo limodzi monga aŵa: -fa, -gwa, -dya, -mwa, -dza, -cha, -kha

**Kumbutso**

Sitigwiritsa ntchito mdulamawu polemba mawu ophatikizana ndi achibwereza.

**Zitsanzo**

- a. njokaluzi (osati njoka-luzi)
- b. kaŵirikaŵiri (osati kaŵiri-kaŵiri)
- c. tumphatumpha (osati tumpha-tumpha)

8. Mkutiramawu ( )

Chizindikirochi chimagwira ntchito zotsatira.

- a. Kupereka mawu ena ofanana tanthauzo ndi womwe akuyang'anidwa mwachindunji.

**Zitsanzo**

- i. Iye wachita kaguni (manyazi) atamuseka.  
ii. Galu wanu wapha nkhaŵena (nkhanga) yanga.

- b. Kupereka tanthauzo la mawu amatanthauzo apatali monga zining'a.

**Zitsanzo**

- i. Ndi zoona kuti iwo ayenda chogona (amwalira).  
ii. Nkhaniyo yandidulitsa mutu wa zizwa (yandidabwitsa).

- c. Kutambasula langizo kuti limveke bwino.

**Zitsanzo**

- i. Lembani ziganizo zomveka bwino ndi zining'a zotsatirazi kuonetsa kuti mukudziŵa matanthauzo ake (chining'a chimodzi pa chiganizo chimodzi).  
ii. Nyumbayo ndi yosasowā kwenikweni chifukwa ngakhale mwana amaidziŵa. Ngati mungasokere, mutha kufunsa (koma osafunsa anthu okayikitsa).

9. Mtengero “ ”

Ntchito yaikulu ya chizindikirochi ndi kukuta zomwe munthu wina wayankhula (zoyankhula mwini).

**Zitsanzo**

- a. Iye anati, “Kwapsa tonola sudziŵa mtima wa moto.”  
b. “Ndabwera,” John anandiuza, “kudzaona amayi.”  
c. “Kodi mwadya kale?” mnzanga anandifunsa.

Mtengero umagwiritsidwanso ntchito pokuta mitu ya m'buku, ndakatulo, nyimbo, nthano za makolo, nkhani zazifupi ndi nkhani zazitali.

**Zitsanzo**



- a. Onani mu buku la *Mbiri ya Achewa* za “Ufumu wa Mkanthama Mwale” pa tsamba 139.
- b. Ine sindinaŵerengapo ndakatulo yotchedwa “Chilola Wopanda Mano” ndi nkhani yaifupi ya  
“Zina Ukaona”.
- c. Wambali Mkandawire anaimba nyimbo ya “Kavuluvulu”.

Mitengero imaikidwa mu mitundu yaikulu iŵiri iyi: mtengero wa mphini ziŵiriziŵiri (“ ”) ndi mtengero wa mphini imodziimodzi (‘ ’).

#### 1. Mtengero wa mphini ziŵiriziŵiri

Mtengerowu ndi umene umagwiritsidwa ntchito kwambiri. Mtengerowu umagwira ntchito zotsatira.

- a. Kukuta zoyankhula mwini (mawu enieni omwe wina wayankhula)

#### **Zitsanzo**

- i. “Kodi umandikonda?” Chilipo adandifunsa.
- ii. Iye anati, “Mukapanda kusamala, muvutika ndi njala chaka chino.”
- iii. “Ntchito ya uchembere wabwino ndi ya aliyense,” Mfumu Kwataine inatero.
- b. Kuloza mawu a paphata (mawu omwe tifuna kuŵayang’anitsitsa).

#### **Zitsanzo**

- i. Mawu woti “fisi” ali ndi matanthauzo ambiri.
- ii. Kodi mawu woti “nyenyezi” ali ndi maphatikizo angati?
- iii. “Chifwirimbwiti” ndi chiyani?

#### 2. Mtengero wa mphini imodziimodzi

Kaŵirikaŵiri mtengero wa mtunduŵu umagwiritsidwa ntchito pokuta mawu omwe adayankhulidwa ndi munthu wina ndipo ali mu mtengero wina.

#### **Chitsanzo**

Mwanayo anafunsa amake, “Kodi ndi zoona kuti Kamuzu Banda adati, ‘Ndabwera kudzaphwanya chitaganya chonunkha’ atangofika kuchokera ku Mangalande?”

Kaŵirikaŵiri mtengero wa mphini imodziimodzi ndi umene umagwiritsidwa ntchito poloza mawu a paphata (omwe tifuna kuŵayang'anitsitsa).

***Zitsanzo***

- i. Mawu woti 'fisi' ali ndi matanthauzo ambiri.
- ii. Kodi mawu woti 'nyenyezi' ali ndi maphatikizo angati?
- iii. 'Chifwirimbwiti' ndi chiyani?

***Kumbutso***

Alembi ambiri anthano zazitali makonda kugwiritsa ntchito mtengero wa mphini imodziimodzi pokuta zoyankhula mwini.

***Chenjezo***

Ngati mawu omwe ali m'mtengero ndi funso, mfunsiro uzikhala m'kati mwa mtengero.

***Zitsanzo***

- a. "Kodi mwagula nsomba?" Eliza anafunsa bambo ake.
- b. "Mwandionerako ndalama zanga?" iye anafunsa modandaula.

Mfunsiro umaikidwa kumapeto kwa mtengero ngati mawu omwe afuna kudziŵa za mawu omwe ali m'mtengerowo ndi funso.

***Chitsanzo***

Kodi mayi anati, "Kasambe"?

Mawu woti "kasambe" si funso koma mawu oti "Kodi mayi anati".

**MALEMBO AAKULU**

Malembo amalembedwa potsata malamulo. Sitimangolembe malembo chilembelembe. Malembo aakulu ali ndi malo ake omwe ayenera kulembedwapo. Kalembedwe ka malembo aakulu kotsata malamulo kali motere.

1. Pamene tiyamba kulemba chiganizo, mawu woyamba amakhala ndi lembo lalikulu.

***Zitsanzo***

- a. Ulimi wothirira ndi waphindu.

- b. Akuti akupezani posachedwapa.
- c. Chaka chino tibzala mitengo yambiri.

2. Poyamba kulemba mayina a mwinimwini.

***Zitsanzo***

- a. Mtsinje wa Shire ndi waukulu.
  - b. Dziko la Malaŵi ndi lamtendere.
  - c. Ndimapembedza Mulungu mmodzi.
  - d. Tibwera kwanu Lachitatu.
  - e. Ndagula mbewu ya chimanga ya Chitute.
3. Polemba malonje a kalata timayamba kulemba dzina la amene tikumulemba ndi lembo lalikulu ngakhale dzinalo likhale dzina lopanda mwinimwini.

***Zitsanzo***

- a. Okondedwa Bambo ndi Mayi,
  - b. Wokondedwa Bwana,
4. Mu nthano za makolo ndi zisudzo za nyama, mayina a apangankhani komanso a atengambali amayamba ndi malembo aakulu ngakhale akhale mayina opanda mwinimwini.

***Zitsanzo***

- a. Chibwenzi cha Fisi ndi Mkango chinali chachinyengo.
  - b. Mu nthanoyo Kalulu anapusitsa Mvuwu ndi Njovu.
  - c. Mu nkhalango ya Matsano, mnzake wa Fulu anali Kalulu.
5. Mu zoyankhula mwini, mawu a m'mtengero amayamba ndi lembo lalikulu.

***Zitsanzo***

- a. Iwo anakalipa, “Chokani ophunzira osamva!”
- b. Iye anati, “Khalani pansi.”

**Ntchito**

1. Lembani ntchito ziŵiriziŵiri za zizindikiro za m'kalembedwe zotsatira ndipo pa ntchito iliyonse mupereke chitsanzo chanuchanu chimodzi m'chiganizo.
  - a. mpatuliro
  - b. mtamuliro
  - c. mkutiramawu
  - d. mtengero
  - e. mpumirapang'ono
2. Lembani zizindikiro za m'kalembedwe zoyenera mu ziganizo zotsatirazi.
  - a. Iye wati ndikudziŵa zomwe mwabisa.
  - b. Mundigulireko zinthu izi mabuku, zolembera ndi nsapato.
  - c. Bwera kuno, iye adamuza mwanayo.
  - d. Sindidya mwandinyoza.
  - e. Ndibwere liti
3. Lembani zizindikiro za m'kalembedwe zoyenera komanso mawu aakulu oyenera mu kandimeyi:

Mu malawi muno amayi ena maka akumudzi amalimbikitsa miyambo ya makolo yoipa yomwe imachititsa abambo ena kuti azichitira nkhanza amayi ndi atsikana mwachitsanzo amayi ena amalimbikitsa anamwali kutsata miyambo yoipa yomwe imapereka mpata kwa amuna ena kuti azichitira nkhanza ana aakazi amayi ena amalimbikitsa nkhanza kupyolera mu nyimbo, monga ya kapidira, ndi malangizo kwa akwatibwi kuti azikamvera ndi kupirira ngakhale amuna awo azikaŵazunza.

## CHIGANIZO



### Kuganiza mozama

1. Fotokozani zomwe mukuona kuti zikuchitika pa chithunzi chili pamwambapa. Ganizo lililonse likhale palokha.
2. Kuchokera pa njira zopangira mayina zosiyanasiyana zomwe munaphunzira, pangani mayina anuanu kuchokera ku mneni 'ganiza'.

Chiganizo ndi mawu kapena gulu la mawu lokhala ndi mneni ndipo limapereka ganizo lathunthu.

### Zitsanzo

1. Ndakhuta.

2. Ine ndadya nsima.
3. Mtengo uja wagwa.
4. Katangale ndi woipa.

Mawu ofunikira kwambiri kuti chiganizo chimveke bwino komanso kupereka tanthauzo ndi aŵa: mchitantchito, mneni (ndi mchitidwantchito). Komabe si ziganizo zonse zomwe zimakhala ndi mchitidwantchito.

Nthawi zina chiganizo chitha kukhala ndi zigawo zonse zofunikira (mchitantchito ndi mneni) koma sichitha kupereka ganizo logwira mtima poganizira zochitika tsiku ndi tsiku. Kaŵirikaŵiri zoterezi zimachitika mu nkhani zamchezo ndi zolembedwa ndipo n'zovomerezeka chifukwa alembi amakhala ndi ufulu wotero.

### ***Zitsanzo***

1. Kamuzu ndi mkango.
2. Nkhalango ikuvina.
3. Joni wasenza phiri la Zomba.

### **Magawo a chiganizo**

Chiganizo chilichonse chimakhala ndi magawo aakulu aŵiri. Magawo aŵiriwo ndi aŵa: gawo losonyeza yemwe wachita ntchito ndi gawo losonyeza ntchito yomwe yachitika. Gawo losonyeza yemwe wachita ntchito limatchedwa 'mchitantchito' (mwininkkani) ndipo gawo lomwe limasonyeza ntchito yomwe yachitika limatchedwa 'mnenankhani'.

### ***Zitsanzo***

1. Uyu si mnzanga.
2. Mwana wadya phala.
3. Munthu waulesi satukula dziko.
4. Amayi ndi abambo apita kumunda.
5. Mvula yamasiku ano ndi yanjomba.

<b>Mchitantchito (mwinkhani)</b>	<b>Mnenankhani</b>
----------------------------------	--------------------

1. Uyu	si mnzanga
2. Mwana	wadya phala
3. Munthu waulesi	satukula dziko
4. Amayi ndi abambo	apita kumunda
5. Mvula yamasiku ano	ndi yanjomba

Kaŵirikaŵiri mchitantchito wa chiganizo amatha kukhala dzina, kapena kapandamneni wa dzina kapenanso mloŵam'malo.

## **Mitundu ya ziganizo**

Ziganizo zimaikidwa mu mitundu yaikulu yotsatira.

### **1. Chiganizo chopanda nthambi**

Chiganizo chopanda nthambi chimakhala ndi mchitantchito ndi mnenankhani mmodzi. Mnenankhani mmodziyo amakhala ndi mneni weniweni mmodzi. Chiganizochi ndi nthambi yoima payokha basi.

#### ***Zitsanzo***

- Mphaka wapha khoswe.
- Nyengo ikusintha.
- Kodi mwagula nsalu ija?

### **2. Chiganizo cha ziganizo zingapo**

Chiganizo cha ziganizo zingapo chimakhala ndi ziganizo zina m'kati mwake. Ziganizo zingapozo zimalunzanitsidwa ndi mlumikizi. Mnenankhani wa chiganizochi amakhala ndi aneni angapo.

#### ***Chitsanzo***

Ine ndadya nsima ndipo ndakhuta.

Mu chiganizo chili pamwambapa muli ziganizo ziŵiri: Ine ndadya nsima ndi (Ine) ndakhuta. Ziganizo ziŵirizi zalunzanitsidwa ndi mlumikizi 'ndipo'.

#### ***Zitsanzo zina***

- a. Agogo ake sasuta fodya koma amamwa moŵa.
- b. Ife talemba mayeso ndipo tipambama.
- c. Alendo athu anabwera koma akhumudwa choncho apita kwawo.

Ziganizo zomwe zimapanga chiganizo cha ziganizo zingapo zimakhala ziganizo zopanda nthambi.

### 3. Chiganizo cha nthambi

Chiganizo cha nthambi chimakhala ndi nthambi yoima payokha ndi nthambi yosaima payokha.

Nthambi ya chiganizo ndi gulu la mawu m'chiganizo lomwe limakhala ndi mnene wakewake.

#### ***Zitsanzo***

- a. N'zoona kuti atolankhani athu ali ndi ufulu.
- b. Mbuzi zanga ndazipeza patapita masiku atatu.
- c. Akaphika nsima, tidya.

Mu (a) nthambi za chiganizo ndi izi:

- i. N'zoona
- ii. kuti atolankhani athu ali ndi ufulu

Mu (b) nthambi za chiganizo ndi izi:

- i. Mbuzi zanga ndazipeza
- ii. patapita masiku atatu

Mu (c) nthambi za chiganizo ndi izi:

- i. Akaphika nsima
- ii. tidya

#### ***Chenjezo***

Tisasokoneze 'chiganizo cha ziganizo zingapo' ndi 'chiganizo cha nthambi'. Ziganizo zomwe zimapanga chiganizo cha ziganizo zingapo zimatha kuima pazokha n'kupereka ganizo pomwe chiganizo cha nthambi chimakhala ndi chiganizo chimodzi chokha chopereka ganizo ndipo kagulu kena ka mawu kokhala ndi mnene kamadalira chiganizo chimodzicho kuti kapereke ganizo.



#### 4. Chiganizo cha ziganizo zanthambi

Chiganizochi chimakhala ndi nthambi yoima payokha imodzi ndi nthambi zosaima pazokha zingapo.

##### ***Chitsanzo***

Tili m'tulo, mbava zinaloŵa m'nyumba ngakhale panja panali alonda.

Mu chiganizo chili pamwambachi, nthambi yoima payokha ndi 'mbava zinaloŵa m'nyumba.' Tikaonetsetsa bwino mu chiganizochi muli nthambi zosaima pazokha ziwiri izi: 'tili m'tulo' ndi 'ngakhale panja panali alonda.'

##### ***Zitsanzo zina***

- a. Gogo Chirwa anadodoma zedi atamva Mzungu akuyankhula Chitonga popeza adali asadamvepo  
zotere.
- b. Ngakhale anatipeza tisanayambe kudya, iwo sanadye nafe chifukwa sadya kwa eni.
- c. Mvula ikagwa bwino, tikolola chimanga chambiri poti tachita zonse zofunikira zomwe mlangizi  
anatiuza.

Chiganizo cha ziganizo za nthambi zingapo chilichonse chili motere:

<b>Chiganizo (Nthambi yoima payokha)</b>	<b>Nthambi zingapo mu chiganizo</b>
1. Gogo Chirwa anadodoma zedi	a. atamva Mzungu akuyankhula Chitonga b. popeza adali asadamvepo zotere
2. Iwo sanadye nafe	a. ngakhale anatipeza tisanayambe kudywa b. chifukwa sadya kwa eni
3. Tikolola chimanga chambiri	a. mvula ikagwa bwino b. poti tachita zonse zofunikira c. zomwe mlangizi anatiuza

Mudzaphunzira zambiri za nthambi za chiganizo mu gawo la ‘Nthambi za chiganizo’.

## **Kuphwanya chiganizo chopanda nthambi**

Chiganizo chopanda nthambi chimatheka kuphwanyidwa mu zigawo za mawu kapena magulu a mawu omwe adachipanga. Pophwanya chiganizo chopanda nthambi timaona mfundo zotsatirazi.

1. Kusanthula mchitantchito ndi mchitidwantchito

### ***Zitsanzo***

- a. Iye ndi Taonere apita kwawo dzulo.
- b. Nyama zakutchire zimakopa alendo.
- c. Makolo anga amandipatsa malangizo abwino nthawi zonse.

<b>Mchitantchito</b>	<b>Mchitidwantchito</b>
a. Iye ndi Taonere	apita kwawo dzulo
b. Nyama zakutchire	zimakopa alendo
c. Makolo anga	amandipatsa malangizo abwino nthawi zonse

2. Kusanthula mchitantchito, mchitidwantchito, mnene ndi ziwonjezero zawo
  - a. Chiwonjezero cha mchitantchito ndi mawu kapena kagulu ka mawu kamene kamafotokoza zambiri za mwininkhani
  - b. Chiwonjezero cha mchitidwantchito ndi mawu kapena kagulu ka mawu kamene kamakamba zambiri za mchitidwantchito
  - c. Chiwonjezero cha mnene ndi mawu kapena kagulu ka mawu kamene kamakamba zambiri za mnene. Kawirikaŵiri chiwonjezero cha mnene chimakhala muonjezi kapena kapandamneni wa muonjezi.

### ***Zitsanzo***

- a. Ana omva mwambo sanyoza makolo awo nthawi zonse.
- b. Iye tonse tagula zinthu zabwino motchipa kumsika.
- c. Mtsikana wokongola uja anaba mafuta onunkhira dzulo kusitolo.

<b>Mchitantchito</b>	<b>Chiwonjezero cha Mchitantchito</b>	<b>Mneni</b>	<b>Chiwonjezero cha mneni</b>	<b>Mchitidwantchito</b>	<b>Chiwonjezero cha Mchitidwantchito</b>
Ana	omva mwambo	sanyoza	nthawi zonse	makolo	awo
Ife	tonse	tagula	motchipa kumsika	zinthu	zabwino
Mtsikana	wokongola uja	anaba	kusitolo dzulo	mafuta	onunkhira

## **Nthambi ya chiganizo**

Nthambi ya chiganizo ndi gulu la mawu m'chiganizo lomwe limakhala ndi mchitantchito (mwininkhani) ndi mnenankhani.

### ***Chitsanzo***

Iye anabwera dzulo dzuwa likuloa kumene.

Mu chitsanzo chili pamwambapa muli magulu awiri a mawu: 'Iye anabwera dzulo' ndi 'dzuwa likuloa kumene.'

Gulu lililonse la mawuwa lili ndi mchitantchito ndi mnenankhani wakewake.

Mu gulu loyamba, mchitantchito ndi 'Iye' ndipo mnenankhani ndi 'anabwera dzulo'.

Mu gulu lachiwiri, mchitantchito ndi 'dzuwa' ndipo mnenankhani ndi 'likuloa kumene'.

Mneni wa mnenankhani mu gulu loyamba la mawu ndi 'anabwera' ndipo mneni wa mnenankhani mu gulu lachiwiri la mawu ndi 'likuloa'.

## **Mitundu ya nthambi za chiganizo**

Pali mitundu iwiri ya nthambi za chiganizo: nthambi yoima payokha ndi nthambi yosaima payokha.

#### 1. Nthambi yoima payokha

Nthambi yoima payokha ndi gulu la mawu lokhala ndi mchitantchito wa chiganizo ndi mnenankhani wogwirizana ndi mchitantchito. Nthambi yoima payokha imakhala yodzidalira chifukwa imapereka ganizo lathunthu payokha.

##### ***Chitsanzo***

Nkhanga zinapangana kunja kusanapse.

M'chitsanzochi mchitantchito wa chiganizo ndi 'Nkhanga' ndipo mnenankhani yemwe akugwirizana ndi mchitantchito ndi 'zinapangana'. Mogwirizana ndi tanthauzo la nthambi yoima payokha ndiye kuti m'chitsanzochi, nthambi yoima payokha ndi 'Nkhanga zinapangana' chifukwa ikupereka ganizo lomveka bwino poyerekeza ndi nthambi ina yomwe yatsala: 'kunj kusanapse'.

#### 2. Nthambi yosaima payokha

Nthambi yosaima payokha ndi gulu la mawu lokhala ndi mchitantchito (osati wa chiganizo) ndi mnenankhani koma nthambiyi simadzidalira kuti ipereke ganizo lathunthu. Nthambiyi imadalira nthambi yoima payokha kuti ipereke ganizo.

##### ***Chitsanzo***

Nkhanga zinapangana kunja kusanapse.

Mu chiganizo 'Nkhanga zinapangana kunja kusanapse', nthambi yomwe sikuima payokha ndi 'kunj kusanapse'. Nthambiyi ndi nthambi yosaima payokha ndipo ikudalira nthambi yoima payokha (Nkhanga zinapangana) kuti ipereke ganizo.

##### ***Zitsanzo zina***

1. Ndi zoona zoti iye ndi mnzanga.
2. Galimoto yomwe agula yachita ngozi.
3. Ngakhale ulire, sindikupatsa ndalamazo.
4. Mvula ikugwa mwanjomba chifukwa nyengo ikusinth.
5. Mmene unkabwera, udali mwana wabwino.

<b>Nthambi yoima payokha</b>	<b>Nthambi yosaima payokha</b>
1. Ndi zoona	zoti iye ndi mnzanga
2. Galimoto yachita ngozi	yomwe agula
3. Sindikupatsa ndalamazo	ngakhale ulire
4. Mvula ikugwa mwanjomba	chifukwa nyengo ikusinth
5. Udali mwana wabwino	mmene unkabwera

## **Mitundu ya nthambi zosaima pazokha**

Nthambi zosaima pazokha zimaikidwa mu mitundu yakeyake itatu yotsatira: nthambi ya dzina, nthambi ya mfotokozi ndi nthambi ya muonjezi.

### **1. Nthambi ya dzina**

Nthambi ya dzina ndi nthambi yosaima payokha yomwe imagwira ntchito ngati dzina. Nthambiyi ndi yankho la funso ‘chiyani’ kapena ‘kuti chiyani’ kapenanso ‘-yani’ ndi ‘-ti’?

#### ***Chitsanzo***

Ndi zabodza zoti Joni wabwera.

- Ndi zabodza.
- Ziti (zoti chiyani)?
- Zoti Joni wabwera.

Choncho ‘zoti Joni wabwera’ ndi nthambi ya dzina.

#### ***Zitsanzo zina***

- Sadaulule zomwe anagwirizana.
- Unene chomwe chayambitsa mkanganowu.
- Zoti amadyera nyama, si zachilendo.
- Ndimadziwa kuti atolankhani ena amalemba zopsetsa mtima.
- Ife tamva zimene mwapangana.

## Ntchito za nthambi za dzina

Nthambi za dzina zimagwira ntchito zosiyanasiyana monga zotsatira.

1. Kukhala mwininkhani (mchitantchito)

### *Zitsanzo*

- a. Zomwe wachita zatikhumudwitsa.
- b. Mwatengazo ndi zakuba.
- c. Wochita izi, sadzapulumuka.

2. Kukhala pamtherankhani (mchitidwantchito)

Nthambi za dzina zimatha kukhala apamtherankhani (amchitidwantchito) otsatira.

- a. Kukhala pamtherankhani (mchitidwantchito) wachindunji

### *Zitsanzo*

- i. Iye wakolola zomwe anabzala.
- ii. Andiuza kuti safuna zachipongwe.
- iii. Mundisankhire zimene ndimakonda.

- b. Kukhala pamtherankhani (mchitidwantchito) wopanda chindunji

### *Zitsanzo*

- i. Iye wamuphikira phala mwana amene akudwala.
- ii. Ife taŵathamangitsira agogo anyani omwe amawavutitsa.
- iii. Ndamusankhira Maliya zimene ndimakonda.

- c. Kukhala pamtherankhani (mchitidwantchito) wa mperekezi

### *Zitsanzo*

- i. Anakhutitsidwa ndi zomwe ndinamufotokozera.
- ii. Mupereke mwayi kwa aliyense yemwe angafune.
- iii. Tikhale tcheru ku zimene ayankhule.

3. Kukhala mtsirizitsi wa mnani

### ***Zitsanzo***

- i. Izi ndi zomwe umafuna.
- ii. Zinthu wagulazo si zimene ndinakutuma.
- iii. Kamuzu anali munthu yemwe ankakonda ulimi.

### ***Kumbutso***

Tinafotokoza kale kuti aneni odalira ‘ndi’ ndi ‘si’ komanso mnene wothandizira ‘-li’ sapereka ganizo pawokha. Ichi ndicho chifukwa chake nthambi zoima pazokha ‘Izi ndi’, ‘Zinthu wagulazo si’ ndi ‘Kamuzu anali’ sizikupereka ganizo lathunthu.

#### **2. Nthambi ya mfotokozi**

Nthambi ya mfotokozi ndi nthambi yosaima payokha yomwe imagwira ntchito ngati mfotokozi. Nthambiyi imakamba zambiri za dzina kapena mloŵam’malo.

Nthambiyi ndi yankho la funso ‘-ti?’ kapena ‘-tani?’. Nthawi zambiri nthambiyi imayamba ndi mawu a mgwirizano (ochokera ku masinde ‘-mene’ kapena ‘-mwe’).

### ***Zitsanzo***

- a. Zitatu zomwe zaphedwa ndi zanga.
- b. Ntchito imene munandilonjeza si imeneyi.
- c. Kumudzi komwe ndinabadwira ndi kuno.
- d. Msungwana akubwera apoyo sindimudziŵa.
- e. Munthu wofuna kupambana mayeso ayenera kulimbikira.

Mu chiganizo (a) nthambi ya mfotokozi ikukamba zambiri za mloŵammalo ‘zitatatu’.

Mu chiganizo (b) nthambi ya mfotokozi ikukamba zambiri za dzina ‘ntchito’.

Mu chiganizo (c) nthambi ya mfotokozi ikukamba zambiri za dzina ‘kumudzi’.

Mu chiganizo (d) nthambi ya mfotokozi ikukamba zambiri za dzina ‘msungwana’.

Mu chiganizo (e) nthambi ya mfotokozi ikukamba zambiri za dzina ‘munthu’.

Mu zitsanzo (d) ndi (e) mawu a mgwirizano sanalembedwe.

#### **3. Nthambi ya muonjezi**

Nthambi ya muonjezi ndi nthambi yosaima payokha imene imagwira ntchito ngati muonjezi.

Nthambiyi ili ndi mitundu yakeyake yambiri molingana ndi ntchito zomwe nthambizo zimagwira. Mitundu ndi ntchito zili motere:



a. Nthambi ya muonjezi wa mchitidwe  
Nthambiyi imatidziwitsa momwe ntchito yachitikira poyankha funso ‘bwanji’ kapena ‘motani’.

***Zitsanzo***

- i. Amaimba monga mmene amaimbira amake.
- ii. Iye akuyenda ngati watopa.
- iii. Mphaka amadya monga safuna.

b. Nthambi ya muonjezi wa malo  
Nthambiyi imatidziwitsa komwe ntchito inachitikira poyankha limodzi mwa mafunso aŵa: ‘pati’, ‘poti’, ‘kuti’ kapena ‘muti’.

***Zitsanzo***

- i. Komwe wachedwa msulu, kuli nyerere.
- ii. Mubzale mbewuzo momwe muli chinyontho.
- iii. Ndabisa ndalamazo pamene wina sangazione.

c. Nthambi ya muonjezi wa nthawi  
Nthambiyi imatidziwitsa za nthawi yomwe ntchito inachitika ndipo imayankha funso ‘liti’ kapena ‘nthawi yanji’.

***Zitsanzo***

- i. Mmene munkabwera, munali anthu abwino.
- ii. Iye anadabwa madzi atamufika m’khosi.
- iii. Nthawi yomwe mwamva m’mimba, imwani mankhwala.

d. Nthambi ya muonjezi wa chifukwa  
Nthambiyi imatidziwitsa ‘chifukwa’ chochitira ntchito. Kaŵirikaŵiri nthambiyi imayankha funso loti ‘chifukwa chiyani’ kapena ‘chifukwa ninji’.

***Zitsanzo***

- i. Wamenyedwa chifukwa anamuyamba wodwala misala.
- ii. Popeza mwandinyoza, sindidya nsima yanu.
- iii. Papsa tonola poti sudziŵa mtima wa moto.

e. Nthambi ya muonjezi wa cholinga

Nthambiyi imatiuza ‘cholinga’ chogwirira ntchito. Nthawi zambiri nthambiyi imayankha funso loti ‘chifukwa chiyani’ (ngakhale simanena za ‘chifukwa’ koma za ‘cholinga’). Kaŵirikaŵiri nthambiyi imayamba ndi mawu woti ‘kuti’.

### ***Zitsanzo***

- i. Yesu anafa kuti tipulumuke.
- ii. Bwerani mudzaone zomwe ndakugulirani.
- iii. Akuphunzira n’cholinga choti achotse umbuli.

f. Nthambi ya muonjezi wolabadira

Nthambiyi imayamba ndi mawu monga aŵa: ‘ngakhale’ (kapena nthambi zake ‘chingakhale’, ‘kungakhale’, ‘angakhale’) ndi ‘chinkana’.

### ***Zitsanzo***

- i. Sindipitabe ngakhale mundinyengerere.
- ii. Angakhale mukane chakudyachi, mwalepherabe mayeso.
- iii. Chinkana mulire, sindikuthandizanibe.

g. Nthambi ya muonjezi wa pokhapokha

Nthambiyi imayonetsa kuti ntchito ichitika ina ikachitika. Nthambiyi imatha kuyamba ndi mawu monga aŵa: ‘ngati’, ‘pokhapokha’ ndi ‘mpaka’. Nthawi zina mnene wa m’nthambiyi amakhala ndi mphatikiri ‘-ka-’ kapena ‘-ta-’.

### ***Zitsanzo***

- i. Sindipita kuphwandoko pokhapokha andiitane.
- ii. Ngati abwera, ndipita nawo ku Lilongwe.
- iii. Mutagwira ntchitoyo mwaluso, ndingakulipireni moyenera.

Pamene tigwiritsa ntchito mphatikiri ‘-ta-’ pofuna kuonetsa upokhapokha, tiyenera kukumbukira kuti mnene wa nthambi yoima payokha azikhala ndi mphatikiri ‘-nga-’.

### ***Zitsanzo***

- i. Atabwera, ndingasangalale.
- ii. Mungayankhe mosavuta atakufunsani.
- h. Nthambi ya muonjezi wa zotsatira

Nthambiye imatisonyeza zotsatira zomwe zimaoneka chifukwa chogwira ntchito ina yake.

### ***Zitsanzo***

- i. Joni waledzera kwabasi moti akungodzigwetsa.
- ii. Amalaŵirira kwambiri kotero simungamupeze.
- iii. Mwana wanu anandipsetsa mtima kwambiri mpaka ndamukalipira.

## **Kuphwanya chiganizo pounika mawu pawokhapawokha**

Kuphwanya chiganizo pounika mawu pawokhapawokha ndi ntchito yozukuta mawu opanga chiganizo pawokhapawokha. Mawu aliwonse amaunikidwa pawokha poona chilichonse chokhudza mawuwo.

Pamene tikuphwanya chiganizo tiyenera kuunika mtundu uliwonse wa mawu motere:

Dzina	: mtundu, chachimuna kapena chachikazi, ntchito, chimodzi kapena zambiri ndi gulu
Mloŵam'malo	: mtundu, chimodzi kapena zambiri ndi ntchito
Mfotokozi	: mtundu
Mneni	: mtundu, kanenedwe, nthawi ndi kachitidwe
Muonjezi	: mtundu
Mlumikizi	: mtundu ndi ntchito
Mperekezi	: mtundu ndi ntchito
Mvekero	: gulu ndi mtundu
Mfuwu	: mtundu ndi ntchito

### ***Zitsanzo***

1. Iye wagula chipewa choyera mbee.
  - a. Iye : mloŵam'malo, wadzina lakelake, wakaloza wina, mchitantchito, chimodzi
  - b. wagula : mneni, woyambukira, kanenedwe kofotokoza, nthawi yatsopano yathayi,

- kachitidwe ka wochita
- c. chipewa : dzina, lopanda mwinimwini, si chachimuna kapena chachikazi, mchitidwantchito, chimodzi, Chi-, Zi-
  - d. choyera : mfotokozi, wamaonekedwe
  - e. mbee : mvekero, waphatikizo limodzi, wamaonekedwe
2. Hede! Mkwatibwi ndi mkwati adzabwera pa njinga ziŵiri maŵa.
- a. hede : mfuwu, kusangalala
  - b. mkwatibwi : dzina, lopanda mwinimwini, chachikazi, mchitantchito, chimodzi, Mu-, A-
  - c. ndi : mlumikizi, kuphatikiza
  - d. mkwati : dzina, lopanda mwinimwini, chachimuna, mchitantchito, chimodzi, Mu-, A-
  - e. adzabwera : mneni, wosayambukira, kanenedwe kofotokoza, nthawi yam'tsogolo,
- kachitidwe ka wochita
- f. pa : mperekezi, kusonyeza chipangizo
  - g. njinga : dzina, lopanda mwinimwini, si chachimuna kapena chachikazi, mchitidwantchito wa mperekezi, zambiri, I-, Zi-
  - h. ziŵiri : mfotokozi, wochuluka wamaŵerengo
  - i. maŵa : muonjezi, wanthawi

## Ntchito

1. Kodi 'chiganizo' ndi chiyani?
2. N'chifukwa chiyani mneni ndi wofunikira kwambiri mu chiganizo chilichonse?
3. Tchulani mitundu inayi ya ziganizo ndipo pa mtundu uliwonse mupereke chitsanzo chanuchanu chimodzi.
3. Tchulani mitundu ya ziganizo zotsatira.
  - a. Amene waba buku langa, ndamuona.
  - b. Ndabwera kuti mundithandize.
  - c. Iye wagwa.

- d. Pakati pausiku anthu ali m'kafe kumudziko kudamveka mkuwe chifukwa kunagwa mphenzi.
- e. Ndadya ndipo ndakhuta.
5. Kodi mvekero ndi chiganizo? Tsimikizirani yankho lanu.
6. Phwanyani ziganizo zopanda nthambi zotsatirazi.
- Munthu wakatangale satukula dziko lake.
  - Amayi ndi abambo anga anapita ku Lilongwe dzulo.
  - Mvula yamasiku ano ikugwa mwanjomba kwambiri.
7. Kodi 'nthambi ya chiganizo' ndi chiyani?
8. Tchulani mitundu iwiri ya nthambi za chiganizo ndipo pa mtundu uliwonse mupereke chitsanzo
- chanuchanu chimodzi.
9. Fotokozani ntchito zitatu za nthambi ya dzina ndipo pa ntchito iliyonse mupereke chitsanzo
- m'chiganizo.
10. Lembani mzere kungsi kwa nthambi zosaima pazokha mu ziganizo zotsatira ndipo mutchule
- mitundu yawo.
- Zimene adanena mwanayo zidali zogwira mtima.
  - Tikagona komwe kukatidere.
  - Ngati subwera msanga, sundipeza.
  - Mnyamata amene akupita apoyo ndi mlendo.
  - Sindidziwa chimene chayambitsa nkondoyo.
  - Ndi mwana wamkazi wabadwa m'chikutamu.
  - Muphike nsima tidye.
11. Kodi ndi zoona kuti nthambi yoima payokha ndi mtundu wa chiganizo? Tsimikizirani yankho
- lanu popereka chitsanzo.
12. Mu chiganizo chotsatira muli nthambi zosaima pazokha zingapo. Tchulani nthambizo komanso

mitundu yawo.

Pamene ankabwera, adadzera njira yatsopano yomwe ndi yaitali ngakhale ankafuna kudzera njira yachidule, chifukwa adaopa zomwe adamva zoti njira yakaleyo ndi yoŵirira kwambiri moti achifwamba sasoŵa pobisala ngakhale dzuŵa likuswa mtengo.

13. Phwanyani ziganizo zotsatirazi pounika mawu pawokhapawokha.

- a. Naphiri amasunga ndalama.
- b. Nyanja ya Chilwa ikuphwerera.
- c. Ngozi zachilengedwe zikuchuluka.
- d. Tizipereka magari kuchipatala.
- e. Katangale ndi woipa kwambiri.

## KAPANDAMNENI



### Kuganiza mozama

Yerekezani kuti wina wakuimbirani foni ndipo mawu omwe iye wayankhula ndi omwe ali pa chithunzipo.

1. Kodi zomwe munthuyo wayankhula, zikupereka ganizo? Tsimikizirani yankho lanu.
2. Mukuganiza kuti munthuyo amafuna kukuuzani nkhani yanji?

Kapandamneni ndi mawu kapena gulu la mawu lothandiza kupanga chiganizo ndipo limagwira ntchito ngati mtundu umodzi wa mawu koma silipereka ganizo chifukwa pafupifupi nthawi zonse silikhala ndi mnene.

### ***Chitsanzo***

Mnyamata wonyozeka uja anapeza ntchito yabwino kwambiri chaka chatha ku Balaka.

Mu chiganizo chili pamwambapa, mneni ‘anapeza’ akachotsedwa, mupeza kuti muli magulu a mawu monga aŵa:

1. mnyamata wonyozeka uja
2. wonyozeka uja
3. ntchito yabwino kwambiri
4. yabwino kwambiri
5. chaka chatha
6. ku Balaka

Magulu a mawuwo ndi akapandamneni chifukwa akugwira ntchito ngati mtundu umodzi wa mawu koma sakupereka ganizo pa iwo wokha.

### **Mitundu ya akapandamneni**

Mitundu ya akapandamneni imachokera pa ntchito zomwe gulu la mawu limagwira.

Mitunduyo ili motere:

1. Kapandamneni wa dzina

Ili ndi gulu la mawu lomwe limagwira ntchito ngati dzina ndipo limayamba ndi dzina kapena mloŵam’ malo (popeza mloŵam’ malo amaimira dzina).

### ***Zitsanzo***

- a. Ine ndi bambo anga tipita kumunda.
- b. Galu wagwira nkhuku yachitopa ija.
- c. Wandimenya ndi ndodo yachitsulo.
- c. Mwana wa a Bengo, bwera kuno.
- d. Ndimakhala kwa Mfumu Tandwe.

### ***Ntchito za kapandamneni wa dzina***

Kapandamneni wa dzina amagwira ntchito zosiyanasiyana zomwe mayina amagwira mu ziganizo. Ntchitozo ndi monga zotsatira.



Ntchito ya kapandamneni wa dzina	Chitsanzo cha kapandamneni
1. Kukhala mchitantchito	<u>Bambo</u> ndi <u>bambo</u> akuphika.
2. Kukhala mchitidwantchito	Galu wagwira <u>nkhuku yachitopa ija</u> .
3. Kukhala olandirira chinthu	Ndamugulira <u>mwana wanu</u> malaya.
4. Kukhala mwini chinthu	Ichi ndi chuma cha <u>mkazi wamasiye</u> .
5. Kukhala mchitidwantchito wa mperekezi	Wandimenya ndi <u>ndodo yachitsulo</u> .
6. Kukhala mawu apadera	Nadzimbiri, <u>mwana waulemu</u> , wabwera.
7. Kukhala mtsirizitsi	Malaŵi ndi <u>dziko lamtendere</u> .
8. Kuitanira	<u>Mwana wa a Bengo</u> , bwera kuno.
9. Kusonyeza malo	Apita kwa <u>Mfumu yaikulu Gomani</u> .

## 2. Kapandamneni wa mfotokozi

Ili ndi gulu la mawu lomwe limagwira ntchito ngati ngati mfotokozi popeza limakamba zambiri za dzina kapena mloŵam'malo.

### *Zitsanzo*

- Mpeni wanga watsopano uja wasoŵa.
- Wandiphikira nsima yolumpha moto.
- Mwana wanu wamng'ono akucheza ndi mzungu.
- Zitatu zamaŵangamaŵanga zija zapezeka.
- Munthu wosasunga mwambo salemekezedwa.

Mu (a) gulu la mawu 'wanga watsopano uja' likukamba zambiri za dzina 'mpeni'.

Mu (b) gulu la mawu 'yolumpha moto' likukamba zambiri za dzina 'nsima'.

Mu (c) gulu la mawu 'wanu wamng'ono' likukamba zambiri za dzina 'mwana'.

Mu (d) gulu la mawu ‘zamaŵangamaŵanga zija’ likukamba zambiri za mloŵam’ malo ‘zitanu’.  
 Mu (e) gulu la mawu ‘wosasunga mwambo’ likukamba zambiri za dzina ‘munthu’.

### 3. Kapandamneni wa muonjezi

Ili ndi gulu la mawu lomwe limagwira ntchito ngati muonjezi.

#### ***Zitsanzo***

- Iwo amayankhula mopsetsa mtima.
- Mada wabisala kuseri kwa nyumba.
- Ife tabwera dzulo usiku kwambiri.

### 4. Pandamneni wa mfuwu

Ili ndi gulu ka mawu lomwe limagwira ntchito ngati mfuwu.

#### ***Zitsanzo***

- Kalanga ine! Ndiwo zija zapserera.
- Hede! Tidyera nyama.
- Amayi koto! Ndikufa.

#### ***Ntchito za kapandamneni wa mfuwu***

Kapandamneni wa mfuwu amagwira ntchito zosiyanasiyana zomwe mifuwu imagwira mu ziganizo. Ntchitozo ndi monga zotsatira.

<b>Ntchito ya kapandamneni wa mfuwu</b>	<b>Chitsanzo cha kapandamneni</b>
1. Kusonyeza kudabwa	<u>Aaa kani!</u> Sindinadziŵe kuti zatero.
2. Kusonyeza kudandaula	<u>Kalanga ine!</u> Ufa wanga wanyowa.
3. Kusonyeza kusangalala	<u>Hehede yulu!</u> Tidyera nyama.
4. Kusonyeza kumva ululu	<u>Mayo ine!</u> Ndavulala.
5. Kusonyeza kuvomereza	<u>Odini nthuni!</u> Fikani.
6. Kusonyeza kukopa chidwi	Gulu lathu, <u>motomoto lero!</u>
7. Kusonyeza kulimbikitsa	<u>Psa gwira!</u> Tidyere nyama.

5. Kapandamneni wa dzina lochokera ku mnene

Dzina lochokera ku mnene ndi dzina lomwe limapangidwa pophatikiza mphetikiram'mbuyo 'ku-' ku mnene.

Kapandamneni wa dzina lochokera ku mnene ndi gulu la mawu lomwe limayamba ndi dzina lopangidwa kuchokera ku tsinde la mnene pophatikiza 'ku-' ku tsindelo ndipo limagwira ntchito ngati dzina. Kapandamneniyu amakhala pamalo pomwe dzina kapena mloŵam'malo atha kukhala.

***Zitsanzo***

- a. Kuthandiza olumala ndi chinthu chabwino.
- b. Kusamalira zachilengedwe ndi udindo wa aliyense.
- c. Ife tatopa ndi kumvera nyimbo zimenezo.
- d. Kuchita katangale kumapweteketsa anthu osalakwa.

Kapandamneni wa dzina lochokera ku mnene amagwira ntchito zina zomwe mayina kapena aloŵam'malo amagwira.

6. Kapandamneni wa mperekezi

Ili ndi gulu la mawu lomwe limagwira ntchito ngati mperekezi.

***Zitsanzo***

- a. Ndakumana ndi munthu wodabwitsa kwambiri.
- b. Iye wadya phala la mwana.
- c. Ku Blantyre kuli nyumba zamakono.
- d. Nonsenu bwerani kwa ine.
- e. Mayi uja adakwatiwa ndi mzungu.

***Ntchito za kapandamneni wa mperekezi***

Kapandamneni wa mperekezi amagwira ntchito zosiyanasiyana zomwe aperekezi amagwira mu ziganizo. Ntchitozo ndi monga zotsatira.

<b>Ntchito ya kapandamneni wa mperekezi</b>	<b>Chitsanzo cha kapandamneni</b>
1. Kusonyeza mbali kapena malo	Iye amakhala <u>ku Ekwendeni</u> .
2. Kusonyeza umwini	Mbuzi <u>ya Lazalo</u> yapezeka.
3. Kusonyeza nthawi	Ndidzafika kwathu <u>pa 11 Juni</u> .
4. Kusonyeza chipangizo	Amumenya <u>ndi ndondo yachitsulo</u> .
5. Kusonyeza mgwirizano	Phiri <u>la Mulanje</u> ndi lokongola.

#### 7. Kapandamneni wa mnenei wosasintha nthawi

Mnenei wosasintha nthawi ndi mnenei yemwe amapangidwa pophatikiza mphatikiram'mbuyo 'ku-' ku mnenei. Akakhala payekha, mneneiyu saonetsa nthawi ya mnenei yomwe alimo.

Kapandamneni wa mnenei wosasintha nthawi ndi kapandamneni yemwe amayamba ndi mnenei wosasintha nthawi koma mneneiyu satha kupereka ganizo (ngakhale kuti ndi mnenei).

Kapandamneniyu ndi yankho la funso 'kutani ', poyankha ntchito ya mnenei m'chiganizo.

#### **Zitsanzo**

- Chaka chino mwafulumira kubzala mbewu.
- Iye watsala pang'ono kuphika nsima.
- Si bwino kusala anthu olumala.


#### **Ntchito**

- Kodi 'kapandamneni' ndi chiyani?
- Tchulani mitundu itatu ina iliyonse ya akapandamneni ndipo pa mtundu uliwonse mupereke chitsanzo chanuchanu chimodzi.
- Lembani mitundu ya akapandamneni omwe ali ndi mzere kungsi kwawo mu ziganizo zotsatira.
  - Zione amayankhula ngati amake.
  - Aphunzitsi akuphunzitsa phunziro logwira mtima.

- c. Kuthandiza munthu wolumala ndi chinthu chabwino.
  - d. Kungokhala pamudzi kulibe phindu.
  - e. Tinafika pakati pa usiku anthu ali m'kafe.
  - f. Anyamata ndi atsikana ambiri amakono ndi osamva mwambo.
4. Lembani mzere kungsi kwa akapandamneni a mayina mu ziganizo zotsatira ndipo mutchule ntchito zomwe akugwira.
- a. Kupita ku maiko akunja ndi kuphunziranso.
  - b. Iye ndi mnzakeyo amakonda kuyenderana.
  - c. Ophunzira opulupudza aja alephera mayeso.
  - d. Ku Dziwe kunali zoopsa pomwa mchape.
  - e. Bambo ndi mayi anga abwera lero.
5. Lembani ziganizo zanu zisanu zokhala ndi akapandamneni otsatira ndipo mulembe mzere kungsi kwa akapandamneniwo, kenako mufotokoze ntchito zawo. Mulembe kapandamneni mmodzi ndi ntchito yake pa mtundu umodzi uliwonse.
- a. Kapandamneni wa dzina
  - b. Kapandamneni wa mfotokozi
  - c. Kapandamneni wa muonjezi
  - d. Kapandamneni wa mfuwu
  - e. Kapandamneni wa mperekezi
6. Fotokozani momveka bwino momwe mungasiyanitsire kapandamneni wa dzina lochokera ku mnene ndi kapandamneni wa mnene wosasintha nthawi.



## ZOYANKHULA MWINI NDI ZOYANKHULA WINA



### Kuganiza mozama

1. Fotokozerani anzanu zomwe mwana ndi bambo akunena pa zithunzi zili pamwambapa.

2. Tchulani zitsanzo za mawu anuanu omwe mwaonjezera, pofotokozera anzanu, musanatchule mawu enieni omwe mwana ndi bambo ayankhula.

Zoyankhula mwini ndi mawu enieni omwe woyankhula wanena. Mawuwo sasinthidwa mpang'ono pomwe ndi munthu yemwe akufotokoza zomwe wina wayankhula.

Pamene tikulemba mawu a mu zoyankhula wina, mawuwo amakhala mu mitengero.

### ***Zitsanzo***

1. Iye adati, “Ndifuna mundipatse ndalama.”
2. “Chuma chili m’nthaka,” Kamuzu Banda adatero.
3. Akuluakulu adati: “Pamsasa saipitsa.”

Zoyankhula wina ndi mawu omwe munthu amayankhula pamene akufotokoza zomwe wina adanena. Mawuwo amasintha zina ndi zina ndipo poŵalemba sakhala m’mitengero.

### ***Zitsanzo***

1. Iye adati ankafuna kuti amupatse ndalama.
2. Kamuzu Banda adati chuma chili m’nthaka.
3. Akuluakulu adati pamsasa saipitsa.

Posintha ziganizo kapena mafunso kuchoka mu zoyankhula mwini kuti zikhale mu zoyankhula wina, aphantikiri ena ndi mawu ena amasintha. Mwachitsanzo, aloŵam’malo, masinde aumwini, nthawi za aneni, masinde ndi mawu olozera komanso aonjezi ena okamba za malo ndi nthawi, amasintha.

Onani zitsanzo zomwe zili mu tebulo lotsatirali.



<b>Mu zoyankhula mwini</b>	<b>Mu zoyankhula wina</b>
Ine	Iye
Ife	Iwo
Iwe	Iye/ine
Inu	Iwo/ife
-nga	-ke
-thu	-wo
-ko	-nga
-nu	-wo/-thu
-thu	-wo
Ichi	Icho/chija
-no	-ja
Dzulo	Dzulo/dzulo lakelo
Lero	Lero/tsikulo
Mawa	Mawa/tsiku lotsatiralo
Nthawi yakale	Nthawi yakale
Nthawi yatsopano	Nthawi yakale yathayi
Nthawi yatsopano yopitirira	Nthawi yakale yopitirira
Nthawi yakaŵirikaŵiri	Nthawi yakaŵirikaŵiri
Nthawi yam'tsogolo	Nthawi yam'tsogolo

***Zitsanzo mu zoyankhula mwini***

1. Chiphiko wati, “Ine ndi mwana wanga tinabwera dzulo.”
2. “Ife tifuna kugula chimanga ichi lero,” amayi atero.
3. “Dziko lanu ndi lamtendere,” mlendoyo adatero.
4. “Kodi inu mukuphika chiyani?” iye adafunsa.
5. “Iwe udzatha kufika kuno maŵa?” Maliya adadabwa.

### *Zitsanzo mu zoyankhula wina*

1. Chiphiko wati iye ndi mwana wake anabwera dzulo lakelo.
2. Amayi ati iwo amafuna kugula chimanga chija tsikulo.
3. Mlendoyo adati dziko lathu ndi lamtendere.
4. Iye adafuna kudziwa chomwe iwo adali kuphika.
5. Maliya adadabwa ngati iye akadatha kufika kuja tsiku lotsatiralo.

### **Ntchito**

1. Sinthani ziganizo zotsatirazi kuti zikhale mu zoyankhula wina.
  - a. “Kodi mwadya kale nsima?” Tawonga adafunsa anzake.
  - b. Katswiri adati, “Kuwononga zinthu zachilengedwe ndi koipa.”
  - c. “Ndimati mundigulireko nsapato,” iye adapempha mwaulemu.
  - d. Mfumu Tandwe idati, “Amalaŵi ndife amodzi.”
  - e. “Chaka chamaŵa ndifuna kudzalima nandolo,” mlimi adatero.
2. Sinthani ziganizo zotsatirazi kuti zikhale mu zoyankhula mwini.
  - a. Makolo adati anansi ndi nkondo.
  - b. Iye adafuna kudziwa chomwe iwo adali kusema.
  - c. A Gama adandiuza kuti adzapita kuja tsiku lotsatiralo.
  - d. Mtsogoleri wathu adatilangiza kuti tisamasakaze nkhalango.
  - e. Aphunzitsi ake amafuna kudziwa ngati iye adakhoza mayeso.

## | MUTU 18 |

‘L’, ‘R’, ‘LI’, ‘TI’ NDI ‘NDI’



### Kuganiza mozama

1. Tchulani zitsanzo zanuzanu zitatuzitatu za mawu omwe ali ndi malembo aŵa: ‘l’ ndi ‘r’.
2. Kodi mutaika ‘l’ pamalo pomwe pali ‘r’ mu mawu, tanthauzo la mawuwo lingasinthe?  
Tsimikizirani yankho lanu kupyolera mu chitsanzo.
3. Pangani chiganizo chomveka bwino chomwe chikhale ndi ‘li’, ‘ti’ ndi ‘ndi’.

### L NDI R

Anthu ambiri satha kusiyanitsa malembo a ‘l’ ndi ‘r’ akamalemba kotero kuti akamaŵagwiritsa ntchito, satsatira malamulo ake. Potsata malamulo a chiyankhulo, malemboŵa amagwiritsidwa ntchito mosiyana.

## **Kugwiritsa ntchito lembo ‘L’**

‘L’ amagwiritsidwa ntchito motere:

1. Koyambira kwa mawu

### ***Zitsanzo***

laŵi, lenga, limba, lodza, luntha

2. Kutsogolo kwa malembo amtsekulanjira a, o ndi u.

### ***Zitsanzo***

Msomali, ngolo, ufulu, kalulu, ulalo

3. Mu mneni woima payekha komanso mneni wodalira ‘-li’

### ***Zitsanzo mu mneni woima payekha***

- a. Ine ndili bwino.
- b. Mangadzi anali pompano posachedwapa.

### ***Zitsanzo mu mneni wodalira***

- a. Iye anali kuyendetsa njinga.
- b. Ife tili kudya nsima.

4. Mu mayina a mu gulu la Chi-, Zi- omwe amayamba ndi mphatikiram’mbuyo chi- kapena zi-

### ***Zitsanzo***

chilango, chilendo, chiletso, chilungamo, zilundu

5. Mu mawu onse oyamba ndi ‘ml-’ kapena ‘mul-’ potchula chimodzi ndi ‘mil-’ potchula zambiri.

### ***Zitsanzo***

- a. mlandu      milandu
- b. mlomo      milomo

6. Mu mawu onse opangidwa kuchokera ku masinde oyamba ndi ‘l-’

***Zitsanzo***

- a. lembera      watilembera
- b. loza          iloze

7. Mu mawu oloza

***Zitsanzo***

- a. Dzanja ili
- b. Phiri ilo

8. Mu mawu olozera omwe afupikitsidwa

***Zitsanzo***

- a. phiri ili      (phirili)
- b. therere ili   (therereli)

**Kugwiritsa ntchito ‘R’**

Kupatula mu njira zomwe zaonetsedwa pogwiritsa ntchito ‘L’, lembo la ‘R’ lili ndi malamulo ake a kagwiritsidwe ntchito koyenera.

‘R’ alembedwe patsogolo pa malembo amtsekulanjira ‘e’ ndi ‘i’.

***Zitsanzo***

lero	zambiri	therere	phiri
mzere	bwira	mvera	chipiriro

Nthawi zina mayina amwinimwini amalembedwa monga momwe eni mayinawo afunira mosaumirizidwa ndi malamuloŵa. Mwachitsanzo, a Chilwa, a Chilora kapena a Chirombo.

**‘NDI’, ‘LI’ NDI ‘TI’**

Maphatikizo kapena mawu ‘ndi’, ‘li’ ndi ‘ti’ amagwira ntchito zosiyanasiyana mu Chicheŵa.

**Ntchito za ‘ndi’**

‘ndi’ amagwira ntchito zotsatirazi:

1. Kukhala mneni

***Zitsanzo***

- a. Iye ndi mnzanga.
- b. Mudzi wathu ndi wamtendere.

2. Kukhala mlumikizi

***Zitsanzo***

- a. Anyamata ndi atsikana akuphunzira.
- b. Iwo agula nsomba ndi nyama.

3. Kukhala mperekezi

***Zitsanzo***

- a. Ndabwera ndi mnzanga.
- b. Ali ndi ndalama zambiri.

4. Kukhala mvekero

***Zitsanzo***

- a. Mutu wanga uli ndi.
- b. Mumange mtolowo kuti ndi.

5. Kukhala mgwirizanitsi wa mchitantchito (mwininkhani)

***Zitsanzo***

- a. Ndipita kwathu.
- b. Ine sindifuna mwana wamwano.

6. Kukhala mgwirizanitsi wa mchitidwantchito (pamtherankhani)

***Zitsanzo***

- a. Iwo andigulira cholemba.
- b. Ndikufuna mundiphikire therere.

## Ntchito za ‘li’

‘li’ amagwira ntchito zotsatirazi:

1. Kukhala tsinde la mneni

### *Zitsanzo*

- a. Iye ali bwino.
- b. Pachewa msulu pali nyerere.

2. Kukhala mgwirizanitsi wa mchitantchito (mwininkhani)

### *Zitsanzo*

- a. Dziko limazungulira dzuwa.
- b. Tsiku limodzi siliwoza mbewa.

3. Kukhala mgwirizanitsi wa mchitidwantchito (pamtherankhani)

### *Zitsanzo*

- a. Iye waliona phiri la Mulanje.
- b. Ndaligwira thupi la mzungu.

4. Kukhala mphetikiram’ tsogolo wozera dzina wogwirizana ndi mayina a mu gulu la Li-, Ma-

### *Zitsanzo*

- a. Kwathu kulibe khalidweli.
- b. Khasu limeneli ndi lathu.

5. Kukhala mgwirizanitsi wa maŵerengo

### *Zitsanzo*

- a. Ndimufunsa funso limodzi lokha.
- b. Tsiku limodzi siliwoza mbewa.

## Ntchito za ‘ti’

‘ti’ amagwira ntchito zotsatirazi.

1. Kukhala tsinde la mneni

***Zitsanzo***

- a. Akuti moni.
- b. Pati bi pali minga.

2. Kukhala mgwirizantsi wa mchitantchito (mwininkhani)

***Zitsanzo***

- a. Ife tidyera nyama lero.
- b. Ife sitipitako ku Balaka.

3. Kukhala mgwirizantsi wa mchitidwantchito (pamtherankhani)

***Zitsanzo***

- a. Aphunzitsi akutiphunzitsa ife Chicheŵa.
- b. Chonde, musatiderere ife.

4. Kukhala tsinde lofunsira

***Zitsanzo***

- a. Kodi ukufuna chiti?
- b. Wakhala poti?

5. Kukhala mphatikiram'mbuyo wochepetsa mayina a mu gulu Ka-, Ti-

***Zitsanzo***

- a. Timbuzi tanu ndi tofuntha.
- b. Agula tinthu tokongola.

6. Kukhala mphatikiram'tsogolo wozera mayina azambiri a mu gulu la Ka-, Ti-

***Zitsanzo***

- a. Kwathu kulibe timbalameti.
- b. Tinthu timeneti ndi ta mwana.

7. Kukhala tsinde lamgwirizano



### ***Zitsanzo***

- a. Akusankha mbewu yoti akabzale.
- b. Sindigula chinthu choti chabedwa.

## **Ntchito**

1. Fotokozani ntchito zitatuzitatu za ‘ndi’, ‘ti’ ndi ‘li’ ndipo pa ntchito iliyonse mupereke chitsanzo chanuchanu chimodzi mu chiganizo.
2. Kodi ‘ndi’, ‘ti’ ndi ‘li’ ali mu mitundu iti ya mawu? Pa mtundu iliwonse, tsimikizirani yankho lanu popereka chitsanzo chimodzi mu chiganizo.
3. Fotokozani ntchito imodziimodzi ya ‘ndi’, ‘ti’ ndi ‘li’ omwe atsekedwa mzere kungsi kwawo mu ndime yotsatirayi.

Pali abambo ena oipa mtima omwe amachitira atsikana ndi amayi nkhanza zosiyanasiyana pantchito. Mwachitsanzo, abwana ena aamuna amapondereza amayi pantchito ndipo amafuna kuti azigona ndi amayiwo ngati amayiwo afuna kukwezedwa mwamsanga pantchito. Amayi omwe amakana khalidwe lonyansali amakumana ndi zovuta zambiri. Abwanawo amati mkazi ayenera kuvutikira kuti akwezedwe pantchito. Zoterezi ndi zodandaulitsa kwambiri. Kodi dziko lathu likupita kuti?



## ZITSANZO ZA MAFUNSO AMAYESO



### Kuganiza mozama

1. N'chifukwa chiyani ophunzira ambiri amadana ndi phunziro kapena mayeso okhudza malamulo a chiyankhulo cha Chicheŵa?
2. Tchulani njira zomwe zingakuthandizeni pofuna kumvetsetsa phunziro kapena mafunso okhudza malamulo a chiyankhulo cha Chicheŵa.

Anthu ambiri omwe akukonzekera kulemba mayeso a boma a Chicheŵa (monga a Sitandade 8, Fomu 2 ndi Fomu 4) amada nkhaŵa kwambiri ndi gawo la malamulo a

chiyankhulo chifukwa amati gawoli ndi lovuta kwambiri. Mutu uno ukuthandizani kukonzekera mayeso a boma pa gawo la malamulo a chiyankhulo.

Mafunso omwe achokera pa mitu yosiyanasiyana yomwe ili mu buku lino sakusiyana ndi omwe amabwera pa mayeso a boma. Si bwino kungoloŵeza mayankho a mafunsowo koma kumvetsetsa zomwe mutu womwe funso lachokerapo ukukamba monga zokhudza mitundu, ntchito ndi kapangidwe ka mawu.

Mutu uno uli ndi zitsanzo za mafunso a mayeso a boma a Chicheŵa pa gawo la malamulo a chiyankhulo. Mafunsoŵa atha kuthandiza aphunzitsi a phunziro la Chicheŵa kuzindikira kakonzedwe koyenera ka ntchito ya malamulo a chiyankhulo komanso atha kuthandiza ophunzira kudziŵa momwe mafunso a malamulo a chiyankhulo amabwerera. Muyenera kumvetsetsa osati kungoloŵeza mafunso ndi mayankho omwe mungapeze.

Zitsanzo za mafunso a mayeso a boma a Chicheŵa pa gawo la malamulo a chiyankhulo zili motere:

- 1 a Kodi mayina otsatira adachokera ku zinenero ziti?
  - i chitenje
  - ii shasha
  - iii buluku
  - iv dona
- b Fotokozani momwe afotokozi omwe ali m'munsiwa adapangidwira:
  - i wochenjera
  - ii zalero
  - iii waphee
- 2 a Lembani ziganizo zokhala ndi aneni a kachitidwe ka aneni aka:
  - i kachitidwe ka wochitidwa m'chibisira
  - ii kachitidwe ka wochitidwa konyazitsa
  - iii kachitidwe ka wochitidwa poyera
- b Perekani ntchito za “-li” yemwe ali ndi mzere kungsi kwake mu ziganizo zotsatirazi.
  - i Ine ndili bwino.

ii Bukuli mulisamale.

- 3 Sinthani ziganizo zotsatirazi kuchoka ku zoyankhula wina kupita ku zoyankhula mwini.
    - a Agogo adafotokoza kuti chaka chimenecho mvula idachepe
    - b Mphatso adati mayeso a chaka chimenecho adali ophweka.
    - c Dotoloyo adaŵauza kuti azikamupatsa mwanayo mankhwala katatu patsiku.
    - d Zione adafuna kudziŵa ngati Yohane abwere kuphwando.
    - e Aphunzitsi adatilangiza kuti tizilemba mosamala.
  - 4 Lembani chiganizo ndi mawu ‘ndi’ kusonyeza ntchito zotsatirazi. (Chiganizo chimodzi pa ntchito iliyonse.)
    - a mlumikizi
    - b mneni
    - c mvekero
    - d mperekezi
    - e mgwirizanitsi wa mwininkhani
- 

- 1 Perekani ntchito za aloŵam’ malo omwe ali ndi mzere kungsi kwawo mu ziganizo zotsatirazi:
  - a Mfumu yawo ndi iyu.
  - b Iwe ungandiyere ine nsima yanga yonse?
  - c Ife takhoza mayeso.
  - d Taima pompo, iwe.
- 2 Lembani chitsanzo chimodzi cha agwirizanitsi a mitundu yotsatirayi m’chiganizo ndipo mutseke mzere kungsi kwa agwirizanitsiwo.
  - a wamgwirizano
  - b wopeneka
  - c woŵerengera
- 3 Pangani mvekero umodzi wamchitidwe ndi umodzi wamakhalidwe kuchokera ku mneni

aliyensi wa aŵa:

- a khala
- b gona
- c panda
- d thyokathyoka
- e thifuka

- 4 Sinthani ziganizo zotsatirazi kuti zikhale mu kachitidwe ka wochita.
- a Katundu adasungidwa ndi woyendetsa basiyo.
  - b Mayinaŵa sadzasinthidwanso ndi ife.
  - c Mayeso akhozedwanso ndi aliyense ngati kale.
  - d Minda ikatenthedwa ndi moto chonde chimathaŵamo.
  - e Sitikusangalatsidwa ndi zochita zawo.
- 5 Kodi akapandamneni omwe atsekedwa mzere kungsi kwawo mu ziganizo zotsatirazi ndi a mtundu wanji?
- a Mayo ine! Nyumba ija ikupsa.
  - b Bwanayo amayankhula mokalipa kwambiri.
  - c Akuti atenga bwato lalikulu lija.
  - d Akuchitaku ndi kusazoloŵereka kokhakokha.
- 6 Lembani ziganizo ndi mperekezi “pa” kusonyeza ntchito zotsatirazi ndipo mutseke mzere kungsi kwake.
- a Kusonyeza chipangizo chomwe chagwiritsidwa ntchito.
  - b Kusonyeza malo
  - c Kusonyeza umwini
- 7 a Sankhani nthambi za chiganizo za muonjezi kuchokera mu ziganizo zotsatirazi ndipo mutchule mitundu yawo.
- i Anyamataŵa akhala akuchita maseŵero ambiri kuti asadzatope pa mpikisano.
  - ii Ngakhale mwanayo amumenya, sangasinthe makhalidwe oipa.
  - iii Bwanayo wakwiya kwambiri popeza ntchito sinayende bwino dzulo.

- b Lembani chiganizo kusonyeza ntchito za mpumiro izi:
  - i Kusonyeza chidule cha mawu
  - ii Kutsiriza chiganizo
- 8 a Lembani masinde a mawu omwe ali ndi mzere kungsi kwawo ndipo mutchule mitundu ya masindewo.
  - i Mwana waukali safunika pakhomu.
  - ii Muuzeni kuti apitebe lero, asamvere za Petulo.
  - iii Chinthu chomwe amati chasoŵa chija chapezeka tsopano.
- b Perekani ntchito ziwiri za chilichonse cha zizindikiro za m'kalembedwe zotsatirazi:
  - i mpatuliro
  - ii mpumiro
  - iii mfunsiro

- 
- 1 a Lembani ziganizo zomveka bwino ndi mawu otsatirawa posonyeza mitundu iwiri  
ya
    - mawu omwe ali m'mikutiramawu kutsogolo kwa mawuwo:
      - i zake (mfotokozi, mloŵam'malo)
      - ii khala (mneni, dzina)
      - iii ndi (mperekezi, mvekero)
  - b Kodi mawu otsatirawa adachokera ku ziyankhulo ziti?
    - i malume
    - ii chingwa
    - iii dona
  - 2 a Lembani zitsanzo za mitundu ya aneni otsatirawa mu ziganizo zomveka bwino ndipo mutseke mzere kungsi kwa aneniwo:
    - i wothandiza
    - ii wodalira

- iii woyambukira
- b Lembani chitsanzo chimodzi pa mifuwu yomwe imagwira ntchito izi:
  - i Kusonyeza kudandaula
  - ii Kusonyeza kunyansidwa
  - iii Kusonyeza kukondwa
  - iv Kusonyeza kulira
- 3 a Fotokozani momwe afotokozi ali m'munsiŵa adapangidwira.
  - i wazii
  - ii wofooka
  - iii chalero
- b Perekeni chachimuna cha izi:
  - i kuka
  - ii mfumakazi
  - iii nzidzi
  - iv thadzi
- 4 Sonyezani ntchito za 'ti' zotsatirazi mu ziganizo zomveka bwino ndipo mutseke mzere kungsi kwake.
  - a kukhala tsinde la mnene
  - b kufunsa
  - c kukhala mgwirizanitsi wa pamtherankhani
  - d kukhala mphatikiram'tsogolo woloza
  - e kuchepetsa

- 
- 1 a Pangani mayina a anthu ndi antchito kuchokeera ku aneni aŵa:
    - i phunzitsa
    - ii lalika



- b Sinthani ziganizo zotsatirazi kuchokera ku zoyankhula mwini kupita ku zoyankhula wina.
- i “Kodi umakonnda kumwa chiyani?” Joni adamufunsa Maliya.
- ii “Ife timaphunzira pa sukulu iyo chaka chatha,” Chimwemwe adandiuza.
- iii “Maŵa ndidzakutuma kutawuni,” bambo adauza Mbombe.
- 2 Lembani ziganizo ndi mneni “bwera” kusonyeza nthawi za aneni zotsatirazi:
- a Nthawi yatsopano yathayi
- b Nthawi yakale
- c Nthawi yam’tsogolo
- d Nthawi yakale yathayi
- e Nthawi yatsopano yopitirira
- 3 Sankhani alumikizi mu ziganizo zotsatirazi ndipo mupereke ntchito zomwe akugwira.
- a Iwo adagula nsapato, malaya ndi chitenje.
- b Fatima amalimbikira kuŵerenga kuti adzakhoze mayeso.
- c Tikagula nyama ngati mungatipatse ndalama zokwanira.
- d Mukabwere ndi Maliya osati Joni.
- e Iye adavulala kwambiri moti ali kuchipatala.
- 4 Pezani akapandamneni mu ziganizo zotsatirazi ndipo mupereke mitundu yawo.
- a Nasimango wagula nkhuku ya maŵangamaŵanga.
- b Ndamugoneka kuseri kwa nyumba.
- c Mayo ine! Ndikufa kuno.
- d Iwo amakonda kulemba nthano.
- e Anawo adafika dzulo usiku.
-

## **MABUKU NDI MAPEPALA OMWE TIDAGWIRITSA NTCHITO**

- Alien, J.B.E and Pit Corder, S. (eds) (1974). *Techniques in Applied Linguistics*. London: Oxford University Press.
- Banda, M.A. (1979). *English Grammar for Schools*. Blantyre: Dzuka.
- Black, E.L. and Wood, E.R. (1963). *Fifth Year English*. London: Blackie and Son Limited.
- Chadza, E.J. (1980). *Tiphunzire Chicheŵa*. Blantyre: Christian Literature Association in Malaŵi.
- Chicheŵa Board (1991). *Chicheŵa Grammatical Tems*. Zomba: Chicheŵa Board.
- \_\_\_\_\_ (1990). *Chicheŵa Orthography Rules*. Zomba: Chicheŵa Board.
- Christophersen, P. (1965). *An English Phonetics Course*. London: Longmans.
- Edris, A.K. (1995). *English Grammar Infomation Book*. Blantyre: Dzuka.
- Eckersley, C.E.and Eckersley, J.M. (1973). *A Comprehensive Grammar for Foreign Students*. London: Longmans Group Limited.
- Forrest, R. (1986). *Revision English*. Blantyre: Dzuka.
- Gwengwe, J.W. (1970). *Kathyali Psyipysiti*. Blantyre: Malawi Publications and Literature Bureau
- Haley-James S. (1985). *English*. Atlanta: Houghton Miwlin.
- Homby, A.S. (1988). *Oxford Advanced Leamers' Dictionary of Current English*. London: Oxford Unversity Press.
- Malawi Institute of Education Teacher Development Unit *Student Teacher's Handbook 3 1st Draft Version* (unpublished). Domasi: Malawi Institute of Education.
- Malawi Certificate of Education Examinations Board. "Malawi Certificate of Education Examinations: Chicheŵa Paper II (1982-1987 past papers)," Zomba: Malawi Certificate of Education Examinations Board.

- Malawi National Examinations Board. “Malawi School Certificate of Education Examinations: Chicheŵa Paper II (1988-1997 past papers),” Zomba: Malawi National Examinations Board.
- Malawi National Examinations Board. “Malawi School Certificate of Education Examinations: Chicheŵa Paper II (2000-2014 past papers),” Zomba: Malawi National Examinations Board.
- Malawi Certificate of Education Examinations Board for the “Malawi Certificate of Education in conjunction with the Associated Examining Board for the General Certificate of Education in the United Kingdom: Chicheŵa Paper II (1974-1981 past papers). Zomba: Malawi Certificate of Education Examinations Board.
- Malawi Institute of Education. (2013). *Silabasi ya Chichewa ya Fomu 1 ndi 2*. Domasi: Malawi Institute of Education.
- Malawi Institute of Education. (2013). *Silabasi ya Chichewa ya Fomu 3 ndi 4*. Domasi: Malawi Institute of Education.
- Mangoche, M.V.B. ndi Loga, J.P.B. (1971). *Muuni wa Chicheŵa*. London: Thomas Nelson and Sons.
- Mankhwazi Mwale, J.W.A. (1959). *Miyambi ya Kapizyololo*. London: The Sheldon Press in Association with the Northern Rhodesia and Nyasaland Joint Publications Bureau.
- Mchombo, S. (2004). *The Syntax of Chichewa*. Cambridge: Cambridge University Press.
- Mjaya, A.N.U. (2002). *Descriptive Analysis of African Languages*. Domasi: Domasi College of Education.
- Mwale, E.B. (1962). *Za Acewa*. London: Macmillan in association with the Publications Bureau Lusaka and Blantyre.
- Nankwenya, I.A.J. (1992). *Zofunika Mu Galamala ya Chicheŵa*. Blantyre: Dzuka.
- Nkhoma, W.A. (1999). *Kuphunzira Chinyanja*. Zomba: Chanco Publications.
- Nthala, S.J. (1965). *Mbiri ya Achewa*. Blantyre: Malawi Publications Bureau.

- Oliphant, L. (1936). *A Short Course in English Grammar*. London: Oxford University Press.
- Pachai, B. (1973). *Malawi: The History of the Nation*. London: Longman Group Limited.
- Price, T. (1953). *The Elements of Nyanja for English-Speaking Students*. Blantyre: Church of Scotland.
- Rose and Purkins (1981). *English Grammar: A Reference book for Schools and Colleges*. London: Shutter and Shooter.
- Sanford, A.B. (1979). *Using English: Grammar and Writing Skills*. London: Harcourt Brace Jovanovich.
- Salaun, N. (1969). *Chichewa Intensive Course*. Lilongwe: Likuni Press and Publishing House.
- Shapp, M.G. (1980). *New Book of Knowledge*. Canada: Grolier Incorporated.
- Steytler, J.G. (1989). *Cinenedwe Ca Cinyanja*. Lusaka: Kenneth Kaunda Foundation.
- Wills, A.J. (1985). *An Introduction to the History of Central Africa: Zambia, Malawi and Zimbabwe*. London: Oxford University Press.